



Żurczyk korzyb

9.2019

АКЦИЯ АКЦИЯ АКЦИЯ АКЦИЯ АКЦИЯ

Дона ёртыяс!

Октябрь 31 лунөдз ми нуодам
«2020 во кежлө льготной электронной гижөдчөм» акция.

Витнан коми газет-журналыслөн электроннөя гижөдчан доныс
2020 во кежлө –

1.000 шайт (экономия – 200 шайт).

Татшөм комплектыс лөсялас ыджыд семьялы,
көни эм зонпосни да верстьö йөз.

А сідзжө сылы, коді уджалө челядькөд школа-садйын.

Лист бокьясысь гижөд, серпас, плакат
позьö петкөдлыны проекторөн.

Акция дырйи быд петаслөн доныс –

200 шайт (экономия – 100 шайт).

Эм юалөм?

Звөнит «пось линияö» 8-912-176-53-55 телефон пыр

Позьö тшөттш шыөдчыны

электронной поштаö: komi-kerka@ya.ru

t.me/komi_kerka 

[komi_kerka](https://www.instagram.com/komi_kerka) 

vk.com/komi_kerka 



komikerka.ru

ПЕТӢ 1926 ВОСЯНЬ

ЛЭДЗӢНЫ: КОМИ РЕСПУБЛИКАСА ЮРАЛЫСЬЛӢН АДМИНИСТРАЦИЯ,
КОМИ РЕСПУБЛИКАСА ГИЖЫСЬ КОТЫР

ВОЙВЫВ КОДЗУВ



ISSN 0134-4323

БЫД ТӢЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

9 (873)

КӢЧ (СЕНТЯБРЬ)

2019

ТАЙӢ НОМЕРЫН:

Г.А. БУТЫРЕВАЛЫ — 75

| | |
|---|----|
| ЧолӢмалам! | 3 |
| Евгений КОЗЛОВ, Галина БУТЫРЕВА. | |
| МӢдлапӢлын йӢлӢга. Ёрта сёрни | 4 |
| Иван НОГИЕВ. Менам пиукыс, менам... Повесът | 13 |
| Александр ШЕБЫРЕВ. «А шыладсӢ тэч ачыд...» | |
| Сыланкывъяс | 37 |

ВОЯС ДА ЙӢЗ

| | |
|--|----|
| Анастасия ОСТАПОВА, Таисия НЕКРАСОВА, Юлия КУТЬКИНА, Павел ПИМЕНОВ. | |
| Ёна тӢждысис йӢз вӢсна | 45 |

ВИДЗӢДЛАС

| | |
|---|----|
| Николай МАЛЬЦЕВ. Чудь — миян зэв важся рӢдвуж | 58 |
| Олег УЛЯШЕВ. Коми чудъяс-Ӣ-коми комияс? | 64 |

ЧЕЛЯДЬЛЫ

| | |
|--|----|
| Татьяна АНУФРИЕНКО. Дзоля ёртъяс йылысь висътъяс ... | 70 |
|--|----|

12+

Обложка вылын снимокыс Ксения МартюшевалӢн.

© «Войвыв кодзув» («Северная звезда»), 2019 г.

СЫКТЫВКАР

СЕВЕРНАЯ ЗВЕЗДА



*Ежемесячный
литературно-художественный
журнал*



Учредители:

АДМИНИСТРАЦИЯ ГЛАВЫ РЕСПУБЛИКИ КОМИ

**«СОЮЗ ПИСАТЕЛЕЙ РЕСПУБЛИКИ КОМИ» - РЕГИОНАЛЬНОЕ
ОТДЕЛЕНИЕ ОБЩЕРОССИЙСКОЙ ОБЩЕСТВЕННОЙ ОРГАНИЗАЦИИ
«СОЮЗ ПИСАТЕЛЕЙ РОССИИ»**



Издатель:

АУ РК «ИЗДАТЕЛЬСКИЙ ДОМ КОМИ»

ДИРЕКТОР ОРЁЛ И.Н.



РЕДАКЦИОННАЯ КОЛЛЕГИЯ:

Главный редактор

ПОЛУТРУДОВ А.В.

Ответственный
секретарь

КИЧИГИН И.Н.

КОЗЛОВ Е.В.

УЛЯНОВ А.В.

УЛЯШЕВ О.И.

ЛИМЕРОВА В.А.



Чолөмалам!

Галина Васильевна Бутырева — миян республикаын нималана морт! Мыйта сьөлөм да кужанлун сийө пуктис аслас гижөдъясө, олөмбыднас вөчөм быдсикас уджө. И тайө морт вылас видзөдөмөн век окота лоны сы кодь жө бурөн, ыджыд сьөлө-маөн, югыдөн, ловнад сөстөмөн.

Литература радейтысь войтыр төдөны: Галина Бутыревалөн кыв-буръясыс век восьтөны ыджыд мөвп. Олөмас быд воськов думайтөма, нинөм абу кольөма мөвпавтөг, донъявтөг. Некор сийө оз вид да мыжав кодөскө, а медводз вежөртө асьыс удж да кыв. Сяммас-ө миян пиысь быдөн вот тадзи донъявны ловпытш-көсса да ас гөгөр олөмсө?



А мыйта муслуныс поэтлөн чужанін дорас!.. И сийө оз сөмын гиж та йылысь, оз сөмын нимкодясь бокисянь, а унатор вөчө Удоралы да Йөртымдін сиктлы. Збыль өд, ловзыны пондїс сиктыс. И вичко лөсьөдїсны-дзоньталїсны, и «Кытшъяс» этно-фестиваль кымынкө во нин нуөдөны, и библиотека бердын литературной гостинөй восьтїсны, кытчө зэв өна радейтөны во-лыны йөзыскөд аддзысьлөм могысь коми гижысьяс. И век шоныда да кыпыда тані паныдалөны найөс.

Галина Васильевналөн эм «Сад друзей» кывбур. Сийөс лыд-дьөм бөрын, гашкө, он дзик пыр на и вежөрт шуөм кывйыслысь джуджыд мөвпсө. Но кор тшөкыда аддзысьлан анькөд, аддзан, кызди сийө асьсө кутө йөз водзын, мый йылысь сёрнитө, пондан вежөртны кывбурыслысь төдчанлунсө: колө ёртасыны, оз ков вины өта-мөдөс кывйөн да сямтөм уджөн.

И колө садитны пуяс... Мед эськө на кодь жө зумыдөсь, мичаөсь, кыпыдөсь вөліны и миян гижөдъяс, миян уджъяс. Аттьө, Галина Васильевна, Тянлы тайө мөвпсыс! Дерт, лөкөн овны оз позь. Век колө нырчыны бурлань.

Чужан лунөн, дона ань, дона гижысь! Мед шуөм кывныд воас унджык йөзлы сьөлөмас да збыльмас. А Тянлы сям дзоньвидзалун да выль гижөдъяс. Ми век виччысям найөс!

*Пыдди пуктөмөн,
Коми гижысь котыр,
«Войвыв кодзув» журнал редакция.*

Вөзгям лыддысысылы важся коми сиктгясын, Емдинладорса Эжолын да Удораса Йортымдинын, чужом кык позтлысь — Евгений Козлов да Галина Бутыревалысь ёрта сёрнисё. Сюрёсалёны сёрнисё оз веськыда вочавидзём-юалёмгяс, а челядьдырся казтылёмгяс, сэкся образ-кылёмгяс. Висьтасысыяс казтылёмны вёбелёмсё, отлаалёны воддзасё да ёнисё, верстьояс выль пөв олёны челядьдырнас. Быттё челядьдырсьыс татчөдз воё аслыспөлөс йөлөгә. Быттё сёрниас найё ота-мөдыслы тшөтти жё лобны йөлөгәйн...

Мөдлапöлын йөлөгә

ЁРТА СЁРНИ

*Мөдлапöлын йөлөгә
Мекöг час нин сёрнитö,
Быттё кодкө вёлөкас
Манитчöма-сёрмöма.*

*Мөдпöлалö кывгясöс,
Весиг лыдгö мөвпгясöс.
Берегдорса нывгясыс
Казтылёмны вöтгясöс...*

Е.Козлов

*Мөдлапöлын,
Вашка пөлөн,
менам сылан лов
кывтö-катö
нэм нин матö,
оз кор нянь ни сов.*

*Арся сёрни,
көть и сёр нин,
сыкöг панла ме...
Мөдлапöлын
пыжö сөла,
сылан, мекöг тэ?*

Г.Бутырева

Е.Козлов: Вöли локта Пантиль дедгяс ордö, а найё абу гортынöсь — мунöмаöсь кытчökö Важкуаö ли Пер гөп дорö турун карны. Дед-бабöс виччысигмоз пукся скамья вылö да топöдча керка стен бердас... А радиосö найё век вöли гораа включитöмөн кольöны. И став вир-яйөн кыла, мый сәни шыалö.

Ёни, кор кыла, шуам, Римский-Корсаковлысь либö Вердильсы музыка, син водзö пыр и сувтöны сийö кадся серпасгясыс. Дерт, сәки эг тöд авторгяссö, дай ёни ог вермы стöча индыны, но ичöt мортлөн вежөрö пырöм музыкаыс шыалö кольöм кадсьыс...

Г.Бутырева: Школаö пыртöдз гожöмбыд вöли ветла колхозной дворö йöвла...

Асланым мөс ни кук эз вöv, вот и ковмывліс броттявны, гашкö, матö километр, отарö-мөдарöсö. Мөдтор вылö ме коддёмсö татшөм водзнас öдвакö эськö садьмөдан (асгя лысьгысигкежлö!). Но йöвла!.. Йöвла вöли чечча кыв шутөг и... дворлань довга, узя ли ола нин...

И сöмын воа Попан Саш керка дорöдз, век сәнджык вöли «ловзё» кузь падöс* йылö лэптöм радио: репродукторас заводитö мыйкö муркөдчыны, а сы бöрын тай öдöбсяс, и векджык кутшөмкö музыкайн тыртас став ывлавывсö...

И ме дзикöдз нин садьма, öдöбся жö музыка бöрсяыс, төкөтё ог лэб...

* Падöс (диал.) — сургя.

Дерт, гашкӧ, эз быд асыв тадзи вӧв, но ӧні меным кажитчӧ — быд!..

Коркӧ бӧрын нин тӧдмалі, кызди тайӧ музыкаыс шусьӧ: Огинскийлӧн полонез... Словарысь лыдди: «Полонез — торжественный танец-шествие, играли в начале балов, подчёркивая возвышенный характер праздника...»

Да?! И збыль, ме вӧлі быттьӧ шествуйта жӧ сикт кузя — югыд, шондіа уличті, а лов вылын кыпыды...

Ме... «Му выв да Енкола костас, и менам кыин йӧв доз...» Быттьӧ ме йылысь коркӧ гижлӧма тайӧ кывбурсӧ роч поэт Ксения Некрасова. Збыль, збыль!

Е.Козлов: ..Меным тыри сизим арӧс. Маиса Ивановна да сылӧн пӧдругаясыс чолӧмалісны чужан лунӧн, козыналісны уна рӧма карандаш пачка да альбом, сиисны, мед бура велӧдча да лоа художникӧн. Быд рыт вӧлі вӧзйыся узьны дед-баб ордӧ, и пока муна вӧлӧсьтті, сійӧ карандашгъяснас став потшӧс да сарай стен рисуйтала. Дерт, школаӧ пыригкежлӧ карандашгъяс пӧшти бырины, но мыйта шудыс вӧлі!

Г.Бутырева: Кутшӧмкӧ воӧ арнас миянын гӧститіс воча чойлӧн верӧсыс, Веня дядь. Тыдалӧ, менам нимлун вылӧ веськалӧма. А, гашкӧ, сідз мыйкӧ юрас шучкӧма — пӧдаритіс меным «Смена» фотоапарат.

Сы бӧрын ачым нин ньӧблі дас гӧгӧр уна пӧлӧсӧс, и вӧліны на пӧвстын и выль «Сменнаяс», и «Любитель», и «Зенит», и «Canon», и «Polaroid» да с.в.

Но медся донӧсь медводдза снимокгъясыс. Ті кӧ аддзылін-ныд, кызд найӧс печатайтлі: плёнкасӧ пуктан бумага вылас, увеличительсылӧн подулас дзик, и здук кежлӧ включитлан бисӧ...

И петӧны проявителяс ичӧтик, ӧдва тыдалана серпасгъяс... Жаль, мый ӧні найӧс он нин петкӧдлы. Вошӧмны...

Е.Козлов: Ог помнит, кымын арӧс меным вӧлі... Папа вугыр шатина, вок новлӧдлӧ нидзув доз, а меным сетісны черисӧ новлӧдлыны марля мешӧчок. Шусьӧ сійӧ ном шапкаӧн. Кутшӧмкӧ здукӧ джӧмді да уси, чериыс киссис — мӧдісны ниглясьны турун пӧвстас. Ме бӧрддзи. Ог тӧд мыйысь ӧнджыка: дойсьыс либӧ сыысь, мый черисӧ кисьті.

Зэв уна во коли. Коркӧ зонгъяскӧд вуграсям Пӧтюлын. Воим ловпу чукӧр весьтӧ, и сійӧ лунсӧ казгышті. Кайи пуяс дорас да пыр жӧ аддзи вугыр шатинсӧ. Дерт, жилкаыс вӧлі рыжмӧма сэтчӧдз, мый киссис, но — табыыс! Мыйлакӧ сійӧ уна во оліс





вежӧрын. Аслам вугырӧ пыр жӧ пысалі да во-мӧд на вуграси сыӧн.

Г.Бутырева: Менам бать вуграсьны, гашкӧ, эз и кужлы. Вонас кыкысь ли куимысь и лӧччыліс ю дорӧ шоньд гожся рытьясӧ сетӧн кыйсьыны. Менӧ сьӧрсьыс босьтліс тывъясны. Ачыс пыжын тывсӧ кыскӧ, а ме — берегтыс муна... Ог помнит, медкӧ мыйкӧ буртор шедліс.

А вот ӧти арся пемыд войӧ вӧйтліс сетсӧ Йӧртым вомӧ, и сӧки ми вайим гортӧ ыджыдкодъ сьӧмга.

Дерт, сӧк кыйны гӧрд черитӧ эз нин позь, сы понда сеть вӧйтӧм бӧрын ми батькӧд пукалім берегвывса бадъ пӧвстын, весиг кынмыштӧм, но бипур эг ӧзтылӧ.

Кор мыйкӧ бузнитіс сетяным, батьӧ ӧдйӧ пуксис пыжӧ...

Воис бӧр, и ми ӧтшкысим Вашка кузя катчӧс, гортлань...

Нӧм чӧж син водзын и арся пемыд войыс, и гортын радлӧмыс — джын пызан кузьта, джын пызан пасьта лӧль чери. Сьӧмга!

А мамӧ сӧмын и шуалӧ: «Тайӧ тӧныд Енмыс нимлун кежлад сетіс...»

Е.Козлов: Дзолядырся серпасъясид медся вынаӧсь. Минскысь локтіс дядя Женя. Сійӧ вӧлі заядлӧй вуграсьысь. Аскӧдыс вайис японскӧй жилка. И висьталіс, мый аски мунам вуграсьны. Водз асывсянь сыкӧд каралім вугыръяс, сӧсся мунім Йивты вис вомӧ: Пантіль дед, вок, ме да дядя Женя. Воим да пока дасьтысим, Пантіль дед вевъяліс вӧйтны вугырсӧ и пыр жӧ лӧптис сынпи. «О!— шуис сійӧ.— Талун чериалас кӧ-а?!» Лунтырӧн ӧтпыр сӧсся эз дӧбнитлы. Рытладорыс Пантіль дед да вок мунісны гортӧ, а ми кольччим да шондӧ пуксьытӧдз видлалім таладор и мӧдлапӧв дор, но сідзи нинӧм эз и шед.



Көтö дядя Женя вöли зэв везучöй, сийö жö Тойнаса... Вермас лоны, эжовса чери японскöй жилкатö эз примит.

Г.Бутырева: Сиктын вöли сöмын öти вуграсьысь нывбаба, Клавдей баб.

Висьтавлісны, коркö пö овлöма кутшöмкö манастырын, а сэки оліс Лязюв сиктын, пониньдзи* керкаын.

Лязюв помас, көні Вашка матöдчыштö сиктланьыс, векджык и вуграсис. Асьсö пö тай, шулісны, черинад век вердлöма. А мужичöйяс пöвстын вуграсьысьыд эз уна вöвлы. Öти-кö, некор налы, а мөд-кö, найö сетьöнджык вöдитчисны.

Но Савватий Григорьевич, миян математик, нэмсö сöмын вугыр шайтөн кыйсис. Видзöдан, а бара нин Табъяг помын дөввидзö. Чайта, вердіс жö семья-котырсö. Енмыс тай сетлöма терпеннö.

Шоныдін да югыдін чери кыйысьяслы, важөн нин Табъяг вылын ставныс...

И менам бать, и Клавдей баб, и Савватий Григорьевич...

Е.Козлов: 1967 воын сотчис дедовскöй керканым. Мыйта бур казтылөм коли сы йылысь. Төвйим Домна Галина керкаын. Мөд во тулыснас босьтчисны лэптыны выльöс. Коръяскö



ми челядь чукөрөн пыравлім сэтчö, видзöдін, кызди Эжовса том йöз ноксьöны-керасьöны, любуйтчим еджыд стенъяснас да югыд öшиньяснас.

Гожöмнас миянöс став вит морта классөн нулісны пионер-лагерö, вöли Казлук посёлөкө восьтöмаось, вöвлөм зона баракъясö. А локтیم смена помас... Помнита, Попкерөс улö сувтіс пароходным: гожея вой, мича поводдя. А крут кыр йылас дядя Юрик машина дорын сулалö да öвтчö миянлы. Воим деревняö, машинаысь чеччи да понді котöртны Домна Галина керкалань, но дядя Юрик горөдіс: «Тэ, детинаö, пыр гортад...»

* Пони (диал.) — ичöt.

Пыри, а сәни йёзыс! Став рөдня воомаоь новоселье вылө. Кут-лалисны да окалисны, сәсся пыри пытшкөс комлатө, чой-вок сәни пукалисны. Юкси аскөд вайөм печенньо-кампетөн. Сөйыштим и петим ывлаө. Тадзи заводитчис выль олөм. Выль керка дорө нёжйөникөн велалим, корсим аслыным «гуся пельөсыяс». Гожөмнас узылим йирк вылын — сёр рытөдз кывзим лэбачлысь дзользьөм, а водз асывнас садьмөдлис керка вевтө шарөдчысь зэр шы. Да, лөсьыд кад вөли!

Г.Бутырева: Ми нин во кык олөм выль керкаын, кор бать босьтчис содтөд сарай да сы бердө кык пони жыртор пуктыны...

Сэк жө и бур, мича сод вөчис йирт вылас, и ме пыр жө овмөдчи сэтчө. Номйысь мамө лөсьөдис вон, сетисны шонид вольпась да шебрас, и став төдса челядь завидьтисны меным.



Узыны водтөдз дыркодь на кыйөдчи сикт кузя ветлысь-мунысь ныв-зон бөрся: кодкөдъя менам Вадим вокыс талун прөйдитчас?

О!— абу тай быттө төрытъя нылыскөд...

Мукөддырйи аслам «пост» вылам и вугырта. Коркө и шонди петтөдз... Öни на шензя: кызкө тай абу жө усьлөмө дзик штен дорас узылигад, крышатөм на сарай весьтас...

А мамө вөли полө, сы понда, дерт, видчө. Коркө... Öдва на кок вылө сувтсьөмө, мамөлөн вала петигкості öшиньөд «лэччөмө»...

Бур, мый ыджыд пальтоа вөлөмө, небыдджык лоөма му бердас шлопнитчөмыс...

Е.Козлов: Миян öшинь улын, кызди помнита, век вөли качай. Матигөгөрсьыс став челядьыс волисны качайтчыны. Коркө Валя Бызовакөд качайтчим. Вөли зөв популярной сылан: «Мама, милая мама...» Качайтчам и сылам. И друг аддза: мама пышйөн локтө ва дорысь көлуй тазья, Столля баб дорсянь на горзө: «Мый лой? Мый лой?»— «Нинөм эз ло, мама, ми сы-

лам». Мөдысь коркө сийö качай вылас качайтчисны кык Саш: менам вок да Саша Миронов. Гезыйс ори, öтикыс — öти столбъяс кымöснас лукасис, мөдыс — мөдас. Збыль ёна доймисны. Но пыр жö кодкө вайис выль гез. И водзö качайтчыны... Коркө Авелина муно лавкаö. Крепыд ён нывка. Киас сетка. А сеткаас көшелёк. Пока лавкаыс абу восьса, сылы тшöтш лои окота качайтчыштны. Сэтшöма öдздöдчисны — кор нин Авелина лои небесаас, көшелёкыс воссис... Вөлöмкө, сәни тырыс посни деньга. Ставыс этадз карсис. Ми уськөдчим чукөртны. Турун сорнас и ставнас чукөртим, мый вермим. Авелина бөрдö, а ми уялам да чукөртам сылысь деньгасö. Сысянь коли ветымын во, а деньгаыс, көпейка ли две көпейки, пыр на шедавлö.

Г.Бутырева: Зэв көдзыд төвся рыгъясын, кор бать-мам кытчөкө кутшöмкө мөгөн петöмны, а тэ на ичöt и тэ керкаад дзик öтнад, весиг радио оз шыав... Би ни ва... А пемыд нин... И друг! Став керкаас быд кер быттьö ритша-ратшакывны пондас!.. Быттьö потласöны керъясыс... Дзикөдз кө потасны? — сэтшöма зэлöдöма көдзыдыс...

Весиг повзъыштан и. Чеччан, öзтан би, включитан радио-приёмник и со — тэ нин абу öтнад, тэ нин кывзан сёлöмтö чепöльтысь кутшöмкө музыка, а помассяс музыкаыс и нэм кежлö кольöны паметяд дикторлөн кывъясыс: «Вы слушали «Баркаролу» из фортепианного концерта Петра Чайковского «Времена года»...

Е.Козлов: Коркө öтчыд куси би. Мыйлакө друг окота лои юны тшай. Ломтисны көрт пач. Кыдзи тшөкыда овлö ыджыд семьяын — ва бакыс тыртöм. Корсисны ведра, папа тшөктис меным петавны вала. Кималасөн лэччи кильчö содъясöд, вои труба дорөдз. Лэпти ва, ньöжйөнникөн пырти. Пуктим пузьöдны көрт пач вылö. Кутшöмкө здукö биыс бөр öзийс. Вөлөмакө, васö пыртны папа сетöма песок видзан ведра. Но, сідзкө, чайтö пö талун позьö песокавтöг юны. Сийö кадсяньыс миян трубаын ваыс лои чөскыд. Либö сідз кажитчис. Ставөн тай воylvлисны миян трубаысь ва босътны-а.

Г.Бутырева: Радио миян сиктö воис сёрөнкодъ нин. Электричество эз на вöv. А радиоаппаратураыс вермис уджавны сöмын электричество отсөгөн.

И мый? Шуисны сувтöдны джуджыд стöлб вылö пропеллер, кодi и сетас электроэнергиясö аккумуляторной батареялы, а сы отсөгөн радиоаппаратура йитас миянös став мирыскöд!..

Менам и öни на син водзын, кыдзи став сиктыс сувтöдчи тайö пропеллера стöлбсö...

Гашкө, век на сулалö...

Е.Козлов: Дзöлядырйи ме зэв ёна вöли радейта ветлывлыны дед-баб ордö. Пуксьылам пызан саяс, чай юыштам и кодкө юалас: «Бабö, позьö йирк вылад калыны?» А сәни вöли... ящикын дюшес кампет кышъяс, и главнойыс — журнал стопаяс: «Семья и школа», «Новый мир», «Крокодил», «Мурзилка», «Войвыв кодзув». Бабъяс ордын олiс том учительша, Маиса Ивановна. Ёнджыкасö тайö вöли сылөн архивыс. Весиг сэк, кор ме вöли ыджыд классын велөдча, вöзйысьлi йирк вылас. Сән сынöдыс вöли аслыспөлös. Пукся öшинь водзас, листала журналъяс, а öшинь пырыс тыдалö, кыдзи ветлөдлöны

сиктса войтыр, кылö, мый сёрнитöны, и чайтсьö: тадзи вöлі нэм, и тадзи лоö нэм.

Г.Бутырева: Коркö пони дырйи сиктса клубын видзöдiм «Молодая гвардия» кино.

Зэв дыр ме чайтi та бöрын, мый радионын гимнсьö найö жö сьылöны... киноса молодогвардеечьясыс.

Е.Козлов: Кутшöмкö кадъясьö, медся нин арланьыс, би вöлі частö кусласьö. Ми, дерт, шöйöвошлам. Кутшöмкö здукö баб петалас керка водзас, пыртас лампа, биасяс, ньöжйöникöн биыс босьтас асьыс пространствосö... Кодкö мöдас рисуйтчыны, кодкö книга босьтас, Пантиль дед камодсьыс кыскас дöветь (шегьяс) мешöчок, и дзюляджык чой-вок пондасны сiйöн ворсны. Быдöн аслас могөн ноксьö.

Кутшöмкö здукö керка пытшкöсьыс друг кылам пельтö чунöдана лöньсö: кызди пöсьйив улын баблөн сюранныс рöмидзтö, кызди ывлаас тöлыс шыалö, а кöнкö вичко горйын гулюяс



кургöны. И кутшöмкö здукö кылас гөгөрвотöм шы: быттö кодкö пöльтö жöч пöлянö. Ми весиг повзыштам вöлі да юалам Пантиль дедлысь: «Тайö мый?» А сiйö нюмъевтас да шуас: «Тайö андельясыс тутсöны».

Кор эм югыд биыс, тайö шыяссö он казаяв, весиг сиктын.

Г.Бутырева: Ыджыд, ён, пашкыр тошка – быттö Пера багатыр...

Тудри дед. Кöджысь. Воывліс Йöртымдiнö ыджыдсьыс-ыджыд пыжөн. Ваяс кутшöмкö коланаторьяс, коркö грузтöг, а бөр нуас быдпöлөс тöварсö аслас «баркасөн»... Пөгöстсянь Йöртымдiнöдз ва кузя сёсыс унджык километра, а колö и катны, и кывтны...

Кор школаын урок дырйи висьталi, мый тöдса Пера-багатыркöд, чайта, эг ёна и содты нинöм...

Е.Козлов: Миян вöлі лампöвöй приёмник «Рекорд». Челядьдырысь медся ёна сiйö запомнитчис. Помнита, 1965 либö 1966-öд во, декабр 31-öд лун. Папа миянös водтöдiс джоджö вольсалöм вольпасьö. Кутшöмкö здукö включитiс приёмниксьö, бергöдліс,

бергөдлис и шуис: «Талун мөдам виччысыны поздравление!» Синмыд нин лызъялө, а окота кывны поздравлениетө. И со, коркө кылис Сöветскöй Союзлөн гимн, сэсса дикторыс чолөмалис Виль воөн. А папа шуис миянлы: «Но, сэсса верманнид узьны». И вöли сэтшөм лөсьыд. Чöскыда унмовсим.

Г.Бутырева: Шоньд тувсовъя лун, мам öшинь восьтöма нин... керканым быттö парокод, сийöс гөгөрбок ытва кытшов-



тöма. Льöм пу сайсянь петкөдчö пыжа. Ыджыд тушаа, дзор юрсиа морт пыж шöрас, сулалö-зымвидзö, миянлань сынö.

Тайö Василий Константинович Крюков, сиктса фельдшер. Батьлөн друг. Локтö бать дорö — гажтөмтчöма, тыдалö.

Е.Козлов: Кор пырим школаö, Виль во водзын Нина Егорьевна сетис задание — вöчавны ёлка вылö чачаяс. Арбыд вöчалим. Кабалаысь вундам кöчлысь либö черилысь мыгөр. Кыкöс. Костас пуктан вата, кык мыгöрсö дортыс мичаа вурам либö пуом картупельён клеитам, а сэсса эзысь краскаөн мавтам. Сунисысь вöчам кöлыс и öшöдам косьтыны. Косьмөм бöрас чачаяснымöс торжественнöя öшлам ёлка вылö. А радыс! Саня Туркиналөн ыджыд чойыс вöли уджалö уборщицаөн. Öтчид сийö шуö: «Тöрыт локтi школаö сёрөнджык пач ломтыны, а тiян кöчьясыд да ошъясыд сёрнитöны ас костаныс». Ми збыль эским. Сэки сиктад вöли збыль на мойдын кодь олöмыс, медся нин миянлы, посниуловлы.

Г.Бутырева: Дивъя жö, кодлөн и ыджыд да джуджыд сарайяс. Быд тулыс качайла позьö öшөдны. Ас качайла вылад коть лунтыр качайтчы.

Миян сарай эз вöv, да и качайтчынытö ме эг вермы — юрöй вöли кольмö. Векджык көнкö бокын пукала, видзöда ныв-зонлысь качайтчöмсö, завидьта. Лэбалöны сарай горйын, тökөтьö йиртас оз зурасылыны... Нывъяс сöмын и чивöстласны...

Öтчид зонъяс сэтшöма öдöбтöмны качайласö — абу казавлöмаöсь, кызди Калинин Коляöс кытчökö пöv помсыс лэбзьöдöма-нуöма...

Лэччисны, а Коля абу. «Кöни нö Коляыс?!»

Здук-мöд мысти кыскö сарай горулысь кодкö шыасис: «Лэп-тöй менö...»

Коля?! Коля... шувкнитöма-лэбöма качайла вывсынь мös гидö... Бур на, везитöма — веськыда турун сеталан розяс инмöма, весиг повзыны абу удитöма... Слабог, абу доймöма ни.

Е.Козлов: О, көрт пач!.. Кымын төвся рыт сы дорын коллявлім: пач ыргөмөн ломтысьö, сэся ваймыштö. Гөлбöчысь петкöдам лук да морков, öгыр вылас пöжалам да пöттöдз чöсма-сям... Воронежскöй обласьтысь волас тетя Зина и быть ваяс некымын мешöк семечки. Тöвбыд жаритам көрт пач вылас да клотшкам телевизор водзын... А кор би куслö, ладмöдчам пач вом дорас да урокъяс вöчам. Көрт пачыд сійö — да-а-а!

Г.Бутырева: Тöвнас öдйö пемдö, а электрическöй битö сиктын вöли сетасны кор көсьясны... И кутшöмкö кадколаст ковмывлö пукавны «галанка» пач дорын, кытчöдз пескыс оз сотчы: тан югыдкодъ, позьö весиг лыддысьны...

Бать-мам рöбитöны сёр рытöдз, и гортын ме векджык öт-нам. Весиг радио чöv олö, электрическöй öд сійö...

А ывла вылын чöv-лөнъ. Сöмын коркö струба дорö волысьяс клөнöдчыштасны куш ведраяснас, дзуртыштасны, ва лэптасны...

И бара кыз чöv-лөнъ усьö.

Но öзьясны электрическöй лампочкаяс, öдöбсяс важ радио-приёмникным, заводитас рочөн мыйкö муркöдны-висьтавны ли сьывны...

И ставыс вежсяс. Быттö выль лун пуксяс...

Снимокъяс вылын:

1. Г.Бутыревалөн мамыс, Вера Александровна (Сан Вера), ичöt Галя, Вадим вокыс.

2. Г.Бутыревалөн батьыс, Василий Васильевич (Василь Вась).

3. Важ Эжва Эжов сиктсынь видзöдигөн.

4. Козловъяслөн семья (шуйгаладорсянь): мамыс, Руфина Фёдоровна; батьыс, Валериан Иванович; Саша пиыс; бабыс, Анфиса Максимовна. Евгений Козловöс виччысьöны нин. 1960 во, май тöлысь.

5. Йöртымдінын Бутыревъяслөн керкаыс.

6. Пантиль дед (Миронов Пантелеймон Иванович) да Анфиса Максимовна.

7. Йöртымдін. Сиктса фотограф дорын. Галя Бутырева сулалö мышкас.

Снимокъясыс авторъяслөн гортса архивъясысь да Интернетысь.



Иван НОГИЕВ



Менам пиукыс, менам...

П О В Е С Т

— Луд выlö, луд выlö, Сюрук, луд выlö,— мөссө небыдика шлачкөдигтырйи, вöсньыдик ньöрйыс сы мышкө инмө нисьö оз, жаль öд аслад видзанторйыд, Петыр Наста вöтлiс картасьыс вöсьтöм дзирьяöд кукья-мөскасö.

— Йирсьöй лöсьыда, дитяяс!

Сюрук петiс йöрысь зэр бöрын прамöя нйитчöм туй выlö, кыпöдiс кузь сюрьяса юрсö вывлань, гонькнитлiс öтарö, видзöдлiс мöдарö да гораа бакöстiс. Сылы пыр жö вочавидзисны некымын мöс, найöс сиктса детинкаяс вöтлiсны Настаяслöн öшинь увтi сикт сайö, кöни Сöвет кадö вöлины первой колхозлöн, а бöрынджык совхозлöн муяс: вöдитлiсны нянь, пуктылiсны картупель, а öнi эновтöминас вежöдысь турунсö вазöдö-пöдтö этшсö тöдтöм, яйтö сотысь сой кыза борщевик. Сюрук пыркнитiс юрнас да кок увсьыс мичаджык гöрд бобöняньяс йирышталiг тэрмасьтöг шлапиктiс мöс чукöрлань, а сьöда-едждыда куканьыс, дженьыдик бöжнас öвтчитгырйи, тринькйис мамыс бöрся.

Эз на тай лэдзчысь Наста мөскысь-а, кöть эськö сиктсаяс зэв нин этшаön öнi скöттö видзöны. Öкмысдасöд воясö, кор Горбачёвлöн ыджыд öдöбтöмысь тöлкыс эз ло, артмис сöмын сконйыштчöм да Сöветскöй Союзлöн киссьöм, олöмыс дзикöдз топöдiс уджалысь йöзтö; сэки ноксыны вермысьяс уськöдчисны ёнмöдны ас овмöс, вöдитны ыджыд градьяс, лöсьöдалiсны мөсьяс. А мыйön олöмыс вочасөн бөр кокнялiс да кос вöньяс элалiсны, том йöзыд регыдөн и эновтчалiсны скöт видзöмсьыд, öдйö дышмисны. Эз убöлитны лэдзчысьны асланыс тайтöясысь сöмын олöма йöз. Со и Петыр Насталөн кызкö сьölöмыс оз лэпты скöттöгыд овны, öд ичötсяньыс накöд ноксис — первой гортас, а эссся совхозса фермаын лысьтысигөн. Дас класс помалiс да водзö велöдчыны эз мун, шуис, тырмас пö, сiдз нин сюсь, пырис удж выlö да кызь арöсөн петiс Гриша Миколай сайö. Верöсыс совхозын жö трактористалiс. Том гозьялы пыр и вичмис торья керка. Сэки совхозыд вöли зэв на озыр, сьöмсьыд эз орлыв,

стрөйтчысьяслөн дзонь бригада ас уджалысьяслы кыпөдаліс оланінгяс, сиктын налөн быдмис быдса улича, сійөс сідзи Совхознойөн и нимтісны.

Гозья кыкнанныс уджысь эз повлыны, некор весь эз овны, нинөмысь эз лэдзчысьлыны. Миколай техниканад ноксыны радейтіс, тракторыд пыр вөлі ас киас. Сёрөнджык лөсьөдіс и «Жигули», кор ковмас кытчөкө ветлыны, вөранны ли, чери кыыштны ли, оз нин ков йөзлы копрасьны.

Совхоз киссигөн гозья мукөд войтырыскөд тшөтш кык во на уджалісны, көть уджон эз нин аддзывлыны, век надейтчисны олөм ладмөм вылө. Но лачаыс налөн эз збыльмы, ыджыд да ён совхоз вочасөн руз-пазмуніс. Томджык войтыр коді кытчө раздчалісны, а Миколай да Наста, арлыдныс судзсис нин да, петісны пенсия вылө.

Гозья чужтісны-быдтісны анделгяс кодь кык мича нылөс да өти пиөс. Мича нывгясыд корасысьясөс эз дыр виччысьны, регыдөн сёрсьөн-бёрсьөн и шунькнитісны верөс сайө. Медыджыдыс, Саньө, өні семьянас карын олө, а ичөтджыкыс, Галя, ас сиктө вужгясис.

Денис вөлі дыр виччысяна да та вөсна медся радейтана кагаөн, кыз йөзыс шмонитлісны, Наста-а-Миколайлөн пө кураскарасыс. Зон ичөтдырсянныс сьөлөм потмөныс радейтіс Олеш Натальысь Светланаө. Но ныв мыйлакө веськодя видзөдіс сы вылө, школа помалөм бөрын недыр кольбөдчис Митрей Иван Володькөд да сысянь и вайис чурка нылөс. Та вылө видзөдтөг, армияысь воөм Денис дась вөлі өтлаасыны Светакөд, но нывыштис Пасаельысь зарни погона опичер вылө да шунгыс ськөд кытчөкө ылө-ылө, дзик му помасянінас. Но сэні мыйкө налөн абу гөрэдзасьөма, да нывлы ковмис мыжа кычан моз бөжсө люньгыртны да бөр локны гортас, мамыс борд улө.

Светалөн ылі муө мунөм бөрын Денис гөгөрвоис: нинөмла вөтлысьны мичаяс бөрся, прөстөй нывгясыс шогмасныджык сылы. Отчыд кольбөдіс Маша Турьеваөс кильчө дорөдзыс да дыр мөжгытөг и вөзйис өтлаасыны. Нывка весиг шемөсмыліс, некызди эз куж виччысьны Денислысь татшөм тэрыблунтө да, но некымын лун мысти сетіс зонлы ныылыдана кыв. Ставсө морт ногөн артыштөмөн ныв да зон и гижсисны. Первой кад кежлас том гозья овмөдчисны Денис пөльлөн важ керкаын. Керкаыслысь отар джынсө пилитісны пес вылө да идралісны, мед сы пыдди кыпөдны вьльөс. Öні срубйыс вевт улын нин, гоз-мөд во сулалас вөчтөг, мед бура пуксяс, а сэсся Денис батыскөд отвылысь воөдасны стрөйбасө помөдз. Стрөйтчөм вылө босьтісны ссуда, а мед нажөвитны сьөм да ас кадө вештыны уджйөзсө, банкыд өд шмонитны оз радейт, Денис медасис мөд районө вахтаөн уджавны, вөр пөрөдны, да вөйдөрлун автобусөн гурөдіс сэтчө.

«Мый бара-й, монгыс өні өтнасөн вөчө-а, чеччис жө өд нин?»— Петыр Наста гонькнитліс улич пөлөн веськыдвылө, көні сулаліс Денис пиыслөн неважөн на лэптөм вьль керка срубыс да сьөлөмыс лөкногөн ёнтыштис: айкаыслөн важиник кильчө дорын Маша монгыс сулаліс карсаяс моз пасьтасьөм төдтөм айловкөд. Насталөн кокгясыс сідзи и измисны: «Тайө нө мый? Сөмын на вөйдөрлун асыв Маша кольбөдіс верөссө куим төлысь кежлө,

а кодкө грекыс гортөдзыс йөз мужикөс нин вайөдөма!»— визь-нитіс юрас мисьтөм мөвп. Зіля топөдчыштис потшөс сюръя бердө, мед моньыс оз казьяв, весьөпөрөм синъяссө шармөдіс да сюся мөдіс кыйөдчыны. А том йөз сулалөны, мый йылыськө ызгөны-сералөны. Потшөс дорас донапөлөс сьод машина тутвидзө, дерт, локтысь мортыслөн, көнкө. Медбөрын некодысь повтөг, йөз син водзын, кутчысьлісны да торйөдчисны; төдтөм мортыс пуксис кабинаас, машина мигнитіс югыд бугыльяснас, кузя тутөстис да шурөдіс туй кузя. А Маша, яндысьтөм синмыд, нюмъялігтырйи сулыштис на, өвтыштис кинас, надзөникөн бергөдчис да катласиг-тырйи пырис керкаас.

Квайт во нин тыри Денислөн да Машалөн өглаасьөмсянь, сизимөд вылө вуджис, тайө каднас Маша удитіс помавны медицинскөй колледж да нельөд во уджалө юрсиктса бурдөдчанінын. А вот кага бөрдөм шы том гозьялөн оланінын эз на кывлы, Настаөн водзвыв лөсьөдлөм потаныс век на лөскын кушөн асьыс кадсө виччысьө да буссьө. Первой вояссө, дерт, гозья видзчысисны, полісны, мед эськө ичөт мортыд оз торк Машалысь велөдчөмсө, диплом босьтөм, да уджө кутчысьөм бөрас сөмын мөдісны виччысьны кага чужөм. Но нель во сы бөрын коли, а том гозьялөн, кыз шуласны, кага ни баля.

Машаөс некымынысь зэв бура видлавлісны ас уджаланінас, но некутшөм висьөм, коді эськө потшис туйсө кага артмөмлы, эз аддзыны. Сідзкө, мыжанас вөлі Денис. Ставыс сувтис асінас, кор гөтырыс помсянь помөдз лыддис верөсыслөн медицина карточкаысь врачьяслысь мукөд йөзлы гөгөрвотөм чукуль-мукульяса гижөдьяссө да вөлисти төдмаліс помкасө. Вөлөмкө, ичөтдырйиыс Денис висьлөма свинкаөн. А Маша, дерт, төдтөг эз ов, мый айловъяслөн, кодьяс водзті нөрпавлісны тайө висьөмнас, тшөкыда оз вермы лоны челядь.

Тайө выльторйыс чужтис том ань сьөлөмын ыджыд майшасьөм да шог. Кодды нө кажитчас, кор тэнад некор оз чужлы кага? То став нывьөртъясыс важөн нин мамыасөн лоины, ясли-садьө нывписө новлөдлөны, а Машалөн некод абу, да и, колөкө, некор оз и лолы. Гусьөникөн, кор гортас өтрасөн кольлас, весиг бөрд-лывліс, коть төдө, мый синваыд талы оз отсав. Но ань век жө кутис лача: нинөмла на вывтисө шогсыны, кадыс эм, кыкнанныс Денискөд томөсь; оз кө талун, то аски ичөтик быдтасыд быть чужйыштчас, юөртас мамыслы ас йывсьыс.

Мыйөн сөмын моньыс пырис ас керкаас, шызьөм Наста няйт гуранъяс кытшовталөмөн, мед резина калошияссө ваыс оз гөленяв, тэрыба шавксьөдіс Олеш Наталья дорө. Натальяөн керкаыс сулалө Денисьяслы паныдөн да өшиньөдыс лөсьыда тыдалө, мый керсьө том гозья йөрын. Таркнитіс чунь рөчнас өшинь тасө да, мыйөн серлөдлөм стеклө саяс Наталья мыччөдіс чуймөм чужөмсө, кинас өвтыштис сылы — петав пө кильчө дорас.

— Кывзы, Наталья, ме өні аддзылі, кызди Денисьяслөн керка дорын Маша моньным кутшөмкө карса манера зонкөд сулаліс, дыр мый йылыськө сёрнитісны, а сэсся том мортыд пуксис машинаө да журөдіс кытчөкө. Тэ эн казьявлы?

— Да кыс нө он казьяв? Зэв лөсьыда аддзылі! Асывнас чеччи, ноксьышти, пач ломті да мый да, сэсся картупель весавны пукси өшинь дорө, а сэні, видзөда да, кодлөнкө югьялысь маши-

на сулалё. Кодлөн, мися, и эм татшом мичаыс-а? Керкаын ноксигөн син улысь сідзи эг и воштыв машинасё. Телепит, тōдмавны колё, коді нин локтōма Маша дорас? А сэссия, видзōда да, тōдтōм, лōсьыда пасьтасьōм том морткōд петісны гортсьыс, сёрнитыштісны недыр, кутчысьлісны весиг, да мортыд машинанас и жургис кывтыдлань. Сы мында и тōда.

Петыр Наста сюся, мед ни ōти кыв оз коль да суседкаыслөн висьталōмысь ставсō гōгōрвоас, кывзіс Натальōс ловшысō кутōмōн.

— Сідзкō, локтōмсō эн аддзыв, а асывнас бōр мунōмсō сōмын? Эн сорсьы?

— Кыдз нō сорсян? Ме мый аддзылі, сійō и висьтала, нинōм эг содты ни чинты.

— Аминьōй, аминьōй, мый нō тайō Машаыс керсьō?— Наста пōрччис юр вывсьыс чышгъяснō, чышкалыштіс пōсялōм чужōмсō да сынанōн шылькнитіс дзугсьōм юрсисō.— Тэ, Натальō, некодлы жō нинōм, бара-й, эн бызнит, мед сиктсаяс костын мисьтōм сёрни Маша монь йылысь оз кыпты. Он ōд?

— Метō, эськō, ог да, мый ме кута вōлōсьт пасьтала лēк сёрни разōдны. Но ōд эз этшаōн аддзывны, кутшōм мича машина на ōшинь улын сулаліс...

— Но ме, сідзкō, муна,— жуысь мōвпгъяснōн тырōм юрсō дзōрōдиг Петыр Наста лэччис Наталь кильчō вылысь да гōрбыльтчыштōмōн косіс гортланьыс.

Тайō нō Машаыс мый керсьō?! Мыйōн сійō думайтō?! Ачыс бытгьō велōдчōм морт, видзōдōмпырысь абу ызы-базы кодь, а ловъя верōс дырйи мōвпыштōма йōз мужикъясōс гортас сибōдлыны! Вот и дивō!

Петыр Наста, дерт, ставсō, мый вōчсис пиыслөн семьяын, бура тōдіс, сыысь нинōм он дзєб. И со, муртса на Денис муніс гортсьыс, а Маша ордō пырōма нин гōсьт! И кутшōм гōсьт! Том мужик! Татшōм ногōн али мый мōвпыштōма лōсьōдны аслыс кага, мед Денис, да и мукōд йōзыс нинōм оз гōгōрвоны да кад серти ставыс буретша лōсялас? Тайō кō збыль сідзи, то гусьōн пурысь пон кодьōн тай вōлōма Маша! Но и моньōс Петыр Насталы вайōдіс Денис! А йōз сёрниыд быть кыптас! Ёна и кєсласны пиньяссō єсь кывъя сиктса бабаясыд! Сōмын тайō налōн семья вывті эз на мунлы!

Вōтын моз ань идраліс картаысь куйōд, шыблаліс гидня бокō пес, мед сэні куйлас да вочаснōн ломтасны, сэссия пōрччис поспомын няйт калошисō, тяпиасис да пырис гортас.

— Миколай!— порог дорсянныс на сингъяссō сувтōдōмōн дōжныштіс верōсыслы.— Тэ тōдан, Маша монь ордын тавой кутшōмкō мужик узьōма! Ме весиг ог тōд, мый и думайтны та бōрын,— да шлапкис кияснас Петыр Наста.

Гриша Микол ōчкиасьōмōн буретш дōмліс важысла розьясьлōм ноп мешōксō, лōсьōдчис арся кыйсьōм кежлō. Сійō лэптіс ōчкисō плєш вылас, кыпōдіс дзормыны заводитысь юрсō да сюся видзōдліс гōтырыслань:

— Маша дорын мужик узьōма? А тэ нō кысь тōдан?

— Кысь тōда!? Аслам синмōн аддзылі! Дзирья дорсянъ видзōді, кыдзи Маша кольбōдіс сійōс; сулалісны кильчō дорас, сёрнитісны да весиг кутчысьлісны, а сэссия мортыс машинаас пуксис

да гурөдіс кывтыдлань. Эг дышөдчы да Өлеш Натальысь весиг юази, сійө висьталіс, мый мужикыслысь машинанас локтөмсө абу аддзылөма, сөмын асывнас чеччөм бөрас казьялөма. Маша дорад, буракө, и узьөма! Вот!— сатшкис синъяссө Петыр Наста верөс вылас, виччысис сылысь пузьөм.

— Кысь төдан, мый сы ордын узьөма?— вештіс ас дорсыс вурсянсө Гриша Микол.— А тэ, дерт, удитін нин сикт кузя паськөдны нинөм абусө?

— Ме паськөді?! Ме Өлеш Натальысь сөмын и юалі да сод-төд өлөді на, мед сы вомысь водзө нинөм оз пет!

— Сэсса, чайтан, дзик некод эз и казьяв?

— А мый водзө лоас, кысь ме верма төдны? Абу өд тун! Но Машаыслы кыз абу яндзим?!

— Да нинөм эз и вөв, важ төдсаыс тшук кежаліс миян сик-тө да-й пыраліс видлігмоз. Тани некутшөм лёктор абу! А тэнад, йөйлөн, юрид водзвыв нин висьмөма,— дөзмөпырысь чөвтис верөсыс.

— Кыдзи немтор абу, кор мужик да баба өти вежөсын вой-быд узисны. Ачыд мөвпыштлы, мый сэні вермис лоны!

— А кысь тэ төдан, мый найө отлаын узисны? Сись кутін али мый?

— Ме сідз чайта.

— Чайтөмыд абу на збылысь төдөм. Водз асывнас, тшук, и локтис төдсаыс да пыраліс муртса кежлө. Пукуштісны, сёр-нитыштісны, сэсса мортыд водзө тюрис. А тэ нинөм төдтөг зык нин лэптан!

Микол нөшта виддалыштіс ноп волюсьясыслысь топыдлунсө, гөгөрбок малаліс, идраліс ем-сунис да чеччис пызан сайысь.

— Көть мед мый, а Маша, ме думысь, лёктор вылад эз пет. Абу сійө сэтшөм-татшөм семьяысь, да и асьсө кутны кужө! Миян сійө зэв вежавидзысь монь.

— Но некызди ме ог вермы гөгөрвоны,— водзө ропкис гө-тырыс.— Верөсыс муртса на муніс, а кык лун мысти бокөвөй мужик локтис да пырис өтка нывбаба дорад. Зэв тай лөсыд! Асывнас менам син водзын бур моньным колльөдіс сійөс дзиръя дорөдзыс да нөшта на и кутліс! Ас синмөн өд аддзылі! Ас син-мөн!

Микол саймовтіс вурсян көлуйсө, петкөдіс дөмөм нопсө пос-водзө, өшөдіс тувйө да бөр пырис керкаас. Наста ваяліс пызан вылө сөян-юан, шөраліс нянь да пуксис.

— Сө дивө тай,— некыз эз вермы лөньөдны асьсө олөма ань.— Денисыд сы шөрө водзө кодкө куляс најөвитчыны муніс ий. Тадзи кө овны заводитіс, йөз син водзын верөс дорсыс гу-ляйтны, водзө мый лоас?

— Вай дугды нин өтиторсө дыдгыны!— вомаліс гөтырсө Гриша Микол.— Йөзө котралөм дорысь бурджык вөлі аслыд пыравны Маша дорад да веськыда юавны, узис эз кодкө сы ордын, сэт-шөма кө нин вирыд пузис. Колөкө, рөдня кутшөмкө вөлі? А тэ зык лэптан! Сөй вай да чөв олышт.

Гозья кыкнанныс ланьтісны да чөла паняисны. Но Насталөн полошуйтчөм сьөлөмыс некызди эз көсйи өвсыны, весиг кыис дзөрис, паньсыс шыдыс отарө киськасис пызан вылас, а юрас дугдывтөг бергалісны да нөйтчисны мисьтөмджык и мисьтөм-джык мөвпгьяс.

Гриша Микол көть и дорйис моньсö, но век жö и сылы эз ло лöсьыд Насталöн висътасьöм бöрын. Öтарсянь кө видзöдлыны, Маша öд, буракö, абу дзик йöй, мед сиктсаяс син водзын корлыны ли, вайöдлыны ли гортас йöз айловöс. Та выlö кө аньыд петас, то сэки ставсö зильöны вöчны гусьöн, мед некод нинöм оз аддзыв ни оз кывлы. Пемыд войнас, некодöн тöдлытöг, öшинь тасад таркнитас айловыд, аньыд öдзöснас дзуркниттöг лэдзас сийöс керкаас, а бöрыннас, югдытöдзыс на, бара жö ни öти мортöн аддзывлытöг войся гöсьтыд пемыдас вошас. И гөгөр лөнъ. А тані синмö шыбитчана мича машинаöн Маша ордö локтис, пырис, да сёрникöн асывнас, мöсьясöс лудö лэдзалан кадö, утөвтис-мунис. Некодусь дзебсясьтöг, восьсөн. Сидзкö, позьö стöча шуны, мый некутшöм лёктор эня-ая костын эз вöв.

А видзöдлыны кө мöдарсянь, колöкö, и вöли. А вöчисны ставсö восьсөн, мед петкöдлыны йöзыслы, быттö нинöм найöс оз йит, эз öд тай дзебсясьны. Мун да и тöд, кыдзи збыльвылас!

Öтигор аслыс топыда тшупыштис Микол: моньыскöд паныдасигъясөн асьсö колö кутны сидзи, быттö нинöм эз и казьяв... Денис да Маша, том гозъяыд, асьныс тöдöны, кыдзи овны, налөн асланыс семья, и на костö ныр суйны нинöмла. Пиыслы, дерт, кывсяс тайö лоöмтор йывсьыс, йöз вомтö желльöн он тасав, пырысь-пыр и брöлькнитасны. Миколлы да Насталы сöмын ковмас быд ногыс видзны писö, мед эськö скөрвывсьыд некутшöм лёктор эз вöч. Денис, буракö, абу вывти вежöг да, лабутнöй сидзсö, но он öд тöд, мый лоö сыкöд татшöм лоöмтортö кывлöм бöрын. Но медводз, дерт, ковмас Машаыскöд лöсьыда сёрнитлыны.

— Эй, мужик! Тэ кодарö мöдöдчин?— пыркöдис кодкö пель-помöдыс чöскыда унмовсьöм Денисöс.

— А?— мöдыс кыпöдис юрсö, восьтит синъяссö да видзöдлит садьмöдчысь выlö.

«Дöсадитчыны сэни кутис, некодарö оз вешйы ни! Мый сылы колö мясянь?»— визьнитис юрас мöвп. Ньöти эз вöв окота палöдчыны, эновтчыны мича вöтсьыс.

— Кытчö, мися, мунан?

— Машук дорö.

— Но-о! Машук дорö, сидзкö?— гөгөрвоана довкнитис юрнас морт.— А Машукад нö кöни олö?

— Гортын эськö да...

— Но, а гортыд кöни?

— Кыдзи кöни? Веждінын!

— Сидзкö тай воöмыд, чеччы вай. Ме нин чайти, мый узигкостыд асьыд сикттö бөрö колин.

Денис кыпöдис юрсö, тильыштис синъяссö, видзöдлит гөгөрбок да аддзис, мый вöлөмкö, пукалö öтнас куш автобусын.

— Но! Збыль тай гортö нин восьöма! А тэ коді?

— Ме автобуса шоперыс. Видзöда да, дялянка шöрын джуджыд сус пу моз öтнад кольöмыд. Ковмис садьмöдны, көть эськö верми и бөр карö гурöдны, мен нö мый?

— Ой, сэтшöм лöсьыда унмовсьлі,— пыркнитис юрнас Денис, суйлис кисö сумкаас, малыштис литраа стеклö банкасö да кокни сьöлөмөн кыпöдчис небыдик пуклöс вывсьыс.

— Аттыё лосьыда вайёмсыд!

— Нинёмысь,— өвтыштчис шопер.— Эг өд прөстө вай, аслад жö сьöмыс.

Денислөн вахта вылын уджалöмыс коли лосьыда, эз доймы вöрад пöрöдчигөн, сьöмөн эз жö дзескöдны. Карын янсöдчис ёртыскöд, кодкöд öтлаын керъясөн муркöдчигөн удитис бура тöдмасьны, автовокзалын лосьыда пукуштитисны, куштисны сизимсё грамма «Путинка» водка доз (кыз нö сытöг?), и автобусö сöлөм бöрын Денис öдйö да чöскыда унмовсис, та вöсна эз и тöдлы, кызди ёна жугласьöм аспальта туйöдыс, кодöс эз на удит шыльöдны енэжсянь коясьысь лымйыс, грунки-гранки воис ас сиктöдз.

Шондiлөн ыргөн тазыйс дзик вөр-пу йывтитис кывтö-келö, ноябр тöлысэд лунъясыд вывти нин дженьыдöсь. Сиктыс еждöма, сöстöммöма, ки вомлöс кыза усьöм лымйыс шебралöма арся няйт мусö, вевтгöма автобус сувтланiнö шыблалöм чигарка помъяс да мукöд ёг. Автобусысь петигөн Денис весиг синсö читкыртлис, виччысьтöг вартысь югыд вылад веськалис да. Ывла кöдзыд вöснаыс морттö пыр жö йирмöг босьтис, мый вöчан, тöv пуксьö.

Шыбитис ыджыд сумкаыслысь кузь воыссö пельпом вылас да веськöдчис гортланныс. Лосьыд жö ас сиктад! Сэни и тани тöдсаяс паныдасьöны, нюмунöмөн чолöмасьöны, кыв-мöдөн шыбитчасны да водзö тэрмасьöны. Тайö тэныд абу карыд, көни кодзувкот мында йöзыс жуёмөн жуöны, некоды тэöдз мог абу. Со помасисны сиктшöрса кык судтаа кирпич стрöйбаяс, мыччысисны йöраныс пес сарайяса, пывсянъяса да гаражъяса ас керкаяс.

— Привет, Денис!— кылис бөрвывсянныс нывбаба гөлöс.

Крута бергöдчис да паныдасис видзöдласнас Света Бузинакöд, кодi ки пöлöдыс Полинасö кутиг катыдланьö жö мöдöдчöма. Полина мыйкö дугдывтöг висьталö и висьталö, тельöдчö мамыскöд, а мöдыслы видзöдөмпырысь дзик веськодь, мый нылыс шуалö.

Водзти кө Светаöс аддзигөн Денислөн сьöлöмыс морöс кудъяс эз кутлы тöрны, сiдзи и жбуткö, сiдзи и жбуткö, то öни весиг эз вөрзъыв. Мөвпыштсис сöмын: «Сетлöма жö Енмыс мортыслы мичлун! А збыльвылас югъялысь бриллиантыд вөлöма прөстöй стеклötөрйөн».

— Бур лун, Света!— вочавидзис Денис, сувтовкерис, виччысьлис нывкöд öтвесьтасьöмсö да лосьöдчис орчөн осьлавны гортланныс.

И мыйла Света пыр вöли сэтшöм веськодьөн Денис дорö? Тшук сы понда, мый ичötдырсянныс век öтлаын быдмисны. Денисöс öд тшöкыда вайывлисны пöль-пöч ордас, кор бать-мамыс эз эштывны, а пöлыслөн да Öлеш Натальён керкаясыс воча сулалöны. Сiдзи лун-лун Денис да Света öтлаын лыа пиын и гудйысьлисны. Ворсигъясад Света Денисöс пыр ыджыд вок пыдди лыддылис. А колö, дерт, мед зонмыд тöдтöмөн вöли, сэки сы дорö ёнджыка кыскö. Оз öд тай прөстө нывъясыд розъясөн öшйыны тöдтöм зон вылад, а сиктса бурлакъяс таысь пыр и зэвтчöны камöдны кыськö бокысь воём морттö. Да, сьöкыд гөгөрвоны анястö...

Армиясыс воём бöрын, кор Света лун-лун гурийöдлис коляс-

каён Крутовён козыналём дзоля кагасё, дзик нин орччён вёлі Денислён шудыс; сэки ныв ёнасё эськё эз и кут петитчыны да сывъяссё паськөдөмөн петіс Денис сайё. Но кыскё рөкыд вылө зонлысь туйсё потшис Пасаельса лейтенантыс да, шудыс сідз мөвпгысын и колис, чуньяс костөдыс исковтіс.

— Уджавсис ылі муясад?— Света аслысногөн, кыдзи кужё сөмын сійё, нюммуніс Денислы, но та дырйи мыйлакё эз петкөдлы еджыд пиньяссё, а мөдарё, тупкыштіс вурун кепыся ки-нас вомсё.

— Да, эштіс өні кежлө, недыр гортын олышта да бара на, колөкө, ветла,— шуыштіс Денис.— А тэ, кывлі, верөс сайё петін?

— Петалі недыр кежлө,— скөрпырысь юрсё дзөрөдыштіс ань.

— А мый, нинөм эз артмы?

— Уркаганыдқод нө мыйкө вермас артмыны! Сэтшөм козёл вөлөма, кутшөмөс сьөкыд весиг аддзынытө. Но ме өд сюсь, ме корси. Төдмасигас быттьө зэв шань мортөн кажитчис-а. Збыль-вылас некытчө шогмытөм алкаш, содтөд тышкасьысь, кокни киа, кык пинь то менсьым чегис, пежыд! А ме сійөс таысь пуксьөді. Повзьөдіс на содтөд, мына пө да кор бөр локта, джагөда тэнö. Та серти кө, овны меным коли кык воысь этшаджык,— жеркнитліс пиньтөм вомнас Света.

— Кутшөм ыджыда нин быдмөма нывкаыд,— сёрнисё ве-жигмоз Денис малыштіс Полинаөс юрөдыс.

— Ми тай быдмам,— нюркнитіс Света да видзчысьтөг бытш-кис Денисөс.— А Мшакөд тьян коркө ныв ли, пи ли лолас оз?

Денисөс парсыштісны тайё кывъясыс, но сійё нинөмөн эз петкөдлы дөзмөмсө, быттьө эз и кывлы ёсь юалөмсө, өтмоза пыр водзө восьлаліс, эз весиг Светалань юрсё бергөдлы.

— Коркө, дерт, лоас жө, челядтьөг овны оз шогмы,— воча-видзис недыр чөв олыштөм мысти.— Но ми өд Машуккөд томөсь на, огө чепсасьөй кодсюрө моз, кадыс оз тэрмөдлы.

— Но оз өд прөстө шуны, коді пө водз чеччө, унджык удитө. А ті тадзнадтө, колөкө, он и төдлөй, кыдз сёрманнды.

— Сёрмынытө ог сёрмөй, миян ставыс планө суйөма,— сө-рыштіс Денис.— Вот выль керкаө вуджам, эштыныджык кутам да сэки нин и кага йылысь думыштчам.

— Мед сөмын мөжгигкостыд гөтырыд тэнсьыд планъястө оз торк-а,— мудера видзөдліс Денис вылө Бузина.

— Мый тэ көсьян тайөн шуны?— весиг сувтовкерис зон.

— Нинөм,— пельпомъяссө топөдліс Света.— Сөмын кор тэ вахта вылад мырсин, Маша дорад төдтөм мужикъяс дона ино-маркаясөн воывлісны да весиг узылісны.

— Мы-ый?! Сөр нинөм абусө!— джөмдыліс места вылас Денис.

— Ме сөра?! Ачым аддзылі, мамө аддзыліс, да и тэнад мамыд тшөтш!

Денислөн сөмын на йөктысь да сьылысь сьөлөмыс здукөн гу-дыртчис. Кыдз нө сідз? Мед сьлөн Маша... Да тайё оз вермы лоны!

— Ёна жө тэ вөлөмыд омөль морт,— бура дыр чөв оліс да медбөрын пычиктіс Денис.— Кодөскө кө кутшөмкө лектор суас, тэ сэки нимкодьыдла чеччавны дась. А меным нөшта коркө зэв ёна кажитчылін, тыпу!— скөрысь сьөлыштіс зон боквыв да өд-дзөдіс воськовсө, колис суклясьысь аньсө мыш саяс.

— Кутшом эм, сэтшом и эм!— бөрвывсянныс нин суөдісны Светалон кывъясыс.— Он кө эскы, верман мамыдлыс юавны!

Со и пöлыслон кадысла сьодасьом да потласьом керъяса керкаыс, кильчө өдзөс томана, өшиньяс пемыдось. Маша, дерт, удж вылын на, рытнас сөмын локтас. Денис босьтис рос, чыш-каліс кильчө вывсьыс да поспомсьыс пуркөшитом лымсө, судзөдіс дзебасыс ключ, восьтис томансө и пырис гортас. Майбыр жө ас керкаыд! Көть кутшом ылі муясө он ветлы, а гортад век на медся лосьыд, шыон татчө кыскө. Со и öні, көть пöлыслон пöрысьмом керкаас нинөм донаторйыс, видзөдөмпырыс, и абу, а воис да быдсөн личалис сьөлөмыс, ыджыд сьөкыд ноп быттьө пельпом вывсьыс пөрччис. Пуктис туйвывса сумкасө паськыд лабич помө да кытшовтөдіс синнас керка пытшкөссө. Ставыс пыр на сідзи, кыдзи и кольліс куим төлыс сайын, нинөм абу и вежсьома. Паськыд паччөра ыджыд пусян пач, полать, гөбөч выв, сёръяс, важ керкаясыд Комиад ставыс öти модаа вöліны. Öні тай вылястө дзик мөд ногон кыпөдоны-а. Мөд пөвста өшинь рамаяс төв кежлад пуктөмаось, дерт, көнкө, батыс воліс Машалы отсыштны.

Но Света Бузиналон бытшйөдчыс кывъясыс прамөя дойдісны Денислыс сьөлөмсө. Абу жө өд Маша сэтшом-татшом ань, мед верөссө пөрийөдлыны! Көть өд и гортсянныс ылын уджаліс, но быд лун йитчыліс мобильникнад Машакөд. Лун-мөд мысти гортсө энөвтөм бөрын гөтырыс веськыда висьталіс, мый муртса кежлө пыраліс сы ордө төдса морт, кодкөд өтлаын велөдчисны медколледжас, нинөм эз и дзеб. А тані Света больөдчө, иномар-каясөн пө гөтыр дорас бөкөвөй мужикъяс кыскасисны! Квайт во Денис да Маша олісны öти вевт улын, некор öта-мөд вылас эз скөрмывлыны, и мый налы юкнысө, кор нинөм на ыджыд-торсө эз слөймыны лөсьөдны? Озырмыны эз на удитны, да и өдвакө коркө озырмыласны. Дерт, дөзмыштлөмъясыд корсюрө вöліны, но некор öта-мөд вылас ракаяс моз лөкыс эз кравзыв-лыны, блюдыяс джоджө эз лясйөдлыны, пыр зілісны төлкөн-ладөн, зык-шумтөг овны. Сөмын вот челядь мыйлакө эз артмыны, тайө медсясө майшөдліс гозъяөс, кыкнанныс өд зэв өна көсйис-ны, мед чужис жө коркө налөн ичөтик кагуньыд.

«Мый тон ме тані өтнам пукала,— мөвпыштсис Денислон.— Петала бать-мам дорө, чолөмасы да öтырышъя ставсө и төдмала. Бузина тай öнтай бызнитис, мамыдлыс пө көть юав».

Эз весиг вежсьы, туйвывса паськөмнас и петис бать-мам ордас. Батыс буретш вöрыс воөма, сьөд партукасьома, мед паськөмыс оз вирөссьы, кыйөм көчөс бөр кокөдыс өшөдөма сөрийө да кульө, а мамыс пукалө пызандорса лабичын да телевизор видзөдігмоз носки кыө, гөгрөс кудйын бергалыс тупыль-сянныс шөртыс кыссьө.

— О-о! Со миян пиукным и воис медбөрти!— Петыр Наста пуктис кысянсө шөрт тупыльяс тыра ичөтик кудьяс да уськөдчис Денислы паньыд.— Но, Ен ськөдөн, гөгөр бур?

— Вои, ставыс бур,— топыда кутлис мамсө Денис да бергөд-чис батыслань.— Лөсьыда ветлі, эз өбөдитны и уджөн, и нажөт-каөн. Гортө вайышти судзсьымөн, банкыд өд ссудасыд мыйлакө быд төлыс вештысьны корө, да и аслыным на олөм вылад колө.

Гриша Микол кульсян пуртсө пуктис улөс вылө да нюжөдiс пуджөм дөрөм соска килутшсө пиыслы:

— Но, чолөм, чолөм! Зэв бур, мый воин. Час, эштөдышта да, вөлисти нин лөсыда пуксылам. Кынөмыд, тшук, сюмалө? Но нинөм, неуна виччысьыштлан.

— Абу тшыг, карын вокзалса буфетас сөйи,— өвтыштчис Денис.

— Карса сөяныд өд абу гортсаыд кодь пөтөс, да и локтиг-мозыд сийө важөн нин удитис пыркавны,— воча нюмдiс батыс.

Гриша Микол сөрнитигмозыс помалис кульны көчсө, еджыд гөна небыд кучиксө зэвтис вожка вылө, сувтөдiс кусө пачсянь неылө косьтыны, вожөдiс көчлысь рушкусө, лэдзис сювсө водз-выв лөсьөдөм тазйө.

— Наста, мича кинад кисьталышт меным көшнад,— бергөд-чылис гөтырланьыс.

— Час, ме кисьтышта,— уськөдчис ва пельса дөрө Денис, гумовтис васө да видзчысьөмөн, мед оз резсы, коялыштис вожөдөм көч вылө, а батыс мыскалис көчыслысь пытшкөссө.

Микол недыр виччысьлис на, мед көч вывсьыс помөдз виялас вирөсь ваыс, петкөдiс веранда вылө кыйөмасө да өшөдiс кын-тыны пөтөлөк бердас.

Наста көсийс босьтны тазсө да нуны ывлаө, но Денис удитис мамсыс водзджык, койыштис көчлысь сювъяссө град вылө — катша-ракалы нимкодясьны, найө сэни важөн нин дышпырысь моз виччысисны. Кокувса сөстөм лымнас нирснитис таз пытшкөссө да сөстөмсө бөр пыртис керкаө. Та кості мамыс ва ветьөкөн чышкалис джоджсьыс резсьөм вир войтъяссө да вольсалис тубыртлөм джодждөра. Медводз мамыс, сы бөрын ая-пия мыссян дозийөн гольөдчигтырйи мыссисны, чышкысисны. Петыр Наста лөсьөдiс пызан вылө сөян.

Гриша Микол лэдзалис пуджлөм дөрөм сосъяссө, кизясис, пуксис пызан пельсө, көзяин местаө да видзөддiс пиыс вылө:

— Но, вай жө ошйысь ветлөм-мунөмнад, зимөгор,— серөк-тыштис батыс да та дырйи петкөддiс гырысь ён пиньяссө.

Мыйлакө сылөн пиньясыс вөліны зэв аслыспөлөсөсь, ёнөсь, пыр вижөсь, көть мортыс и эз куритчы, и некор эз висьлыны мукөддөн моз. Весиг кор сөрнийө воливлісны пинь висьөм йылысь, то сөмын шпыньмунліс: «Дерт, пинь вермас висьны! Ог эскы! Пиньыд өд лы, мыйысь сылы висьнысө?»

— Да мый сэн ошйысьнысө?— воча нюммунис Денис.— Ме өд нинөмсө эг и адззыв, сьөд вөрын некытчө петавлытөг олі, сөмын отарө уджалі да уджалі. Ті вай асьныд висьтавлөй, мый сиктас выльыс?

— Миян нинөм на эз вежсьы, ставыс важ мозыс надзөникөн кыссьө,— Гриша Микол вайис куим стопка, лөниника жургысь роч көзөдысь судзөдiс джынъявтөм водка доз, восьтис сийөс да кисьталіс стопкаясө.

— Меным джынсьыс унджык эн кысьт, сідз нин юрөй век висьө,— сувтөдiс верөссө Наста.

— Но, зэв бур, пиө, мый тэнад ветлөмыд удайтчис да лөсыда бөр гортө воин, та вөсна и юыштам,— кыпөдiс стопкасө Микол.

Точкысисны да гумыльтісны стопкаяссьыс курыдторсө кушөдз.

— Сёйышт, пиук, коч яя пось шыдтö, гажыд, тшук, бырис нин?

— Кысь нö эз, мый дыра нин татшöм чöскыдторъястö эг видлы да.

Недыр чöла паняисны, гöгрöдлісны юраныс гуся мөвпъяссö. Камод вылын шыаліс телевизор, чукöртчöм сюсь, и абу ёна сюсь йöз сәні бара вензисны, öтияс Украиналысь оласногсö кулитöны, мөдъяс ошкöны.

— Миянöс мамыдкөд тайö телевизорыд нач политикъясөн вöчис, быд лун пинясьöмсö видзöдам. Мукöддырйиыс меным сэтшöм окота эсйö Ковтуныслы куш плешкас мыйöнкö дйзгыны,— паньнас индйс Гриша Микол экран вылын дуль резысыяс вылö.— Сэтшöм öмöй нин сйö йöй, мый некыдз оз вермы гөгөрвоны, мый Украинаыс зыбуч нюрö вöйö да Россиялөн отсавтөг öдвакö вермылас и петны. Некодöс оз кывзы, век öтиторсö дольö, быдөнöс вомалö. И мый кульсö сйö Москваас вöчö? Мед Украинаас и оліс да уджаліс, сэтшöм кö сәні лöсьыд!

— Ме думысь, Ковтуныд абу жö дзык йöй,— шпыньмуніс Денис.— Кодй сылы Украинаас та мында удждонсö вештас? А öтиторсö дольö сы вöсна, мый прöстö сылы аслас юрыс зэв дона. Кутас кö öд телевизор пыр став мир пасьтаыс висьтавлыны збыльсö, нылыдавны рочьяслы, то гортас туйыс тупкыяс, Украинаад локтас да сйöс пыр жö люстриуйтасны, зелёнкаөн куш юрсö мавтасны, ёг тыра контейнерö сюясны, а вермасны и Бузинатö моз вины. Вот та вöсна киргымöныс и горзö, зильö петкöдыны Киевса чинаяслы быттьö став сьölöмнас сулалö на дор.

— Да?— мөвпальштйс да гогнитйс юрнас батыс.— Сйдз, гашкö, и эм да.

— Да, да, вот, вöлөмкö, мыйын делöыс,— нылыдаліс и мамыс.— Менам юрö тайö эз и воы. А вот ме содтöд ог гөгөрво, Америкаас пресс-секретар вöлі Псаки, йöйсыыс йöй, сапөг пöлөн корреспондентъяс водзад весиг петавліс. Декретö муніс, сы местаö Кирбийс пуктйсны и, видзöда да, сэтшöм жö кын юра. Адмиралөн пö нöшта вöлөма! Сэтшöмөсь кö сәні адмиралъясыс, то кутшöмөсь матросъясыс да салдатъясыс?

— Вот сйö ме ог жö гөгөрво,— серöктыштйс Денис.— Менам öд телевизортö видзöдны кадыс ёнасö эз вöv да ог и тöд, мый тйанлы шуны. Тй ме дорысь унджык нин, видзöда да, адзылөмныд и тöданныд.

Пукалыштйсны, сёйыштйсны, бара неуна юыштйсны.

— Кывзöй, ме со муртса на сиктö вои, а мыйсюрö Маша йылысь пельö вашнитйсны нин,— куш стопкасö пызан вылас гөгрöдлыштйс Денис да кытшовтöдйс синъяснас бать-мамсö.

— То öд, пыр и адззысысны бур йöзыд!— скöрысь дзуртыштйс батыс.— Кодй нö сэтшöмыс?

— Света Бузинакөд тай паныдасьлі, нывкаыскөд кытчökö ветлөма вöлі да.

— Сйö нö танй нин? Неважөн на кытчökö лэбыштліс, верös сайö быттьö, а Полинасö мамыслы кольліс. Сйдзкö, бара на нинөм сылөн эз артмы. Кымынкөд нин овліс: то öтикөд öтлаасьлас, то мөдкөд, а тölкыс эз и ло. Сы понда и васö гудыртö, мед

мукöдыслөн сы моз жö оломыс торксяс,— быдсөн пузис Петыр Наста.— Вежыс петö тiян лöсьыд олом вылö!

— Тэ, пиö, водзвыв сьолöмтö эн пыдзрав,— Гриша Микол тапкис пиыслы пельпомас.— Ми мамыдкöд та кузя зэв лöсьыда сёрнитим Машаыдкöд. Некутшöм лёктор абу, мый сы ордö недыр кeжлö пыралис колледжас ськöд öтлаын велöдчысь. Мортыс миян сикт пыр карö мунис. Со и кeжалис аддзöдчигмоз, сёрнитыштисны, тшай юыштисны, и водзö тюрис. Сы мында и вöли, а йöзылды рады воманыс оз тöр, сюри, мый вылын пиньтö кeслыштны!

— Ме аслам гöтырлы эска.

— Но и бур, сiдзкö, а ми танi мамыдкöд шогсям, друг да тэ вежöгтыны пондан Машатö,— нюмдiс батыс.— Быдторыйыс артмылö тай оломад да. Мукöдыс öд черөн-пуртөн ли, ружьеөн ли гöтырсö котрöдлöмöдз воласны да, ме сыысь и полi, мед, мися, тэ сэтчöдз он жö лэдзчысь.

Вель дыр пукалисны да надзöникөн сёрнитисны ас костаныс, и бать-мамыслөн, и пиыслөн öд ёна нин гажыс бырöма öтамöдсьыс. Эз и тöдлыны, кыз воöма рыт, дзикöдз пемдöма гөгöр, столбъяс вылас то пöнаръяс öзталисны.

— Но, ладнö, аттьö тiянлы,— кыпöдчис пызан сайысь Денис.

— Аслыд аттьö, пиук, пыралöмсьыд! Быдсөн кокниджык лои сьолöм вылын, аддзысьлим да,— тапкöдыштит писö пельпомас батыс.

— Гажмöмыд да некытчö, бара-й, эн кeж, гортад веськыда и мун,— кильчö вылöдз кольöдiс Денисöс мамыс.

Важ жар вылад Денислөн öдйö и коддзыссьöма. Ывлаас петiс да син водзас вералö. Недыр сулыштiс дзиръя дорас, видзöдлiс öтарö да мöдарö. Кывтыдладорас туй шöрын Денисланьö шатлалiгтырйи локтисны кык мужичöйлөн мыгöръяс, найö гораа сёрнитисны, мый йылыськö матькигтырйи вензисны. Кор матыстчисны дзиръя весьтöдзыс, Денис тöдiс найöс. Öтиыс вöли кык арöсөн сыысь ыджыдджык Пиля Петыр, мöдыс — пукавлöм жö морт, кывтыдса ачыс, весиг нимнас Денис сийöс оз тöд.

— О! Денис!— сувтiс да чуймöмөн горöдiс Петыр.— Кодi, мися, сэнi дзиръя дорас и тутуасьö-а? Тэ пö вахта вылö ветлин, воин нин?

— Вои, дзикöдз öд сэтчö он кольччы, коркö и гортад колö бергöдчыны.

— Но и кыз? Мыйкö мынтыштисны?

— Уджалiгад, дерт, мынтысьлöны!

— Лок миянкöд ветлам, то буретш «Боярышник» доз ньöбим, пыдыртам öтлаын.

— А мый? Ветлам,— мыйлакö зэв кокниа кöсйысис Денис.

Школаын велöдчигөн Пиля Петыр петкöдлiс асьсö бур спортсменөн, чожа котралис лыжиөн, мудз эз тöдлы, лолыс эз тырлы, да сийöс тшöкыда босьтлывлисны ордйысьöмъяс вылö. Физрукъяс думсьыныс кутисны Петыр вылö ыджыд лача, чайтисны коркö-некоркö мöдöдны олимпиада вылö. И збыль, сийö пыр вöли зэвтöм пружина кодь, быд звукö дась пезьдыны. Детинаяс чукöрын петкöдчис водзмöстчысьөн, збойөн. Нывъяс чукөрөн вöтлысисны сы бöрся, а Петыр вежлалис найöс öти бöрся мöд. Но олимпиаечöдз воöдчыны Петырлы эз удайтчы: зон велöдчис сiдз-тадз, нöшта

томсянь радейтис юыштавны. Армияын служитом мысти воис гортас, пыраліс велөдчыны Вьльгортса видз-му овмөс техникумө, но регыд мортыдлы дышөдіс грамотатө шедөдны да энөвтис. Некымынысь пукавліс, первойя мыном бөрас гөтрасьліс, но том ань эз дыр видзөд сылөн ыркөм вылө, өдйө и пышйис. Öнi өтнас красуйтчө, майбыр, некод оз вид курыдтортө дзибрөдлөмысь.

Пиля Петырлөн муө вөйөм керкаын дзурс пемыд, ныртө чашнитө чорыд пөдөм дук, кажитчө, быттьө сьөдбөж кудзалөма. Öдзөсөд пыригөн Денис өнакодь колскысис вешнякас, бур көть, төвся шапкаыд дорйыштис да юрыс эз сэтшөма доймы. Водзө воськовтны эз лысьт, сувтис порог дорас, мед виччысьлыны, кор Петыр биасяс. Чайтис өд, öнi көзяиныс шлочкас выключательөн да жырсө югзьөдас электрической лампочка, но Петыр мыйкө вомгорулас броткигтырйи ноксьыштис пызан дорас, чирснитис истөг тувйөн да ломзьөдіс карасин лампа. Сэтшөм лампаыс Денислөн эм сөмын вөралан керкаас, а тані мортыс юрсиктын прамөй битөг олә. Саөссөм лампа стеклөыс муртса югзьөдө оланінсө.

— Тэнад мый, электричествоыд абу?

— Мынтысьтөмысь орөдісны, но и мед! Меным сийө өнасө оз и ков, вывтi уна сьөмсө гартө,— өвгыштчис Петыр.— Вина вылө весиг оз коль. Воськовт водзө, час ырснитыштам югыд васө.

Денис пуксис лабичө, нэмсө нин чышкывылтөм няйт пызан сайө, көні сулалісны сальзьөм стөкангъяс, косьмөм чөвпан джын нянь, туплясис некымын пань да важиник пурт.

— Но, гортад воөмөн, сідзкө, Денис!— кисьталіс боярышник вылын сулөдөм спиртсө да кыпөдіс ассьыс стөкансө Петыр.— Мед и водзө тэныд лөсьыда ветлыны да кыза сьөм кульны!

Юисны. Денис эз весиг гөгөрво, крепыд-ө юанторйыс, ва моз тай кылаліс-а. Кос няньсө сөмын исыштис, көть дукыс сылөн омөля нин кыліс.

Юрыс Денислөн та бөрын прамөя гудыртчис, сьөктаммис, сингъясыс мөдісны мырдөн тупкысьны, көть истөг тув тасав. Сыкөд өтлаын юысь өртгъясыс мый йылыськө водзө бызгисны, сералісны.

Унмовсьны заводитысь Денисөс пальөдіс Петырлөн гөлөсыс:

— Содтысям, сьөмыд эм?

— Тані, пинджак зептын,— тапкис Денис морөс шуйгаладорас.

Кыліс вөтын моз, кыдзи Петыр кыскис зепсьыс папушниксө.

— Тані куш посни деньга да! А көні нажөвитөм сьөмыд?

— Сийөс ме пошта пыр гөтырлы ысті.

— А мый морла, сідзкө, ми тэнө юктөдім? То өд, өшөдчис бөж выланым, сакис-сакис дасьтө, а аслас нинөм абу! Вош татысь, мед дукыд эз вөв!

Денис сьөкыда кыпөдчис пызан сайсьыс, стенас кутчысьөмөн петис пемыд посводзас, та дырйи бара на люкаліс юрнас өдзөс вешняксө да надзөникөн восьлалігтырйи веськаліс жө коркө ывла вылө. Медводз йөткыштис ас пытшсьыс Петыр керкаысь пөдтысь дукгъяссө да морөс тырнас лолыштис ывласа көдзыд сынөднас. Сувтис да гөгөр видзөдліс. Еджыд лымйыс бура төдчө кокгъяс улас, помтөм-дортөм енэжын куньтыралісны сингъяссө

посныдик кодзувъяс, но төлысь эз тыдав. Сюръяс вылын өз-йисны югыдгөрд лампаяс, кодъяс пö этшаджык энергия видзöны. Збыль тайö али абу, Денис оз төд. Но сиктса администрацияөн уна во чöж нин юралысь Митрей Иван тшöктис воддза еждыдь-яссö вежлавны выльпөлöсъяс вылö.

Денис кок улын муыс небыда лайкъялö, кажитчö, быттö төла поводдя дырйи дзибрöс пыжын сулалö. Но быть колö мунны. Морякъяс моз паськöдис кокъяссö, вöчис некымын воськов да петис туй вылö, сьökыдырысь веськöдчис гортланьыс. Но немвичысьтöг муыс вешйис кок увсьыс боквыв и пöрис веськыда сулалысь Денис вылö. Кöдзыд лымйыс сотыштис чужöмсö. Виддис кыпöдчыны кок вылö, но весьшöрö. Мый нö танi, туй шöрас, и кынмыны лöö али мый? Оз, Денис оз сетчы лёкыслы, кöть кыссьöмөн, а воöдчас гортöдзыс! Кысянькö ылисянь воисны триньöдчöм шыяс, Денис гөгөрвоис, мый тайö пинжак зептас садьмис сылөн мобильникыс. Кодкö, буракö, звөнитчö, кодлыкö Денис дум вылас усьöма. Бергöдчис, прöстмöдис веськыдладор боксö, кöни телепоныс триньöдчö, суйис кисö зептас да судзöдис ичöтик аппаратсö. Мед сöмын кынмöм кысыс оз жö уськöд, лым пиад кö öд тювкнитас, сэки сийöс он корсь. Кыкнан кинас топöдис «Nokia»-сö, кывзысьтöм чуньнас корсис да личкыштис ичöтик кизьсö, матыстис пель дорас. Трубкаын кылис Маша гöтырыслөн гөлöсыс:

- Денис, тэ кöни?
- Лым пиын.
- Кыдзи лым пиын?— шай-паймунис, кылö, Маша.
- Уси, ме дзик код.
- Ой, час ме локта! Кодарын нö тэ?
- Пиля Петыр керка весьтын.

Денис друг черöбтöмөн садьмис, сьökыда восьтис синъяссö да видзöддис гөгөрбок. Вөлöмкö, гортас, аслас крöватын куйлö, орччөн Машукуыс куткыртчöма, кутыштöма сийöс да шытöг узьö. Видзöддис стенас югъялысь часi вылö, сийö петкöдлö куим час асыв. Но, сiдзкö, ставыс бур, позьö на водзö туплясьны. А юрыс жувгö, ок, и висьö. Абу жö колöма тöрыт сэтшöм ёнасö юны! Талун сэсся и мурчкы, лунтыр пöж пöкмеллятö да думайт, казтьывлы, мый жö тöрыт вöли? Помнитö, кыдзи Пиля Петыр ордас пырис, а водзö быттö чышкыштöма, юр вемыс куш. Кыдз гортас воис? Ас кокнас али кодкö бур морт отсыштис? Вом пытшкöсыс кос, клеясöма быттö, горшыс пакталö-косьмö. Ватор юыштны эськö, но абу окота гöтырсö садьмöдны, мед шойччö мортыс; ачыс öд прöст, кöть лунтыр туплясяс, а Машукулы асыв-сяньныс удж вылö мунны. Ковмас виччысьлыны кöть нин квайт часöдзыс, сэки чеччас да пöттöдзыс кöдзыд васö дуньгас.

Мыйла эськö рытнас Пиля Петыр бöрсяяс и вöтчис? А-а! Тöрыт öд Света Бузина лектор сöрыштис Машук йылысь. Сы понда сьölöм вылас курыд вöли, юр вемыс гудыртчис, сийөн эз на кöсийыссы гортас мунны, со и кыссис юысяс бöрсяяс, мед ылöддыны асьсö. Но и эз куж артыштны асьыс вынсö. Сiдзсö эськö Денис зэв гежöда усьмöнтö юлывлö, веқджык кутчысьны видзöдö, төдö асьыс сямсö да. Ышмылöм бöрад, ок, ёна висьö, кеслöдлөмөн-кеслöдлө морттö. Сы вöсна и вывтiасьöмсыс зильö

өтдортчыны. Праздник лунгъяснад юыштас стопка-мөд, мед гажөдчыштны ас чукөркөд, и шуас аслыс, та вылын пө тырмас. Но мукөддырйи артмывлө сідз, мый вунөдчас, торйөн нин, кор аддзыяс челядьдырся ёртгъясыскөд, гажмас да окота лоө петкөддыны асьсө, быттё сійө ён, багатыр, йөзысь-мортысь унджык вермө лэптыны и оз коддзы. А мөд луннас татшөм вывтiасьөм-сьыс юр висьөмөн вештысьны лоө да кайтчыны, кызди өні. Ок, ёна жө сьөкыд талун!

А кызди Машуккөд асьсө кутны? Света Бузинаыд то абу пөръялөма, збыль волөма гөтыр дорас кутшөмкө зон. И мамыс аддзылөма аслас синмөн. Шүөны эськө бать-мамыс, мый недыр и олөма тані том мортыс, час кымын сөмын, чай чашка юөма и водзө карлань журөдөма. Отарсянь кө видзөддыны, часыд зэв дженьыд кад, мый сійө — өти часыд? А мөдарсянь кө, часад квайтымын минута, көсьян кө, мыйсө сөмын он удит вөчны-бергөдны...

Кор Света Бузина кык жөник пиысь бөрйис Пасаельса лейтенантсө да шуркнитіс ськөд кытчөкө суйөр бердөдзыс, Денис тшупыштіс аслыс юрас: тырмас вөтлысьны мича нывъяс бөрся. Öні сійө воддза дорысь сюсь нин, гөгөрвоис: мичаясыд зэв бура аддзөны и төдөны, кутшөм ыджыд вын сетөма Енмыс налы. Сэтшөм нывъяс дорад зонгъясыд сідзи и ызгөны жар гожся лунын лөдзьяс моз. Налөн нырныс пыр вылын, вывтi гоньгөсь, велалөмаөсь, мый налөн эм позянулун бөрйыны уна зон пөвстсьыд медся бургъяссө, сэтшөм-татшөмгъяс вылад ёна оз и видзөддыны. Мед сывдыны налысь сьөлөмсө, аслыд колө сулавны мукөд бурлаксьыс төдчымөн вылынджык, мыйөнкө вель ёна торъявны наысь. Кодсюрө нывъястө ылөддөны гитараөн лөсьыда ворсөмөн да сьылөмөн, кодгъяскө спортын ыджыд вермөмгъяс шедөдөмөн, мукөдыс мича паськөмөн да бать-мамыслөн озырлунөн. А Денислы нинөмөн ошйысьнысө, сійө прөстөй колхозник пи, ыджыд сюсьлун Енмыс абу жө козьналөма, школаын велөдчис сідз-тадз, медсясө «трияс» вылө, та вөсна и эз мун водзө грамота шедөдны. Тэрыба лыжиөн котравны эз жө вермы, өдйө лолыс тырө, век медбөрын кыссьыліс, кока-йөра спортсменгъясыд ылө бөрө кольлісны сійөс. Öти бур, көть трактор-машинаөн да пуа көлуйөн ноксьыны батьсянныс сямыс вуджис. Со и ставыс. Мый вермис Денис сійө жө лейтенантыслы воча пуктыны? Ёна нинөм. Мый сійө тракторист да шоперыдлөн правоыд? Сикт пасьтала өні быд мужик рулитнытө кужө, ветлө ас машинаөн. Сэсся и нинөм. Та вөсна и шуис аслыс, мый мича нывъястө абу Денис вылө лөсьөдлөма, мед принцессаяс бөрсяыд озыр да ыджыд мывкыда зонгъяс вөтлысьөны. И веськөдіс видзөдлассө сэтшөм нывъяс вылө, кодгъяс абу ёна тшапөсь да асьнысө вылө оз пуктыны. Маша Турьева, Светакөд кө орччөдны, петкөдчис вывтi кельыдөн. Көть и оз позь шуны сійөс мисьтөмөн, зэв жө аслыспөлөс ныв, но синтө озджык желляв. Абу сэтшөм, кодөс кор муртса сөмын аддзан, и вирыд пузырь, окота видзөдны и видзөдны сы вылө, окота, мед син увсьыд оз вошлы некор. Маша лөнджык сяма, абу Света кодь тшап, асьсө мукөдсьыс вылөджык некор эз пуктив, сёрнитігъяс дырйи быдөнкөд кутіс асьсө өткөдя, быттё матысса ёрт. Та понда Светалөн ылі муө Пасаельса лейтенанткөд мунөм бөрын Денислөн видзөдласыс и усис Маша

вылө. Кор гөгөрвоис, мый мортыс абу шыбитана, шань, сэки и шуис аслыс: «Вот тайө ныв вылас ме и гөтрася!» И эз сорсыы. Машукуыс и збыль артмис аттө бур гөтыр, Денис весиг мукөддырйиыс думыштліс, мый тшук ачыс Енмыс нин сылы козыналіс сьөлөмыслы лөсялана тайө мортсө. Дерг, первойя кык онас, кор Маша велөдчис на колледжын, гозъя кызвын кадсө олісны торйөн да ёна гажтөмтчисны өта-мөдсыныс. Но ставыс ладмис, мыйён помасис велөдчөмыс, да Маша медсестра дипломөн локтіс уджавны ас сиктас. Отлаын олігөн сэтшөм топыда көртасисны-сөльнитчисны, өні весиг оз гөгөрвоны, кызди водзті эз казьявлыны өта-мөдсө. Узьны водасны да, Маша ёна-ёна жмит-час верөсыс бердө, топыда-топыда кутас, войнас мукөддырйиыс кө друг садьмас, повзяс, а көні Денис? Пемыднад шлопкас Денисөс кинас, гөгөрвоас, мый верөсыс орччөн вөлөм узьө, абу пышйөма, сьөлөмыс бөр ас выяс воас да выльысь лөсьыда унмовсяс. Том гозъя олоны мам-батьсыс торйөн, некутшөм зыкшумтөг, ставыс бур, сөмын өтитор лөк, өтитор майшөдлө кыкнаннысө: челядь абуөсь. Та вөсна кыкнанныслөн дугдывтөг ёнтө сьөлөмыс. Посни йыломтөгыд нө кутшөм олом, өд коркө найө гажөдасны, коркө шогөдасны, но сөмын челядя семьяын вермө лоны шуда тыр-бур олом. Машалы весиг юрас мөвп воывліс, гашкө, босьтны йөзлысь муртса на чужөм кага. Эмөсь өд сэтшөм мамъяс, кодьяслы кагаыс оз ков, больничаян ваясны да оз и босьтны, эновтөны; асьныс шунькнитасны кытчөкө да водзө шляйтчөны, мед пө челядсө государство быдтө. Дерг, видлынытө позьө, но стөча он төд, кутшөм на морт быдмас бокөвөй йөзөн лөсьөдөм кагасьыд. Мед эськө эз жө ковмы бөрти каитчыны ас семьяад төдтөм морттө пыртөмсьыд. Ассьыд өд, көть кутшөм сямыс быдтасыдлөн лоө, сэтшөмөс и кутан радейтны, быть, а йөзыддысь, көть и зэв ичөтиксянь быдтан и дзик ассьыд моз жө лелькуйтан, но көнкө ылі пельөсө дзёбөм мөвпгясөн век жө кутан төд вылад, он вунөдчы, мый тайө абу тэнад пи ли, ныв ли, а йөзлөн.

Сиктын быдөн төдө өти лоөмтор йылысь, кор зэв бур, но челядтөм гозъя босьтисны эновтөм кагаөс, кодлөн юысь мамыс код юрөн турдөма лым пиын. Дзолядырйиыс ставыс вөлі бур, а мыйён нывкаыс быдмыштіс, то пыр жө заводитіс гортсыс пышгьявны. Быд лун, видзөдан да, мамыс кузь пөнарик киас босьтөмөн котралө сикт кузя, корсьө нывсө, а мөдыс сөмын өтарө-мөдарө сыысь сяркъялө, дзёбсясьө. Бөрти нылыд кыммөм мамыс моз жө юөмланы сеччис, партитчис ас кодыс лэдзчысьөм йөзкөд, гажаа сьыліс да оліс, шог эз төдлы, кытчөдз юысь другьясыс кувмөныс эз нөйтны.

Маша панліс та кузя сёрни Денискөд, но төлкуйтыштөм бөрын воисны өти кывйө, шуисны виччысьлыны на. Виль керкаө петтөдз кө нинөм оз вежсыы, то сэки збыль ковмас босьтны да быдтыны кодыськө эновтөм кага.

Со өд, коды оз ков, налөн кагаыд чужө, а коды колө, и оз. Света Бузинылы, сэтшөм томсянныд, дзик нинөмла вөлі кагаыд, а быдтысьө тай со. Денислөн да Машалөн абу, көть эськө зэв ёна кыкнанныслы колө. Маша прөст кадө петавывліс Света ордө, кывйыс лудны кутас да, мед гусяторьяс йылысь ас костаныс сёрнитыштны, Денискөд өд он ёнасө ызгы-бызгы, кыв-

мөдтө лунтырнад кывлан кө, сийө бур нин. Быдмыштөм нин Полинаос сэки босьтас ки вылас, топодас ас бердас, быттё ворсө сыкөд, аслас синваыс дольсьялө, Света вылө вежыс петө. То өд кутшөм нывъёртыс сылөн шуда, и чужөм вылас мичасьыс-мича, и кагаыс нин сылөн то мый ыджа, регыд школаө пыран кад воас.

Но тырмас куйлыны, колө чеччывны да юыштны, көлөкө, кокньодыштас? Денис надзөникөн, мед гөтырыс оз садьмы, вештис ас вывсьыс Машалысь кисө, кыпөдчис, дзурттөм джодж плакаяс корсиг воськовтис ва пельса дорө, гумовтис көш тыр да бура дыр юис шонавны нин удитөм васө, бөрти кынөмас весиг больскакывны кутис.

— Висян?— кыпөдис юрсө Маша, садьмөма жө да.

— О, Енмөй, но и сьөкыд!— Денис коньөр моз, шатлалиг-тырйи, локтис лабич дорөдз, пуксис, кыкнан кинас топөдис юрсө, гырдазаяснас лэдчысис пызан вылө; ва юыштөм бөрын виччысис кокньөдөм, но друг казялис, кыдзи юөм ваыс гырк пытшсьыс мөдис вөйысьны бөр. Чепөсийис лөкань дорө, но тани виччысьтөг гозья люкачисны юр воча юр. Денис чуймөмпырысь адзис, а Машуксө тай сы моз жө тшөтш шөгөдө. Кынөмъясныслөн прөстмөм мысти кыкнанныс видзчысьмөм, мед оз шатлөдды, быттё кольмөм йөз, лөня вешйисны лөкань дорысь. Денис бара шлөпкычис лабичө, а Машук нөрөвтчис крөвать вылө. Гозья сьөкыда лолалисны.

— Менам төрыт вьвтиджык ышмысьмөма, а тэнө мыйла шөгөдө? Али менам вөсөм вылө видзөдөмысь?— Денис бергөдис жувгысь юрсө Машалань.

— Менам аслам висьөм, коймөд төлысь нин гудрөдлө, кынөм сьомалө, а сөйны нинөм ог лысьт, пыр и гугөдас,— шог синъясьөн, но топалөм чужөм вылас гуся нюмөн висьтасис гөтырыс.

Денислөн весиг юр висьөмыс быттё лөнъыштитс, морөс вылас пыр на гудыр, но ыджыд лачаөн тырөм синъяссө веськөдис Маша вылө:

— Мый?! Абу-ө нин тэ?..

— Да,— шудаа вашмунис да довкнитис юрнас Маша.— Ме кага виччыся!

Денис уськөдчис крөвать дорө, пуксис куйлысь гөтырыс бокө орччөн да радпырысь кутлис да окалис Машаос — юр вывсьяныс кок улөдзыс.

— Менам донаөй! Збыль али мый миян лоө асламым керка гажөдысь? А ме эски, збыльысь өд эски, мый миян тэкөд ставыс ладмас, и шудным лоас керка тыр, надеяос некор эг воштыв!

— Но и бур, мый век эскин, менам мусаөй! А ме өтнамнад сэтшөма гажтөмтчи, сэтшөма гажтөмтчи! Кор нин, мися, волан? Лун көть вой, пыр иган сайын олі. А дыр жө и кыссис тайө куим төлысьыд!

— Ме быттё эг! Ме өд гажтөмтчи жө, да содтөд кыдзи на!— и Денис бара уськөдчис кутлыны да окавны гөтырсө.

— Ой! Ой! Эн сэтшөм өна! Оні тэныд менө видзны ковмас, мед некутшөм неминуца оз су ни менө ачымөс, ни дзолясө.

— Да кыдз нө ог видз, өнісянь некутшөм сьөкыдтор мед эз вөв босьтөма, век менө горөдды, сідз өд? Сөрнитчим?— скөр чужөм вөчөмөн водз чуньсө легөдыштитс Денис, сийө радысла весиг юр висьөмсө вунөдис.

— Да, да,— сөгласа гогйөддліс юрсө Маша.— Мед тэ ног лоө. Ой!

— Мый нө, мусаой?!

Но гөтырыс тэрыба чеччис да выльысь чепөсийс лөкань дорө.

Вель дыр ыкйис таз весьтын. Медбөрын, мыйон неуна кок-нөдыштис, мыссис да чышкысис.

— Нинөмлы өд петнысө, курыд ва сөмын пычиктө, кынөмөй дзик куш, а вот дугдывтөг шогөдө, сідз пытшкөсөс и пыдзралө,— сьөкыда ышлоаліг норасыштис верөсыслы.— Кынөмөй сюмалө, а сөйны ог лысьт, төда, мый пыр и восөдас. Мый нбылыштла, ставыс бөр петө. Кор тайө и помасьлас?

Сөмын өні Денис казяліс, кутшөм өна омөльтчөма Маша: банбокьясыс нөпмунөмаөсь, синъясыс пыдө вөйөмаөсь. Синва петмөн жаль лои сылы гөтырыс. Со өд кутшөм сьөкыд аньясыдлөн олөмыд, мыйтта шог ас вывтіныс лоө нуны!

— А ме тэныд козин вайи!— Денис восьтіс сумкасө да кыс-кис сэтысь литраа стеклө банка.

— Ноко, вайлы видзөдла,— Маша нюжөдіс кисө.— О-о! Сола өгурцы! Час, видла!

Восьтіс банкасө, кыскис өтиөс да зэв азыма кручкөдіс.

— Оз лөк ло?— повзьөмпырысь көрліс плешсө Денис.

— Ог, бара-й, төд, колөкө, и восөдас. Но меным өд солаыд колө! А мыйла тэ сы ылнасянь өгурцысө вайин? Сөмын эн висьтав, мед менө вердны! Нинөм вылө ог эскы!

— Збыль, эг тэныд сөйөм ради,— нюммуніс верөсыс.— Банка пытшкас ме денъгаөс дзебл.

И Денис өгурцы костысь кыскис ичөтик полиэтилен пакетө гартыштөм сьөмсө.

— Гусьясысь кө веськалас, өгурцы банка вылад сылөн вежыс өдвакө петас. А көтасыны оз көтась, рөсовыс өд абу.

— Вот тэ менам кутшөм мудер вөлөмыд!— пыр на өгурцыөн номсасис Маша.— Вот и бур, мый гортө воин, а меным өд өна гажтөм өтнамы вөлі, вывті гажтөм, тэ кө төдін!

Панны али абу Машакөд сөрни сы ордө төдтөм мортлөн пыралөм йылысь? Нинөмла, абу лөсьыд. Машукуыс өд вермас нормыны таысь. То өд, шуас, муртса на локтіс куим төлысь бокын ветлөм бөрын, а кутіс нин чепсасыны, быд нинөм абусө кыпөдны. Сиктсаяс то, на лыдын и медбур нывъёртыс, Света Бузина, быдсяма лөк сөрнисө Маша йылысь паськөдөны. А медся матысса мортыс — верөсыс кө оз кут эскыны гөтырыслы, тайө нин некытчө шогмытөмторйөн лоө. Кыдзи сы бөрын өтлаын овны? А Машукуыслы өні, нөбасигад, колө, мед сьөлөмсө сылысь некод да нинөм эз дойд. Мамыслөн өд шогсьөмъясыд инмөны и кагайдлөн дзоньвидзалун вылө. А дзоляник мортыс мед оз жө висьлөсөн чуж!

Дерт, Денис вежөрө Света Бузинаөн көдзөм майшөгыс, кыз шуласны, веськаліс небзьөдөм муө моз. Со өд, квайт во өтлаын олісны и пыр вөлі чөв-лөнь, гөтыр кынөмас кага эз чужйыштчыв, а муртса кутшөмкө бокөвөй зон сөмын здук кежлө пыраліс, и на тэныд! Маша тонө кага нин виччысьө! И кадыс лөсялө, буретш куим төлысья! Öні пукав да юртө жууглы, кодсянь тайө кагаыс? Век жө, тшук, колө асьтө лөньөдыштны, виччысьылыны

пиыслысь ли, нылыслысь ли чужомсö да вöлисти мөвпыштлыны, мый водзöсö вöчны.

— А тэ, Денис, кызди төрыт Пиля Петыр дорас веськалин?— юрсö лэптис да виччысьтөг юалис Маша.

— Ачым весиг ог куж висьтавыны, мый дивöйсла ме сы ордö кысси,— пыркнитис висьысь юрнас Денис.— Карын ёрткөд юыштим, сэсса батькөд да мамкөд пукуштим. А гортлань мөдөдчи да эсийö палявлытөг юысьясыскөд паныдаси. Чукөстисны аскөдныс, а ме мыйлакө тай тшөтш кысси сы ордö код юрнад. Садыкө вöли, дерт, нинөм вылө накөд эг партитчы да.

— Ладнө көть, телефоныд ордад вöли, эськө сэтчө лым пиас и турдин. Ме батытö да мамтö кори да накөд куимөн нуөдим тэно гортөдз. Ой, Денис, Денис! Нöшта кө недыр сэни куйлин, збыль эськө кынмин. Уна-ö нө колö? Оз öд этшаөн тадзитö чуньястөгыс кольлыны!

Мед не мунны гортысь бокö да кольны нөбасьысь гөтырсö өтнассö, Денис пырис уджавны частник дорö, кывтыдпомса пилорама вылө. Көнкө öд быть уджав. Көть и этшаник, но сьөмтор воыштас гозъялы. Пилитисны кер, көзьяиныс иналис тыöплакасö карсаяслы, а найö, тыдалö, разöдалисны страна пасьтала.

Кадыс мунис водзö, сийö оз джөмдав, бара со варов тулыс Комиын ыджыдалö. Долады сырчикъяс чужанинас воисны, дугдывтөг чиркөсны, тэрыба бөжнаныс легөдöны. Эжва пальöдчис төвса унмысь, зэлөдис мудзөм мышсö да жуглис, а сэсса и кылөдис войвыв саридзлань сийöс поньтавысь йисö.

Май төлысьын Денислөн да Машалөн чужис дыр виччысяна питор. Öни кутшөмкө мода лоис да, карö колö лэччөдлыны вайсьысь анястө. Водзти асланым больничачын лөсьыда жö ставыс торъявлисны, а öни оз позь. Гежөдикөн сөмын, юысь нывбабаяс да найö, кодъяс сөрөн шыөдчöны, вайсьöны ас сиктса бурдөдчанинын. Лэччөдисны Машаöс карö «Тэрыб отсөг» машинаөн, а бөрсö катөдны Денис гуркнитлис ачыс батыслөн важиник «Жигульнас». Ёна видзөдалис том баты пиыслөн чукурөсь гөрд чужөм вылас, окота вöли аддзыны, мый век жö сы вылө мунö, а оз код вылө, но кысь нө дзоляникыдысь мыйкө казялан. Быдыштас да сэки вöлисти ставыс тыдовтчас...

А мам-батылөн радлуныс воманыс оз төр. Со öд, на вылын оз ор ылисянь кыссьысь важся рөдыс, а водзö на паськалас, сөвмас да ёнмас.

Рытгорув тэрмасьөмөн локтö удж вывсыяныс Денис. Төдö, гортас сийöс виччысьöны. Дерт, Машалы отсасьны да ичөтик писö лелькуйтны волöны и ыджыд мамыс да пöчыс, налы зэв жö любö дыр виччысяна внукудкөд ноксьыштныгтö, кужанлуныс олөма йöзыдлөн унджык том мам дорсьыд, сылөн öд ставыс тайö медводдзавысь на, пыр шөйөвошөма, оз төд, кытчö и кутчысьны, кызди ичөтик кагасö тубравны.

Ок, ёна жö и мөдас радейтны Денис ассьыс писö, став вынсö да сямсö пуктас, мед Колюк быдмас уджач мортөн, кывзысьысьөн. Кор колö, мелялөмөн ичөт зонкатö велөдас, а кор ковмас, и чорзөдчыштөмөн асьсö мөдас кутны, мед сийö вывти оз вельмы. Дзолясянь велөдас пуа да көрта көлуйөн вөдитчыны,

кутас босътывлыны аскөдыс вөрө, лэч туйясөн төдмөдас, звер-пөткәлөн оласногөн, кызди коркө асьсө батыс велөддс.

Сикт шөрын магазин дорын юны радейтысьяс куимөн сула-лөны, дзоръялөны, оз-ө сюр кодлыськө дзайгысьыштны сьомтор. На пиын и Пиля Петыр то лажъялө, ылісянь на төдіс Денисөс, уськөдчис сы дорө, му рөма чужөм вылас нюм лэдзис, чолөмась-ны дзорысь кисө нюжөдіс:

— Кывзы, Денис, дорйыв, кызь шайт оз тырмы,— лолыштіс Денис вылө пиньтөм вомсьыс ыльөбтысь дукнас.

— Мый, нянь вылад?— шпыньмуніс мөдыс воча.— Абу ме-нам.

Збыль кө, зептас сьомыс вөлі, но мый бурсьыс кутас разөдны кодлыкө юөм вылө? Луннас машина тьөс сөвтисны өти стрөйт-чысьы, и сійө мынтысис налы, сө шайтөн быд мортлы вештысис.

— Век тэнад абу! Час, коркө ачыд йөрман да, уна-ө сэк от-сала!— пыр жө вежсис мортыдлөн сёрнитанногыс, бергөдчис да бөр косіс висьысь юра ёртъясланьыс, та дырйи Денислы кывмөн броткыштіс:— Дыр виччысяна чурка дорас тэрмасьө, хе-хе!

— Мый тэ шуин?!— яр биөн ыпнитіс Денислөн сьөлөмыс. Сійө сувтовкерис да кежис магазин кильчөланы.

— Мый кывлін! Кагаыд абу тэнад, а гөтырыдлөн корсьөм, хо-хо, гуманитарной отсөг!

Тайө кывьяссө кылөм бөрын Денис весиг ачыс эз төдлы, кы-дзи сылөн сьөкыд кабырыс вувзысис Петырлы черлыас. Вич-чысьтөмысла мөдыд шатовмуніс, но эз усь, кутчысис кок вылас, сэсса лөсьөдчис да воча вартіс Денислы. Мөдысь швачкөбтыны Денис эз удит, палялісны Петыркөд орччөн сулалысь шай-пай-мунлөм ёртъясыс да тшөтш пырөдчисны тышө; Денис кодөнкө крукөдөмысь крапкысис мыш вылас, зіля бергөдчис кымыньөн да көсийс тэрыба кыпөдчыны, но бокас ёна чужйисны да бөр путкыльтчис. Куйлысь морттө мөдісны өтарсянь и мөдарсянь дитшөдны, да зільөны на содтөд юрас веськавны. Гөгөрвоис, чеччыны, буракө, кок вылө оз удайтчы, оз сетны, сэки куткырт-чис, пидзөсьяссө кусыньтіс да топөдіс чужөмланыс, тупкис кияснас юрсө. Бур, мый магазинө локтысь нывбабаяс кыпөдісны гөлөсьяссө:

— Ті мый вөчанныд?!

— Дугдөй! Вианныд мортсө!

— Час полицияө звөнитам!

Зык кыптөм вөсна, тшук, нөйтысьяс и энөвтисны Денисөс, матькигтырйи тэрыба, коді кытчө шелөтитисны, вешйисны тыш-касянінысь да вошисны син водзысь.

Денис ружтігтырйи кыпөдчис кок йылас, чышкыштіс чужөм вывсыс вирсө, кыпөдіс таялөм картузсө, пыркөдчыштіс.

— Верман муннытө?— жалитана юаліс сылысь орччөн весь-калысь ань.— Некыті эз чегъявны тайө алкашъясыс?

— Нинөм, ачым муна,— өвтыштчис Денис.

Но и йөз! Некөн оз уджавны, а быд лун кодөсь шлөнтъялөны, быд лун налөн празник. Майбыр жө татшөмьясыдлы овны! Ни-нөм йылысь оз ков думайтны, некод вөсна шогсьыны. Ас керка кыпөдөм понда юр жуглыны ни. Олөны важөн нин шойна вылын куйлысь бать-мамыслөн киссьыны видзөдчысь стрөйбаясын, не-

кыті оз лосьодыштны. Весиг картупельтө оз пуктывны. Мый тон найо кутасны град йөрын ноксыны! Мутө од колө куйодавны, гөрны, сюявны водзвыв лосьодом картупель койдыстө, куранавны, мудйыны, арнас керны да гуө суйны. То мыйтта нокыс! А весь олысыясыды некор, коді нө на пыдди сэки юнысө кутас? Бурджык магазин гөгөр лунтыр блонъяласны, отилысь да модлысь кристыльтөмөн чукөртасны сыпирта сорас вылад, и рытланьыд бара нинөм оз ков, шудыс гач тырыс. Пилорама дорсыд төдса шоперьяс гөрбыльтө пес вылад вайласны, поспоманыс гузыгасны да гожөм чөжөн весиг оз пилитлыны, сідзи и куйлө. А төвнас лым улысь кыскалоны да кералоны, ульнас да кыннас пачсө ломтоны. Налы веськодь, талунъя луныс кө кольлас-ий, асывнас, колөкө, чеччан да кын...

Ёнтисны дойдалөм черлыыс, потөм чушыс, нырсыыс визувтис вир, бокас быттьө пурт суйөма, ыджыдджыка лолыштны оз лысьт, эз-ө нин ордлыяссө чегъявны тадзитө чужъялігад? Но медся ёна висис сьблөмыс. Дойясыд кузьбөн-визбөн бурдасны, а палявлытөм Петырлөн кывъясыс, кодъяс пыдөдз йиджисны Денислы юр вемас, некор оз вунны. Мун да и төд өні, збыльысь Колюкыс сьлөн пи али Машаөн кодкөдкө модкөд вөчөм чурка? И кызди өні гөтырыскөд овны? Кор думыштас, мый кодкө дзик бокөвөй морт сылысь гөтырсө кутліс, окаліс, малаліс, сідзи и кезнитөдө, веждөг босьтө. Эз! Татшөмыс эз вермы лоны! Татшөмыс некызди эз вермы лоны! Сьлөн Машаыс абу сэтшөм-татшөм морт...

Кор Денис пырис гортас, кагасө неньөдысь Машалы кажитчис, быттьө верөсыс садьтөм код, юөма, буракө, да кытчөкө усьлөма, няйтчөма, то гөгөр вирөсь чужөма и. Но бурджыка видзөдіс да гөгөрвоис: Денис абу юөм юра.

— Мый нө тэкөд лоис, Денис!

— А нинөм, ставыс бур,— эз кут паськөдчыны верөсыс, пөрччис уджалан паськөмсө да дыркодь мыссис кодзыд ваөн, сувтөдіс нырсыыс пыр на люзыгысь вирсө.

Сьлөмыс эз нин сэтшөм тэрыба да лөкысь дітшкы ордлыясас, вочасөн лөньыштис.

— Но мый лоис, мый? Висьтав,— муртса эз бөрд Маша.

— Тышкасышти, челядьдырөй дум вылө усьліс да,— видліс шмонитны Денис.

— Кодкөд?

— Пиля Петыркөд.

— Ададзөмыд кодө лякөссыны! А мый понда?

— Нырыс сьлөн меным эз кажитчы, вывті кузь. Сэссия дум вылө усьліс, кызди сійө менө школаын өбөдитаваліс, зепъясысь песни сьом пыркөдіс. Вай дугды сэссия юасьнытө, быдтор тэныд колө төдны!

— Да кыз нө оз ков! То кызди тэнө Петырыд нөйтөма да!

— Отнас кө эськө вөлі, эг на сетчы да! Куимнад тай чужъялісны-а.

— Чужъялісны?! Лолалігад оз бытшкы морөстө?— бергаліс Денис гөгөр Маша.

— Бытшкө.

— Сідзкө, ордлыыд чегөма, кыті? Таті? Таті?— виддаліс Денислысь бокъяссө Маша.

— Ой!— гөтырыслөн личкыштөмысь эз вермы кутчысьны да ойөстис Денис.

— Чегөма тай и эм. Полицияө колө шыасьлыны, аддзылісны өд йөзыд, көнкө, кызди тэнө нөйтисны?

— Колантор! Некытчө огө шыөдчөй!— чорыда орөдіс верө-сыс.— Тышсө ме ачым пані, первойөн варті, со и сюраліс. Полицияд шыасян да кутасны кө туясьны, менө жө и мыждасны.

Маша чуймөмөн видзөдіс Денис вылө. Тайө нө мый? Верөсыс эз вөв чеччалысь петукъяс лыдысь, көть и юыштавліс гежөдика, мужик — мужик и эм, но ачыс некор эз панлы косьтө.

— Мый понда нө тышас воин?

— Колө вөлі, эг вермы кутчысьны. Тырмас та йылысь, бурда, ставыс лючки лоас.

— Но, висьтав, висьтав, сьөлөмтө кокньөдышт! Мыйкө тэныд лёктор шуис? Воссый гөтырыды, эн ас пыткад кут!

— Да шуис, мый Коляным миян чурка! Карса другыскөд пө гөтырыд лөсьөдөма!

Маша кызди сулаліс, сідзи и пуксис, кыв лэдзны оз сяммы.

— А тэ?.. Эскан?..

— Ме ог! Ньөти ог! Прөстө то кутшөм лёкторъяс тэ йылысь сикт кузя паськөдлө... Сьөлөм вылын кыптис сы ыжда лөглун, веськыда пузи и эг вермы кутчысьны да швачкөбті ныр-вомас. Но и аслым тшөтш сюралыштис. Да эн шогсьы, эн, бурда.

— Дерт, бурдан, кытчө тон воштысян? Сөмын эскы меным, донаой! Тэнад тайө пиыд! Тэнад да менам! Миян! А пыраліс здук кежлө Костя Рубцов, өтлаын ськөд велөдчылім. Ачыс баламут кодь детина вөлі. Батьыс жө здравоохранение министерствоын ыджыд чина морт. Со и суйыштөма писө медколледжад. Ме пө ачым коркө томдырйи медучилищесянь жө заводитлі. Но, а өні, видзөда да, дзик вежсьөма мортыд, төлка лоөма, мед-институтын велөдчө, тшөтш, тшук, батьыс моз чина мортөдз кышйысяс. Пыраліс да гоз-мөд кывйөн и шыбитчыны удитім, карө сэсся журөдіс.

Денис, дерт, кузьөн-визьөн бурдіс. Удж вылад керъястө бергөдлігөн да плакаястө кыскалігөн сьөкыд вөлі, ёна видзчысьөмөн лои ноксьыны, кызөктыны бура дыр эз лысьтлы и, но вочасөн ас выяс воис...

Света Бузина пукалө кильчө пос помын, өти киас роч сур банка, мөдас фильтра куритчан. Нинөм он шу, ань шойччө, паськыд нюм шыввьялө сөстөм чужөм вылас. Бокиясьн кө видзөдлан, кажитчө, мый тайө аныслөн ставыс тыр-бур, сьөлөм вылас некутшөм майшасьөм абу, шудыс морөсас дзулькйөн пуө. А збыльвылас, ок, майшасьө нывбаба. И кутшөм йөйөн, кын юраөн вөлі сійө томдырйиыс! Дзик эз ков Толик дорсьыс пышйыны! Гоньөглунсө кө лөньөдіс да кольччис, кутшөм лөсьыда эськө оліс, шог эз төд. Толик зэв писькөс морт да өні, колөкө, опичер нин, лейтенант, а то и старшөй. Да-а! Пукав сэсся да гыжъяв юртө. Сы бөрын кымынысь нин өтлаасьліс видзөдөм серти зэв шогмана айловьяскөд, но збыльвылас кө, некодкөд лөсьөдчыны эз и вермы.

Но нинөмла бөрдны-шогсьыны, ачыс Света том на, мукөдъяс дорысь ёна мича. Югыд синма айловьясыд сы вылө со кызди

видзёдоны, дульныс пидзёсодзыс лэччө. Аддзас на ань ассьыс шудсө, сюрас сылы озыр морт, коді кутас ки вылас новлөддыны гөтырсө, а Света радпырысь козыналас верөсыслы асьсө.

Со Денис гири-люки кильчө вывсянь лэччөдіс коляска, сы бөрся Маша кыскө көлалөм пиыскөд вөтчис, водтөдіс кагасө, сёрнитыштис недыр верөсыскөд да бөр керкаас пырис. Кык тьөмө отлаасисны да өні чайтөны асьнысө шудаөн. Маша кага вайөм бөрад тшөгөма, кыз брунь кодь ветлөдлө, весиг нюмыс петіс Светалөн на вылө видзөдігөн. Денис йөткаліс коляскасө дзиръяөд, мед туй кузя гуляйтөдны. Пыр на, тыдалө, чайтө, мый пиыс аслас.

— Привет том батылы! Өні сэсся ковмас кага видзны, лөсьө-дінныд кө,— кыліс Денис туй мөдар боксянь нывбабалысь шыасьөм.

Бергөдчис, видзөдө да, Света Бузина кильчө вылас яндысьтөг кокъяссө паськөдөмөн шляпкысьөма, кузь чигарка пестөма да енэжланьыс тшын пөлялө, вом тырнас нюмъялө, выль пиньяс нин пукталөма да өні оз тупкы вомсө. Морөсыс зэвтчөмөн зэвтчөма, сійө и видзөд — вөсньыдик ковта дөраыс дзездас да потө. А чужөм вылас, кыз кажитчис Денислы, быттьө вежсьыштөма, чусмөма, абу нин воддза кодь веж петкөдлана мича.

Денис сөмын ышловзис: «Мичлуныс да бур сямьыс, буракө, отлаынтө зэв геждөа веськавлөны, кодсөкө отисө Енмыд ань-сыдылы козыналө».

— Привет, привет,— недыр мөмъялыштис да вочавидзис Денис.— Тэ нө көні вөлін? Мыйкө зэв дыр нин эг аддзыв. Бара верөс сайө петалін?

— Да, регыдик кежлө,— кыскыштис да енэжлань пөлыштис тшынсө Света.

— И мый? Эн вермөй лөсьөдчыны?

— Дзик сямтөм вөлөма да, сэтшөмыдкөд нө коді вермас овны! Мыйөн гөгөрвои, өдйөджык нин тяпиос вошталөмөн ветьөкалі. А ті гуляйтны мунад ая-пия?

— Сідз быттьө... А мый нө, вежыд петө?

— Веж эськө оз пет да, аслам эм. Но и кыззи? Ставыс бур?

— Да, быдмам надзөникөн,— нюмъялігтырйи коляскасө бөрө-водзө гуркйөдліс шуда Денис.

— Сійө тай и видзөда, вомыд пельысь пельөдз. Радлан, сідзкө?

— Кысь нө ог, нимкодь, дерт. Сы мый дыра виччысим да, кагатор медбөрын лыштис да. Со и радлам.

— И, чайтан, мый аслад?

Денис пыр жө зумышмис, нюмыс здукөн лэбыштис чужөм вывсьыс, сьөлөмсө парсыштисны Светалөн кывъясыс да.

— А кодлөн нө сэсся? Дерт, аслам!— чорзис гөлөсыс зонлөн.

— А ме чайтөм серти, абу-ө пиукыд кольөмвося гөсьтыдлөн?— кедровтана вашмуніс Света.

— Эн сөр нинөм абусө!— өвтыштчис Денис.

— Век жө мөвпыштлы!— пысасис сы дөрө Света.— Тэкөд Маша квайт во оліс, и нинөм эз артмы, а төдсаыс муртса кежлө пыраліс, и на тэныд! И кадсө артав, ставыс буретш лөсялө!

Ух! Но и морт! Кыззи, бара-й, муыс кутө тайө Бузинасө?! Сылы мед сөмын дойдны кодөскө, да кыз поэьө ёнджыка. Мыйтта лөксө аныслы Енмыс сетөма!

— Менам тайö пиыс! Виччысьлы,— Денис скöрысь сотыштис сьöд синнас Светаöс да сувтöдис коляскасö кутöд вылö.— Недыр пукуыштлы, час ме öдйö,— и котөрөн пырис гортас.

— Но, виччысьла инö,— вомсö паськöдис чуймöm Света.

А Денис тöv ныр моз бөр нин котөртö, муртса кежлö и пыралис гортас, полиэтилен файлö суйöm кабала вайö.

— На, лыдды, он кө эскы!— и суйыштис Бузинылы кабаласö.

— Тайö мый?!

— Мый гижöма, сийö и эм! Тэ лыдды! И гораа! Мед став сиктыс кылö!

— Но ладнö,— пельпомъяссö кыпöдлис да лыддис Света:— «ДНК экспертизалөн кывкөртöд».

— Шöрсö коль, тэ улисьыс лыдды!

— «Липин Денис Николаевичлөн да Липин Николай Денисовичлөн öкмысдас öкмыс да öкмысдас öкмыс сёд юкөныс лöсьлö. Д.Н.Липин лöö Н.Д.Липинылы биологическöй батьөн»,— кывкөрталис Света.

— Гөгөрвоин? То государственнöй печать и ставыс эм! Мед некор сэсса эг кывлы тэсянь шогмытöm кывъястö! Менам тайö пиукыс, аслам!— скöрысь помалис Светакöд сёрнисö Денис да гурöдис коляскасö улич кузя.

«И кызди Денисыс сяммис ДНК экспертизасö вöчны? Та вылö öд сы мында сьöm колö!»— кодзувкотьяс моз мöдисны жуны Света юрын шызьöm мөвпясыс.

А ставыс артмис зэв кокниа. Маша интернетын «Одноклассникьяс» сайт пыр йитчис Костя Рубцовыскöд, кодi кольöm во здук кежлö пыралис сы ордö, и сикт пасьтала ва вылын гы моз кыпалисны Маша кузя мисьтöm сёрнияс, да элясис суклясьöm йивсьыс. Сэки Костя корис ыстыны сылы Денислысь да Колялысь юрсисö, мый Маша и вöчис. А министерствоын пукалысь Костялөн батьыс сетис индöд — некутшöм дон босьттөг нуöдны колана экспертизасö.

И ставыс лад вылö пуксис, ставыс лои ясыд...



Александр ШЕБЫРЕВ

«А шыладсö тэч ачыд...»



Редакциясянь: Александр Шебырев тиöкыда пунктö аслас кывбургяс вылö шылад, лöсьöдö сыланкывгяс. Тайö кывбургяссö гижöма сыланкывгяс улö жö. Но шыладыс на вылö тэчтöм на. Кодлөн эм көсйöм да сям — мед пунктöны шыладсö асьныс, чужтöны выль сыланкывгяс. Торйөн нин томджык йöз, кодгяс нуöдöны асьыныс, мукöдсьыс торгялан шылада туйвизь. Кывгяссö вермасны вежлавны. Авторыс талы абу прöтив и сетö вöля.

Ёртлы...

Тэ ёртөн кө шусин,—
Вай кезнитлы синмö.
Эн поліг, эн гусьөн,—
А сідзи, мед инмис.
А чусалысь биыс,
Мый вералö шöрын,
Мед висьталö важсö,
Но сöмын мед — бöрын...

Припев:

Чолöм, ёртан, кывтан-катан!
Талун — ылын, аски — матын,
Порог вомён сувтін,— мыччöд дзормöм юр.
Курыд нюмыд бара петö...
Устö-тоштö төв ныр летö,
Чолöм, ёртöй, кыз нö олін?
Вот и бур...

Дыр виччысян мортан,
Ми дзерöдам важсö.
Тэ олышт, кыз гортад,—
Ми гöгыльтам гажсö!
Но аски тай бара
Кузь ордымöд мөдан.
А шуйга ли веськыд...
А Енмыс тай төдö!

Припев.

Рок-н-ролл

(Нюмсорён)

Коркө тадз, коркө сідз...
Бөрийим олөмас идз.
А ме радейта доз,
А тэ полан шыр моз.
Бара тан — черань вез,—
Да Киркоровлөн гез.
Олөм вынъястө ылөсас
Тэ эн рез!

Аслад вежөрөн олөмад ов!—
Да эн вунөд рок-н-ролл!

Тані — гым, тані — би.
Килы сетөма ки.
Өтув сулалам ми,
Майбыр, некод оз ви.
Миян босьтөма ноп,—
Абу «реп», абу «поп».
Миян вөтын да вемөсын —
Шыдөс рок!

Аслад вежөрөн олөмас ов!—
Да эн вунөд рок-н-ролл!

Миян босьтөма туй,—
Абу лёк, абу шуй.
Медым водзын кө — ру...
Тэно рөкыс оз су!
Медым — чераньлөн вез,
Да Киркоровлөн гез.
Ассьыд вынъястө ылөсас
Тэ эн рез!

Аслад вежөрөн олөмас ов!—
Да эн вунөд рок-н-ролл!

Олөм

Ме олі — кыз олі.
Эг копрась, но — колі...
И олөмсө коркө ме,
водзынджык, талявлі.
Волі...
Көть туйыс и төдса.
Но йөрыс тай — пөдса.
Да потшъяссө гылөдны
сөнвужөй — кын...
Ділі-долі.

Привет:

Ділі-долі, ділі-долі...
Мый и олі ме тан, мый и воли?
Ділі-долі, ділі-долі,
Ме олі тай, олі тай, олі тай...
Шуа: «Мем долыд!».

Лөз руөн и сылі,
Но олөмсө кылі.
И мичлунсө восьті,
да синмөй тай мыйлакө
бердіс.

Көть шыладыс мыла...
Но сьолөмөн кыла:
Тан — бөрьягысь.
Олөмыс бурпөт нин
дзерөдіс.
Вердіс.

Привет.

Чужан му

Мам морөс кодь шоньд чужан муөй!
Кевма: шевкнит ассьыд мелі сыв,
Ичөт питө олөм визьөд нуөд, (2-ысь)
Вичмөд сылы вежөр да бур кыв.

Привет:

Чужанінөй менам — Енмөн сетөм вын.
Абу, майбыр, көдзыд, абу, майбыр, кын.
Чужанінөй менө видзө вой и лун,—
Некорыс тэ, некорыс он вун.

Шыбөль туйын тшапкы менсьым киөс,
Пемыд войын югзьөд бердөм син,
Енэж пасьта өзтав кодзув-бияс, (2-ысь)
Менам вынөй,— менам чужанін.

Привет.

Коркө аслам олөм помөдз воа,
Синва сорөн копырта сэк юр.
Юрбита да асья руөн лоа, (2-ысь)
Чужан мулы шуа: вот и бур...

Привет.

Вой

А ме чужигөн Му шарсө сывъялі...
Олөм войтъясөн му вылас лымъялі.

Узор чиръясөн дуригмоз сярмуні,
Сэсся тармуні...
Тайö Му вылысь шоныдыс мунöма,
Сылөн дукыс тай вошöма, вунöма...
Тайö Му вылас войлалö кöдзыдыс:
Менö кöдзöдіс...

Привев:

Вой... Тайö Му шарсö ыркöдіс вой...
Вой... Лöзов муыс тай меным оз лöсъяв!
Вой... Морөн лыйöма, ветлöдлö дой...
И ме тани эг пöсъяв! И ме тани эг пöсъяв!
Менö ыркöдіс вой.

Лöзов Му вылас овнысö дышöдіс,
Бара Енэжыс вывланьö ышöдіс.
Тайö югыдас, гашкö, и вола на.
Сöмын — колана...
Тайö Му вылысь шоныдыс мунöма,
Сылөн дукыс тай вошöма, вунöма...
Тайö Му вылас войлалö кöдзыдыс:
Менö кöдзöдіс...

Привев.

Италия йылысь вöт

(Сьылö мужичöй)

Синъяс водзын — фотография... грация... Стефани...
Бара шондіа Италия. Сэні ми. Кыкөн ми...
Бара кыя сэтөр синъястö... Киястö... Инъястö...
Бара руыс сылі... Вемöсын... öтнамөн... Шемöсын...

Привев:

Тэ мöдар муын чужин, Стефани, Стефани, Стефани!
Тэ гылыд туйöд коркö таланьö волан он, волан он?
Тэ югыд райын олін, Стефани, Стефани, Стефани...
Тан жугыль синмөн виччысьö войвыв муысь зон...

Тэнö вемöсын эг аддзывлы, кутыштлы, окавлы...
Тэнö некорыс эг паныдав быдлунъя олöмас.
Сöмын öти фотография... грация... Стефани...
Сöмын мыйла торъя олöмын чужим ми, чужим ми?

Привев.

Ог нин лок

(Сьылö нывбаба)

Вайöй меным зарни куд —
Сöмын ог тай босът!

Меным колө гулыд луд,
Визув юлөн косьт.
Меным колө сяльган ёль,
Эжва нёрыс бок.
Меным колан, муса зон,
Сёмын эн тай лок!

Привев:

Эн тай, эн тай, эн тай лок...
Эн тай, эн тай, эн тай лок...
Вунёма тай, вунёма,
Тодса туйыс вунёма.
Эн тай, эн тай, эн тай лок...
Эн тай, эн тай, эн тай лок!
Нуёма тай, нуёма,
Мустём нылыс нуёма.

Вайин меным дзоридз роз,—
Сёмын эг тай босьт.
Ог нин вочой отув поз,
Сьёлём ог нин восьт.
Пидзос вылад сулалін,
Лажмунёма кок...
Сёмын, зонмой, тэланьё
Талун ог нин лок.

Привев:

Ог тай, ог тай, ог тай лок,
Ог тай, ог тай, ог тай лок,
Вунёма тай, вунёма,
Тодса туйой вунёма.
Ог тай, ог тай, ог тай лок,
Ог тай, ог тай, ог тай лок!
Ытваыс тай тубма,
Муслунос тай нуёма!

Гартыштіс...

Мун!
Меным шуёма — мунёма.
Олём веркөсыс вунёма.
Көні югыдыс? Ордым эз вайёд!
Лок! Меным тувкёма — локтёма.
Коть и жуялі. Коктём на...
Завор дзирдалё.
Кодлөн нё тайё?

Привев:

Гартыштіс Енмыс.
Бара на вермис.
Кытчө тойыштіс — сэтчө и муні.
Енмыс тай гартіс...

Пельпомо вартіс.
Кытчө сунөдіс — сэтчө и суні.

Лэб!
Меным индөма — лэбөма.
Бордой важон нин жебөма.
Но ме мыйлако овта и овта!
Мед!
Менам олома-вылома.
Мыйко тодлома-кылома.
Бара Ен сорон кодзувъяс ковта.

Припев:
Гартыштіс Енмыс,
Бара на вермис.
Кытчө пöльыштіс — сэтчө лэби.
Енмыс тай гартіс.
Пельпомо вартіс.
Сетіс гусятор — сійос и дзеби.

Исерга (кыдз пу гарйысь)

(Сылыоны кыпыд лолон нывбабаяс)

Эжва йывсаясон кылам...
Майбыр — олан ру!
Эжва берег дорын сылам,—
Тані — чужан му.
Оломыд мед абу юмов —
Повныто оз ков!
Исергаяс ошодам да
Кыпöдыштам лов!

Припев:
Исерга, исерга...
Кыддза раскысь петöма.
Тöвруыс тай летöма,
Вөр-ваыс тай сетöма.
Бара на тай пысалім,
Бара на тай югъялім,
Бара на тай нимөдім
Муса чужан му.

Эжва юыс гыяс нуö...
Оломыс оз кус.
Ытва моза сійö туö,
Разалöма бус.
Эжва йылын коми руыс:
Тöдам чужан кыв!
Исергаяс пысалам да
Панам сыланкыв.

Припев.

Эжва юй

(Нюмсорөн. Кыпыда. Мужичойлы)

Эжва йылө, Эжва йылө...
Сьөлөм нуө, бара — дон!
Эзысь комыс оло-вылө.
Верман — кьян, удал зон!
Якөр чөвта сөдз ю шөрын.
Шатинася лючки-бур...
Эжва йылын, парма-вөрын,
Эм на прөмыс, эм на нур.

Привев:

Сө майбырөй, Эжва йылөй...
Педөр Ёгор, Кенжан вож.
Гажөй бырө, гажөй бырө, (2-ысь)
Пыжөн ката, ог тай вош!

Эжва йылө, Эжва йылө...
Нуө менам оласног.
Вунөдан тэ коркө менө,
А ме — некорыс тай ог.
Рытө-войө бипур дорын
Чөскыд юква пуышта.
Аттьө, юй, мый тэ корин.
Ёртъяскөд тан пуышта.

Привев:

Сө майбырөй, Эжва йылөй,
Кымын визлөг, кымын косьт!
Эзысь комыс, мудер комыс, (2-ысь)
Оз кө көсийы — оз тай босьт!

Эзысь төлысь

Эзысь төлысь югөр койө,
Восьтө ассъыс сыв.
Мыйла, мыйла татшөм войө
Бөрдө мича ныв?

Көдзыд төлысь, өтнад төдан,
Көні нывлөн зон.
Аддзан, нылыс шогын пөдө —
Висьталан ли он?

Воши нывлөн муса зонмыс —
Радейтанатор.
Кор нин воас олом помыс,
Енмыс босьтас кор?

Кевмө нылыс: «Эзысь төлысь,
Ас дінад вай босьт.

Кыла: зонмыс мөдкөд мунис,
Синмөс менсым восьт».

Мустөм олөм — абу олөм.
Төлысь мыччис ки.
Босьтис нылөс аскөд сийө...
Өзйис кодзув би.

Вөвлөм ёртлы

Эн дивит, но эн нюжөд ассьыд китө,
Эн вешты синтө.
И эн доль, эн доль, эн...
Ми төрыт вөлім ёртъяс пиын витөн,
А талун, жаль, ми колим сөмын нельөн!

Припев:

Витөд чуньой... Вөлін ёртөн!
Талун лоин төдтөм мортөн.
Тэнад вөля... Тэнад вөля... Тэнад вөля...
Витөд ёртөй, мый нө керин,
Мыйла ёртасьөмсө нерин?
Лоин гөльөн. Лоан гөльөн. Водзө — гөльөн...

Тэ ашпөр вөля-сь бөрйин аслыд ордым,
Кор кежин бокө — некодлысь эн юась.
И медым лоас бурджык вөрөг ордын.
Тэ сыкөд ов да выв,
И сыкөд — луась.

Припев.

Эн дивит, но эн нюжөд ассьыд китө,
Эн вешты синтө.
И эн доль, эн доль, эн...
Ми төрыт вөлім ёртъяс пиын витөн,
А талун, жаль, ми колим сөмын нельөн!

Припев.



Вояс да йӧз

Иван Павлович Морозов (30.09.1924—26.04.1987) чужліс Сыктыв районса Межадор сиктын. Великӧй Отечественнӧй войнаса ветеран. Нелямын кум во вӧлі комсомольскӧй да партийнӧй удж вылын, на пысь кызь кыксӧ — КПСС Коми Обкомын медводдза секретарӧн. Ӧнія ногӧн кӧ — веськӧдліс республикаӧн. Тӧдчана партийнӧй уджалысь да государственнӧй деятель, сійӧ став вынсӧ да сълӧмсӧ сетіс Коми му сӧвмӧдӧмлы. Кужис котыртны гӧгӧрыс ас кодъыс жӧ сяма да тӧждысьысь веськӧдлысьясӧс. Тайӧ кадӧ Коми муным воськовтіс ӧна водзӧ экономика да промышленность, медицина да культура сӧвмӧдӧмын. Ловзисны-быдмисны эз сӧмын каръяс, зэв бур кад тайӧ вӧлі и коми сиктлы.



Торйӧн нин пыдди пунктӧны Иван Павловичӧс чужан сиктас. Весиг ӧнія том йӧз, школаса велӧдчысьяс зільӧны унджык тӧдны нималана земляк йывсьыс. Иван Павловичлы 95 во тыригкежлӧ Межадорса школаын велӧдчысьяс дасътісны тайӧ тӧдчана морт йывсьыс «Ӧна тӧждысис йӧз вӧсна» удж. Котыртіс сійӧс межадорса библиотекаын уджалысь Антонина Васильевна Меньшенина.

Ӧна тӧждысис йӧз вӧсна

Анастасия ОСТАПОВА,
8 класса велӧдчысь.

Иван Морозов да комсомол

100 во сайын миян странаын вӧлі котыртӧма том войтырлысь организация — комсомол, кодӧ уна кӧленалы лои олан туй индысь ордымӧн. Комсомол том йӧзӧс велӧдіс, отсаліс пырӧдчыны выль олӧмӧ. Комсомолечьяс пӧсь сълӧмӧн босътчылісны быд уджӧ. Татшӧмъяс лыдын ас кадӧ вӧлі и миян земляк И.П.Морозов, Межадор сиктса школа помавлӧм морт, кодӧ ас кадӧ 22 во чӧж веськӧдліс республикаӧн. Тӧдчӧдам, мый Коми Обкомса первой секретарӧн сійӧс индісны комсомоллӧн чужан лунӧ — 1965 вося октябрь 29 лунӧ.

Л.Н.Лапшина (ӧнія овыс Морозова) да Е.Н.Морозова (ӧнія овыс Забоева), кодъяс ӧтлаын велӧдчылӧмаӧсь Иван Павловичкод (ӧні олӧны Сыктывкарын, кыкнанныс чужлӧмаӧсь 1925 воӧ), казтылӧны, Иван пӧ велӧдчан воясас нин сяммис кыпӧдны ӧртъяссӧ, юрнуӧдіс наӧн, регыдӧн аддзыліс мытшӧдъясысь петан туй и век вӧлі кывкутысь мортӧн: «*Батъяс да мамъяс уджалісны «Красный партизан» колхозын, да и миянлы, челядълы, уджыс тырмыліс: турун пунктан кадӧ водз асывсянь*

сёр рытöдз верстыöкöд тишöти ноксьылим видз вылын, арнас муяс вылысь град выв пуктас идралим, тöвся пöраö муяс вылö куйöд петкöдiм, чукöртим пöим, вöвъяс дорын ноксим».



Школа помалöм бöрас Иван Морозов мунiс велöдчыны фельдшерско-акушерскöй школаö, кöни пыр жö пырöдчис общественнöй оломö. 1941 воын сийöс пыртöны ВЛКСМ-ö.

Война воясö Иван куим пöрийö чукöртлис салдаталан ноп, медым мунны фронт вылö, но сöмын 1942 воын сийöс босьтисны. Медводз веськалис Калининскöй фронт вылö, вöли коймöд батальонса комсоргөн. 1943 вося тöвсö и тулыссö налөн часьт тышкасис Великие Луки дорын. Тани сийöс пыртисны ВКП(б) радъясö кандидатөн. Вöли сэки сылы 19 арöс.

Бригаданыс öти бöрся мöд мездiс Калининскöй, Смоленскöй, Псковскöй обласътъяс, Белый, Рудня, Невель каръяс. Изоча станция дорын санинструктор Морозов мудзлытöг отсасис ранитчöм салдатъяслы да командиръяслы. Öти тышын прöтивниклөн би улысь петкöдiс 17 доймалöм боецöс. Таысь сийöс пасйисны «За боевые заслуги» медальөн. 1943 вося тöлысьö, медся чорыд тышъяс дырйиыс, салдат Морозовöс пыртисны КПСС-ö. Партбилетсö сетiс политотделса начальник Баишев веськыда пасьмунöм снарядысь артмöм воронкаын.

1943 вося ноябрь 5 лунö Невель кар дорын чорыда ранитчöм бöрын нуисны Великие Луки карса госпитальö. Сыктыв районса военкоматын кольöма госпитальысь петöм йылысь пасйöд. «СССР доръян фронт вылын доймалöм понда 1901 №-а госпитальса военно-врачебнöй комиссия вöчö кывкöртöд, мый боец Морозов строевöй служба вылö водзö оз туй». Демобилизуйтöны Иван Павловичöс 1944 во январ 29 лунся приказөн. Гортас воём бöрын мыйтакö кад фельдшералö Койгорт сиктын. 1945 воын, 21 арöсөн, Иван Морозовöс бöрийöны (Василий Васильевич Кызьюров пыдди) Сыктыв районса комсомол райкомö первой секретарөн. Сылөн водзмöстчöм серти комсомолечъяс уджысь

ӱтдор ноксисны и вӱрын, и муяс вылын — чӱжӱм сьӱмсӱ сетлисны усьӱм салдатгьяслӱн челядьлы. Со кыдзи та йылысь аслас казгытлӱмгьясын гижлис Зосима Васильевич Панев, кодӱ 1943—1947 воясӱ вӱли Сыктыв районса компартияын первой секретарӱн: *«Сӱйӱ сьӱкыд кадас колхозгьяс, мед кӱтъ и вӱлины найӱ кӱдзыд войвылын, сетлисны госуларстволы не сӱмын нянь, но и град выв пуктас, и йӱв-йӱ, пӱрӱдлисны вӱр, гындылисны валегы, вӱчлисны лызгьяс да уна мукӱдтор. Районса партактивлы унджык кадсӱ ковмылис ветлӱдлыны колхозгьясти уполномоченной туйын. Налӱн пельпомгьяс вылӱ водлисны сьӱкыд заданиеяс пӱртӱм кузя моггьяс, медым ас кадӱ вӱли сдайтӱма госпоставка. Сыктыв район быд пӱрӱй пӱртлис олӱмӱ сы пай вылӱ индӱм моггьяссӱ».*

Народной овмӱсын ыджыд вермӱмгьясысь 1946 воын сыктывса нӱль мортӱс вӱли пасйӱма Ленин Орденӱн: З.В.Паневӱс, райисполкомса председатель В.П.Кармановӱс, вӱр пӱрӱдысь-тысячникгьяс Антон Лапшинӱс да Афанасий Желевӱс. Комсомол райкомса первой секретарь И.П.Морозовлы вичмис ЦК ВЛКСМ-лӱн Почёт Грамота.

Война бӱрас комсомол райкомлӱн аппаратӱ организационной юкӱнӱн веськӱдлыны индисны фронтӱвик А.Е.Митюшевӱс. Сӱйӱ казгытлӱ: *«Иван Павлович вӱли вывти вежавидзгьяс мортӱн, зӱв кывкутысь, быдтор вӱчӱ ас кадӱ, бур боксянь донгьявлис йӱзсянь дӱверие. Ми сылысь унатор босьтӱм аслыным тӱд вылӱ. ӱтвыв дасгытгьяс буро заседанияяс, конференцияяс кежлӱ, ветлывлӱм (тшиӱкыдджыка подӱн) комсомол сӱбраниеяс вылӱ сиктӱ и вӱр пӱрӱдысьгьяс дорӱ. Сӱбранныгьяс кыссылисны вой шӱрӱдз. Торгья ёна зӱлим школаын комсомол сӱвмӱдны, уджалӱм велӱдысьгьяскӱд и велӱдчысьгьяскӱд. Медым шонтыны райкомлысь*



стрӱйбасӱ, асьным ветлӱдлӱм нес пилитны. Иван Павловичлӱн шуйга кыс пыр вӱли кӱртӱд йылын, пилитчис сӱмын веськыд-нас, но зӱлис медся ёна».

Райкомлөн том котырö учётөн заведуйтны локтис Мария Беляева. Регыд мысти Иван корасис сы вылö. Тайö вöли 1947 вося юнь тöлысь. Невесталы — 19, жöниклы — 22. Тадзи чужис выль семья. Том йöз овмöдчисны врач Мария Александровна Чередовалөн керкаö (Переход грезд). Сийö керкаыс сулалö на, видзö воддза олысьяс йывсьыс югыд казтылöмъяс.

1948 воын Иван Морозовлы вичмис медводдза уджывывса награда — «Знак Почета» орден. Ленинскöй комсомол радъясын зiля уджалöмысь да сиктса том йöзöс бура воспитайтöмысь, социалистическöй стрöительство вылö найöс ышöдöмысь; ВЛКСМ-лы 30 во йитöдөн». Тайö жö воас сийöс индiсны Коми обласътса комсомол комитетö. Декабрь 28–29 лунъясö мунис 12-öд отчётно-выборнöй конференция, И.Морозов сёрнитис вöчöм удж йылысь. Делегатъяс лыдö вöли бөрйöма 123 комсомолечöс. Ставнас артавсис 122 первичнöй организация, учёт вылын сулалiс 1031 комсомолеч. Унджыкыс на пиысь колхозник — 330 морт, служащöйыс — 235, рабочöйыс — 210.

Конференция вылын Сыктыв райкомса первöй секретарөн бөрйисны вöвлöм фронтöвик В.А.Братинковöс. Кутшöмкö кад мысти найö бара аддзысисны, Сыктывкарын нин. Морозовкöд орччөн Владимир Афанасьевич партиалөн Коми обкомын уджалiс пöшти кызь вит во, бөръя кöкъямыс восö заведуйтис общöй отделөн... Арлыд вылö да фронт вылын ранитчылöм вылö видзöдтöг, сийö пыр на зэв востер, места вылас оз пукав. Сёрни помас тöдчöдiс Иван Павлович йылысь медшөр мөвпсö: *«Обласътса партиалөн первöй секретар, сийö век бурпырысь сёрнитис войтыркöд да ёна тöждысис йöз вöсна».*

Кор видлалi Коми Республикалөн национальнöй архивын «Фонд Морозова» папкаяс, ки помысь сыөн гижöм документъясысь тшöкыда паныдавлi шусьöг: «В борьбе идей и в суতোлке дней, вперёд идущему всегда трудней». Тайö зэв стöч, вөрзёда-на кывъясыс, чайта, и вöлины сылөн олöмын девизөн, туйдiсны мунны водзö, быд сьöкыд здукö отсалiсны босьтны ас вылас быдторйысь кывкутöм.

Иван Павлович Морозов йылысь тайö уджыс — Коми мулөн шань, ыджыд сьölöма пи йылысь казтылöмын нöшта öти воськов. Чайта, заслужитiс, мед сийöс тöдiсны да казтылисны и водзö лoысь кöленаяс.

Таисия НЕКРАСОВА,
8 класса велöдчысь.

Боец Морозовлөн фронтöвöй туйяс

Тайö статьянас ми кöсьям петкöдлыны Иван Павлович Морозовлысь фронтывывса туйяс.

1939 во. Иван Морозов помалö сизим класса школа. Выпускнöй вося фото вылын сылөн да нöшта мукöд велöдчысьлөн морöс вылас ОСОАВИАХИМ СССР (обороналы да авиационно-химическöй стрöительстволы отсöг сетысь общество). Тайö организацияс том войтыр зiлисны босьтны военнöй тöдöмлунъяс,

сӧвмӧдӧсны ассыныс вынйӧрсӧ да босьтӧлӧсны политика боксянь тӧдӧмлунгъяс.



Школа помалӧм йылысь свидетельствосӧ кырымалӧсны шко- ласа директор да куим велӧдысь, и колӧ шуны, найӧ бӧрти- джык тшӧтш веськавлӧсны Великой Отечественнӧй войналӧн фронтгъяс вылӧ. Директор Владимир Феофилович Чабанов войналӧн медводдза тӧлысьясӧ Прибалтикаын веськалӧс пленӧ, но удайт- чис пышйыны. Мездӧс Венгрия, Чехословакия. Та бӧрын 43 во чӧж уджалӧс Межадорса школаын. Пётр Алексеевич Истомина — физкультура урокгъяс нуӧдысь, 1943 воын демобилизуйтӧсны ранитчӧм понда. Биология велӧдысь Николай Викентьевич Ту- рубанов 1943 воын уси Смоленск му вылын. История велӧдысь Андрей Алексеевич Дикоев 1943 воын уси Краснодар крайын.

Школа помалӧм бӧрын Иван Морозов шуис пырӧдчыны ме- дицинаӧ, мунӧс велӧдчыны Сыктывкарса фельдшерско-акушер- скӧй школаӧ. Велӧдчан кадсӧ чинтӧсны да лӧдзисны колана кадсьяс во джынйӧн воддджык — пансис война.

Выпускникгъяс ӧти бӧрся мӧд муналӧсны действующӧй ар- мияӧ. А томиник, латшкӧс тушаа Ваняӧс специальносгьт серти- ыс мӧдӧдӧсны уджавны Абезь посӧлокӧ (тайӧ Инта карсянь не- ылын).

Сиктса том морт куимысь корлӧс мӧдӧдны сийӧс фронт вылӧ, но сӧмын сӧки, кор тыри 18 арӧс, босьтӧсны армияӧ. Ни кольӧд- чӧмгъяс, ни янсӧдчӧмгъяс эз вӧвны. Туйын мунӧгӧн нин рӧдвуж- матыссаыслы ыстӧс Межадорӧ телеграмма.

Мамыс, Екатерина Николаевна, вояс мысти унаысь казъ- тыштлӧс сылы та йылысь: «Став мамыс пияныслы туйӧ петӧгӧн но- пийӧ тӧчӧны гортса пӧжас, шоньд чӧрӧс, сӧстӧм дӧрӧм, а ме весиг эг аддзыв, кыдзи гортысь петӧн».

Воуйтӧс Иван снайпергъяслӧн ротаын (Калининскӧй фронтлӧн 100-ӧд стрелкӧвӧй бригада). Сӧд бригадасӧ котыртӧсны Казахстан-



са Алма-Ата карын. Медсясö вöліны казахъяс, а Москваö воом бöрын бригадаö содтöд пыртисны мукöд национальносъта боецъясöс. 1942—1943 воясö найö пырöдчисны Калининскöй, Смоленскöй, Псковскöй обласъта наступайтан операцияясö, мездисны Белый, Рудня, Великие Луки, Невель каръяс.

Кор кыссисны медся сьöкыд, вир кыстана тышъяс, салдат Морозов пырис партияö. Со мый сійö гижö «Дороги памяти» гижысь Михаил Харитоновлы: «1943 вося октябрь тöлысьö пыртисны КПСС радъясö. Ме сәки вöлі батальонса комсоргөн. Партбилет мыччис политотделса начальник Баишев ёрт (казах) веськыда воронкаын, коді вöлі артмöма немечъяслөн артподготовка бöрын». «Дороги памяти» книга — тайö 100-öд стрелкөвöй бригадалөн туйяс йылысь гижöд — лун бöрся лун, тöлысь бöрся тöлысь. И йöз, кодъяс сәні вöліны. Эм и боец Морозов йылысь пасйöд. Книгасö миянлы мөдöдисны Псков обласъта библиотекаысь, көні эм весиг Баишевлөн фото. Сактаган Баишевич война помасъём бöрас лоöма тöдчана учёнöйөн, академикөн, 30 во чöж вöлöма Казахстанса парламентын депутатөн. Сылысь нимсö новлөны Алма-Ата карса улича, чужан карас (Темир) школа, Актюбинск карын библиотека да университет.

Но кад нин бергöдчыны Иван Павловичлөн олан туй дорö. Во да джын сьöкыд тышъяс вуджём бöрын найö пырöдчисны медся сьöкыд да кывкутана тышъясö. Казьтылөмъясас тöдчöдö: «Ноябрь медводдза лунъясö ми кутім Невель кардорысь öти сикт. Батальонысь ловйөн колины сöмын 40 морт гөгөр. Сиктсö колö вöлі кутны быть. Комбатöс вежысь ыстис менö приказөн чукöртны хозвзвод да вайöдны найös, медым кутны сиктсö ас саяным. Меным колö вöлі пискöдчыны немечъяс да Большой Иван ты костті, но немечъяс казялісны да пондисны лыйлыны миномётъясысь. Сьöкыда ранитчи. Петі миномёт би увсьыс мыш вылын кыссьöмөн. Приказ вайи кытчö колö». Нöшта и пуля жүгöдöма шуйга ки гыррдзасö, но вермöма бөр воодчыны аслас часьтö. Тайö заданиесö олөмө пöртöмысь Иван Павловичлы сетöмаосъ «За боевые заслуги» медаль. 1943 вося



ноябр витѳд лунѳ том боеѳс нуѳны Великие Луки карса госпитальѳ.

Немечьяс, дерт, тѳдїсны, мый Гѳрд Армиялѳн ноябрь сизимѳд лунѳ ыджыд празник — Октябрьскѳй революциялы тырѳ 26 во — и чайтїсны тайѳ луннас карсѳ кисьтны помѳдз, быран выйѳдз, дугдывтѳг лыйлїсны ыджыд калибра орудиеясысь. Куим сутки ранитѳмаяс олїсны карса пѳдвалъясын сѳянтѳг и ватѳг, карас збыль эз коль ни ѳти олѳм вылѳ туяна керка. ѳнї тайѳс весиг сьѳкыд син водзад сувтѳдны, ѳд Великие Луки — зѳв мича кар, сїйѳс пасїѳма Воинскѳй Слава тшупѳдѳн.

Та бѳрын вѳлїны Торжок да Кострома карса госпитальяс. Демобилизуйтїсны Иван Павловичѳс 1944 воын. Кор воис гортас, весиг чойясыс эз тѳдны — укшальмѳма, чужѳмыс блед, важмѳм гимнастѳркаыс кодъ жѳ.

Йѳзлысь олѳмсѳ, чужан мулысь серпассѳ, ассыс олѳмсѳ тадзи путкыльтысь война йылысь Иван Павлович эз радейт казътывны. И мый кийс сѳтшѳма доймылѳма, эз ошїысьлы; вирйїсѳ ѳнтысь дойяс вылѳ некѳр эз норасылы.

Чужан сиктас волїгьясѳ Иван Павлович пыр кежавлїс Межадорса усьѳм салдатъяслы сїѳм обелиск дорѳ. И век тѳдчѳдлїс: «Кор велѳдчи школаын, класса пѳшти джын велѳдчысысь вѳлїны Морозовьяс, но ловїѳн на пысь коли ѳтнам».

Коми Республика пансьѳмсянь квайтымын во тыригкежлѳ Сыктывкарын восьтїсны памятник — усьѳм воиньяслы мемориал. Ловъя бисѳ ѳзтны сетїсны обкомса медводдза секретарлы,



фронтѳвиклы, Великѳй Отечественнѳй войнаын участниклы, кодѳс наградитлїсны «За боевые заслуги» медальѳн, Отечественнѳй война I степеня орденѳн да удж вылын вермѳмьясысь Ленин нима куим орденѳн. Сылысь нимсѳ 2014 вося сентябрь комынѳд лунѳ, 90 арѳс тыригкежлас, сетѳма Межадорса школалы.

Юлия КУТЬКИНА,
9 класса велодчысь.

И.П.Морозовлөн фронтöвик-уджёртъяс

Великöй Отечественнöй война öнöдз на уна миллион войтыр-лөн сёлöмын шыасьлö ёсь дойөн. Тшöтш и миян кöлена аттьöалö найöс, кодтъяс сетисны позянлун овны, велöдчыны, радейтчыны мирнöй енэж улын. Сöветскöй салдат венис став сёлкылунтъяссö, эз сет сувтöдны асьсö пидзöс вылö и юрсö вылын кутöмөн асиввыв Европа пыр Берлинöдз нуис Победалысь Знамя.

Ранитчöм понда демобилизуйтчöм бöрын Иван Павлович Морозов, кызди и война вылын вöвлöм уна мукöд морт, босьтчис страна кыпöдан уджö. Иван Павловичлөн республикаса олысьяс пöвстын вöли зэв ыджыд авторитет. Сийö кызь сайö во веськöдлис Коми обласътса КПСС организацияөн.



И.П.Морозовлы удайтчис чукöртны ас гөгöрыс партийнöй органъясын да организациясын уджалысь ыджыд опыта веськöдлысьясысь команда, быд босьтчöмын сетлис налы колана да вермана отсöг, сэк жö мыджсис республикалысь олöм бурмöдöмын налөн зильлун вылö. Унаөн на пиысь вöлины Иван Павлович моз жö фронтöвикъясөн да ёртъясөн.

Ыджыд государственнöй деятельяс пöвстын тöдчана мортөн вöли фронтöвик Павел Александрович Безносков. Коми крестьянинлөн пи, чужлöма Визин сиктын. Война воясö тышкасьöма Тихвин да Чудово каръяс мездигөн.

1942 воö связист Безносковс сёлкыда ранитчöм бöрын демобилизуйтöны. Гортас воёмөн тшöтш пыр жö босьтчö уджö. Сямлунсö тöдöмөн, П.А.Безносковс бöрйисны Сысола районса комсомоллөн первой секретарён. Регыд мысти сийöс индисны Луза районса КПСС райкомö первой секретарён.

1963 воын Павел Александровичöс бöрйöны Коми АССР-са Министръяслөн Советö председателён, сийö кадсянныс кызь во чöж уджалö И.П.Морозовкöд орччөн: öтвыв мөвпалöны, кызди венны республикаса экономикаын мытшöдъяс, кызди бурджыка сөвмöдны сийöс.

Сыктыв районын и республикаын олысьяслы бура тöдса зэв вежöра морт, зиль веськöдлысь Зосима Васильевич Паневлөн нимыс. 1939-1940-öд воясö сийö воюйтлöма Финскöй война вы-



лын. Зосима Васильевич дыр кад чӧж уджаліс вылыс тшупӧда государственной постъяс вылын. 1944—1947 воясӧ вӧлі Сыктыв районса ВКП(б) райкомын первой секретарӧн. Зіля уджалӧмысь сійӧс пасйисны Отечественной война I степеня да Ленин орденъясӧн. 1950 воын, 36 арӧсӧн, индісны республикаса Министръяслӧн Советӧ председателӧн. Тайӧ удж вылас сійӧ лои медся том веськӧдлысьӧн. 1972 восянь 1984 воӧдз, пенсия вылас петтӧдз, З.В.Панев юрнуӧдіс Коми АССР-са Верховной Совет Президиумӧн.

Виталий Васильевич Путинцев — Сыктыв районса Вотча сиктын чужлӧм морт. Фронт вылӧ сійӧ веськаліс 1942 воын.

Взводса командир; дорйис Ленинград, мездіс Польша да Прибалтика. Армиясь демобилизуйтчис 1947 воын. Гортас воӧм бӧрын став олӧмсӧ сиис республикалы. Дас во чӧж вӧлі народной депутатъяслӧн Сыктывкарса Советын исполкомса председателӧн. Зэв тӧдчана Виталий Васильевичлӧн экономика да культура сӧвмӧдӧмын пайыс. 1975 восянь 1984 воӧдз уджаліс Коми АССР-са Министръяс Советын председателӧс медводдза вежысьӧн.

Республикаӧн веськӧдлысьяс пиын тӧдчана мортӧн вӧлі и Виталий Георгиевич Попов, Сыктыв районса Вотча сиктын жӧ чужлӧм морт. Армияӧ сійӧс босьтісны 18 арӧсӧн. Война Поповӧс суис рытыввыв граница дорын. 1941 вося сентябр тӧлысьӧ медводдзаысь ранитчис. Госпиталь бӧрын веськаліс Лунвыв-Рытыввыв (Юго-Западной) фронт вылӧ, налӧн часьт тышкасис Ростов да Краматорск дорын. Мӧдысь ранитчӧм бӧрын Виталий Поповӧс омӧль дзоньвидзалун понда лӧдзисны гортас. 1958 воын вӧвлӧм фронтӧвикӧс бӧрйисны Емдін районса народной депутатъяслӧн Советын исполкомса председателӧн, а 1963 воын сійӧ лои Коми АССР-са Госпланын председателӧн. Министръяс Советын председателӧс медводдза вежысьӧн уджалігӧн Виталий Георгиевич пуктіс тӧдчана пай экономика да социально-культурной юкӧн сӧвмӧдӧмӧ.

Сыктывкарын чужлӧм Альберт Фёдорович Сюткинлы эз на вӧв весиг 16 арӧсыс, кор пансис война. Фронт вылӧ веськаліс 1943 воын. Полкӧвӧй школаын велӧдчӧм бӧрын том боеч воуйтіс Прибалтикаын. Победа лун суис сійӧс Кенигсбергын (ӧнія Калининград). Война бӧрас Альберт Фёдорович уджаліс Сыктыв районса комсомол райкомын секретарӧн. Бӧрья должностыс сьлӧн — Коми АССР-са Верховной Совет Президиумын Председатель. Пенсия вылӧ петіс 1988 воын.

Республика сөвмөдөмө төдчана пай пуктис и Валентин Михайлович Котельников. 1941 воын сийө помалис Хабаровскса военно-пехотной училище. Фронт вылын ранитчылис. Война помсө суис Германияын.

Комын сайо во Валентин Михайлович уджалис кывкутана должностъяс вылын: сельской хозяйствоын министр, Куломдин районса компартияын первой секретарь, Коми АССР-са Министръяс Советын председателъос вежысь.

1989 воын босътчис юрнуодны «Книга Памяти» дасътан уджон. Кыдзи төдса, тайо книгаас пырисны Коми Республикаысь фронт выло мунлом да сәни усьом салдатъяслон нимъясыс. Валентин Михайловичлон юрнуодом улын редколлегия вевъялис дасътыны «Книги Памяти» ләдзөм выло кызвын рукописьсө.

1947 воын армияысь демобилизуйтчөм бөрын миян республикао воис Вөлөгда обласътын чужлом морт Александр Алексеевич Меледин. Том офицерос индисны комсомольской удж выло Сыктывкарө. Сөрөнджык, партшкола помалом бөрын, Александр Алексеевич 10 во чөж секретаралис КПСС Коми обкомын. Фронт вылын и мирной оломын зия уджаломысь А.А.Мелединос вөли пасйөма вит орден-медальон, вичмөдома «Заслуженный работник народного хозяйства Коми АССР» ним.

Республикалон экономикаын мытшөдъяс венөмын зилис и вөвлөм фронтөвик Владислав Павлович Подоплелов. Армияын сийө вокуйтлөма 1943 вося сентябрь төлысянь, 4-өд танкөвой корпусын. Демобилизуйтчөма 1946 воын. Владислав Павлович Коми филиалса научной сотрудниксянь быдмис филиалон юрнуодысьөдз, веськөдлис сийон 20 во чөж.

1987 вося февраль төлысьо И.П.Морозов ЦК КПСС Генеральной Секретарлон ним выло гижө удж вывсьыс мунөм йылысь заявленнө и гөгөрвоөдө М.С.Горбачевлы мунөмыслысь шөр могсө: «Прожитые годы, ранение и контузия на фронте, практически вся трудовая деятельность в первых ролях (в комсомоле, Советах, в партийных организациях) взяли своё, сказались на здоровье».

1987 вося апрель төлысьо партиялон Коми обком вылын медбөръя выступлениеас Иван Павлович шуис: «Көсья шуны аслам тшөтшъяяслы: ми вөчим ассыным оломнымос! Ми сийос ставнас сиим йозлы служитомлы. Миян партийной билетъяс, кодъясөс унджыкнымлы сетисны фронт вылын, эз няйтчыны».

Великой Отечественной войналон фронтъяс вылын вөвлөм йозыс, кодъяслысь оломсө да уджсө колө не сөмын пыдди пуктыны, но и туявны, уна. Öнiя олысьяслы эм мый босътны насянь, кодъяс став вынсө и сямсө пуктисны войвыв му сөвмөдөмө, позьö вөли паныдавны народной кöзяйство юкöнын республикаса быд районын.

Тайö нималана йöзыслысь биографияяссö лыддигон казялан, мый вөвлөм фронтөвикъяс пöвстын вежöра мортыс вөлөма уна. Позьö, а, гашкö, и колö шуны — зэв ыджыд да писькös вежöра йöзыс. Фронт вылын кöть мирной оломын, налы ковылис уна вын да сям, и быд удж найö вöчлисны асьнысö жалиттöг, дугдывтöг велöдчисны да сөвмөдисны кужанлунсö.

Павел ПИМЕНОВ,
8 класса велӧдчысь.

Чужан му вылын

433 во сайын миян пӧльяс овмӧдчӧмны Сыктыв юлӧн шуйга берегӧ, Межатыкӧд орччӧн. Олісны-уджалісны, чужтісны да быдтісны челядьӧс, и быд кӧленаын вӧліны аслыспӧлӧс йӧз. Тайӧ, дерт, тӧдчис Межадор сиктысь петӧм ӧнія кадся войтыр вылӧ. Унаӧн нимӧдісны ассыныс чужанінсӧ: гижысьяс Михаил Николаевич Лебедев, Сергей Михайлович Морозов, Степан Семёнович Раевский, технической наукаясса доктор Николай Викторович Морозов, РСФСР-са заслуженной артист Михаил Андреевич Красильников да унаӧн мукӧд.

Сёрниыс миян гижӧдын мӧдас мунны земляк, тӧдчана политической да государственной деятель Иван Павлович Морозов



йылысь, кодлӧн нимыс вужвийӧн йитчӧма войвыв му сӧвмӧм-кыпалӧмкӧд — кызь сайӧ во сійӧ веськӧдліс республикаӧн.

Ыджыд олӧмӧ ордымыс заводитчис бать керка порог дор-сянь: чужис 1924 вося сентябрь 30 лунӧ крестьянин семьяын. Сиктын Морозовъяслысь котырсӧ тӧдісны кызди «Пиля» рӧд, вужнас сійӧ мунӧ прапрапӧль Иван пырыс — Филиппӧдз (Пилимон).

Ванялӧн челядьдырыс сиктса мукӧд зонпосниысь нинӧмӧн эз торъяв; мыйыськӧ ӧтчукӧрӧн ворслісны, гажӧдчисны кызди вермисны, но и могыс да нокыс тырмыліс. Ёртъясыскӧд ветлӧдлісны вӧрӧ ягӧдла да тшакла, вугыр шатинӧн котравлісны Каджером ты дорӧ; любӧпырысь вӧчавлісны сёйысь быдсяма чачасӧ. Пӧльыскӧд лэчкӧн кӧч кыйлісны, и мӧс видзны ковмыліс. Водз асылын, мыйӧн помассяс лысьтысьӧм, радейтліс юны свежӧй, руалысь йӧв.

Батыс и мамыс уджалыны «Красный партизан» колхозын. Да и челядьлы уджыд тырмыліс: турун пуктан кадö водз асыв-сянь сёр рытöдз верстыöкöд тшöтш ноксисны видз вылын, төвся пöраö муяс вылö петкöдисны куйöд; чукöртисны пöим, вöвъяс дорын ноксисны, арнас муяс вылын град выв пуктас идралысны.

Морозовскöй грезд пыр мунысь мир туй кайö шöрсиктö. Со и школа. Татчö велöдчыны Ваня Морозов пырис көкъямыс арöсөн. Школалөн пытшкöсыс вöлі гажа да кыпид. Медводдза велöдысьён лои Никанор Фёдорович Макарьин, кодi помавлöма Яренкса духовнöй училище да Вөлөгдаса семинария. Нуöдис сийö роч кыв да литература урокъяс, ворсис некымын музыкальнöй инструмент вылын: фисгармония, мандолина, аккордеон, гитара; веськöдліс школаса хорөн. Межадор школаын Никанор Фёдорович велöдис 52 во чöж.

Школаö пыран öдзöс весьтын öшаліс серпас — глобус. Колö шуны, мый сийö серпасыс индiс челядьлы водзö олан туйсö: коляс мыйтакö кад, найö верстяммасны и сизим во велöдчöм мысти разаласны став страна пасьталаыс.

Школаса альбомын кольöма 1939 воö сизим класс помалысь-яслөн список. Ваня Морозов сэнi дас нельöдөн, а ставнас вөлöма 33 велöдчысь. Важ школалөн стрöйбаыс абу нин, но сы местаын быдмöны сийö кадся выпускникъясөн садитöм пуяс.

Школа помалöм бöрын Иван Морозов пырис велöдчыны фельдшерско-акушерскöй школаö, көнi сийöс и суис война пансьöм йылысь юөр. Но сöмын 1942 воын веськалö фронт вылö. Съöкыда ранитчöм бöрын демобилизуйтöны, гортас воёмөн тшöтш босьтчö уджö — Койгорт, Визин, Воркута, Инта, Сыктывкар.

Көнi көть эз вöv Иван Павлович, ловнас пыр кыссис чужанінас. Письмöасис воча вок Василий Сажинкöд. Со Василий ыстöма ассьыс фото Визинö да мышкас гижöма: «И.П.Морозовлы, менам воклы, казтылöм вылö. 1948 во». Воркутаын горисполкомса председателён уджалан кадö, письмö да ассьыс фотокарточка ыстö вежаньыслы, Н.И.Сажиналы: «Муса вежаньлы. Воркута кар, 1953 во».

Миян земляк некор эз вунöдлы аслас чужан сикт йылысь. Сылөн зильöмөн «Межадор» поселениеын 1975 воö кыпöдисны скöт видзан комплекс — Коми Республикаын татшöмыс вöлі медводдза. Скöт видзысьяслы лэптисны благоустройтöм оланінъяс, школа, культура керка, нюжöдисны чорыд веркöса туй.

Ас сиктса войтыр öнöдз казтылöны Межадорса школаын аддзысьлöм — 1984 воын сылы тыри 100 во. Иван Павлович чолöмаліс ставöс тайö ыджыд тшупöднас, казтыліс ассьыс велöдчан вояссö, öти классын велöдчылöм ёртъяссö, директор Э.В.Плешаковалы сетіс Почёт грамота, аслас вöвлöм велöдысь В.Ф.Чабановлы — «Ветеран труда» медаль, первöй класса челядькöд нуöдис урок.

Медбöръяысь аслас сиктö И.П.Морозов воліс 1986 вося арын. Вöлі баба гожöм. Быттö прöститчис, мунтöдзыс сулалыштiс чужан керкалөн дзирья дорын, сёрнитыштiс керкаыслөн öнiя көзаяка А.И.Никулинакöд (öнi керкаас некодi нин оз ов). Обелиск водзын копытчыліс аслас землякъяслы, кодъяс усины война вылын.

Комын кык во нин Иван Павлович абу миянкӧд, но межадор-са оз вунӧдны сійӧс, пыдди пуктӧны, гӧрдитчӧны сыӧн. Сиктын восьтӧма И.П.Морозов нима музей, кӧнӧ нуӧдсӧны ӧртъясыскӧд да ӧтлаын уджавлӧм ветеранъяскӧд аддзысьлӧмъяс. Иван Павловичлӧн нимыс кольӧ нӧмъяс кезлӧ.



*Имя его навсегда сохранится
В мыслях, поступках и трудных делах.
Долго подобный Иван не родится,
Жить будет вечно он в наших сердцах.*

Комиӧдӧс Евгений Козлов.

Снимокъяс вылын:

1. Студенталан кад. Иван Морозов мӧдӧд радас, шуйгаладорсяныыс нӧльӧдыс — еджыд дӧрӧма.
2. Иван Морозов сетӧ комсомольскӧй билет Николай Семенчинлы. 1947 во.
3. Сизимӧд классын. Иван мӧдӧд радас шӧрас, кепкаа.
4. Сактаган Баишевич Баишев.
5. Иван Павлович фронтӧвӧй паськӧма.
6. И.П. Морозов ӧзтӧ Куслытӧм би. 1981 во.
7. Павел Александрович Безносков.
8. Зосима Васильевич Панев.
9. Морозовъяслӧн семья. Межадор, 1936 во. Иван веськыдладорас.
10. И.П. Морозов чужан керкалӧн дзиргя дорын. 1986 во.





Николай МАЛЬЦЕВ

Чудь — миян зэв важся рөдвуж

Степан Пермскийлөн Коми муо локтөм да сы бөрын лоөмторъяс йылысь уна нин төдмалөма да гижөма-йөзөдөма. Сійөторйыс кокниджыка сюрө: архивъясын эмджык коланаторйыс, гижөдыясыс.

Ме ачым — Волсяын чужөм-быдмөм морт. Водз сюртчи грамотаө, да пöрысь йөзлөн оласногыс, сёрни-басниыс кызкө бура йиджисны сёлөмө и вежөрө.

Со и сувтөді ас водзө мог: сюртчывны зэв аслыспөлөс важся йөзкотырлөн олөм-вылөмө.

Войвывлөн стрөг да зумыш оланінас татчөс йөзыслы быть колө вөлі лоны зэв уджачөн, муыввса озырлунъяссө видзсысьон да сөвмөдысьон. Тайө сямсө төд вылын кутөмөн чудь рөд миянлы төдсьоны примерөн: ми тай өнія цивилизация сөвмөмла тшөкыда ассыным могъяс-чепсасьомъяснымөс пуктам вөр-валөн майшөгъясысь вылөджык: миянлы быдтор позьө, кокниа сетчө.

А вай жө видзөдлам важас.

* * *

Вотча (Волся) — вель ыджыд сикт, джуджыд берегъяса Сыктыв ю дорын. Медся йөзаджык, медтөдчана юкөныс чудьяслөн вөлөма шыльквидзана лунвывса ин — Карчик Ягвыл. Тайө иннимыс и өні на сідзи шусьө. Йөзлөн сорлавтөм легенда серти, сәні вөлөма Ыджыд Кыдз, кодөс чудь йөз видзлөмаөсь олөм кутысь да бурө туйдысь Пас туйө. Пасйышта, колхозной видзьяс пуктанінысь гортлань локтигөн пöрысь нывбабаяс (мортмөд) 1945—1947 воясын на пернапасасьлісны сәні да тшөктывлісны өддзөдны вөвъяснымөс.

Карчик Ягвылса стрөйбаыс вөлөма абу этша. Дерт, керъяс, плакаяс эз нин вөвны (кадыс уна нин колис), но лайкъясыс да мылькъясыс петкөдлөны, мый сәні збыль вөлөма «кар» (дерт, сәкся вежөртас серти).

Тайө кар вывсьыс весиг XX нэм воддза джынъяс сюрավлісны кузнечаын вөчөмторъяс, ожигайтөм дозмукъяс, абразивной (лэч-

тасян) из колясъяс. Тайё колясъясые оз сисьмыны да, гашкё, сы вёсна и дырдзык «олісны» историяс. А гашкё, и сы вёсна, мый найё вёліны поім пиын, а эз сюрны горём улё, кор чудьясёс* зырисны христиана да тайё шылыдінъясас совмодісны видз-му овмосьяс.

* * *

Важ кадся топонимикаыс миянлы висьталё, кутшом вёлёма оласногыс да овмосён водитчомыс сэкса кадас. Видзёдлам.

Изъяг — изъя подувьяс ва. Изыйс ковмыліс стрөйтчигон, пач, пывсян да кузнеча гор тэчигон. Колё и изки да төчила вочны, и чери кыян куломлы грузилё вылө.

Тылаю — тыла дорті визувтысь ю.

Исаньва — «чөскыд дука» ва. (Миян кадё шусис Исаневскөй посёлөкөн).

Пытшкөс — вөр пытшкөд тыысь тыё визувтысь ю. Карчик Ягвылсянь мөдлапöлыс.

Яган — матысса вөр (-ан — глагольнөй, -ина — суффикс).

Көрпыдса — «кар пöдса», коді быттё пöдлалё вятчьяслысь усьласьомсө. Позьё гөгөрвоны и «кар пөдөс»**.

Яй кыскалан шор — шор, кытчө новлісны скөт начканінысь колясъяссө. Сійё визувтө сиктсаянь ылө бокө, и сиктыс кольё сөстөмөн.

Чомакыр — Сыктыв юлөн крут берегас чомъяин, Карчик Ягвыл весьтын.

Вежа ты — Степан Пермскийён вежөдөм ты. Чудьяссянь торъя, катыдындзык***.

Ягдорул, Велпонул, Ляпинул — Сыктыв юлөн сиктъяс весьтса юкөнъяс.

Ляпин — Волсялөн ляпкыдджыкинса грезд.

* * *

Чудин мужичөйяс вёлөмаөсь зэв сюсь вөралысьясөн да чери кыйысьясөн.

Сыктывлөн шуйга берегас (а тайё Карчикыслөн мөдлапöлыс) шевгөдчөма мича помтөм озыр парма, көні эм уна чериа ты, кодъяс йитчөмаөсь висьясөн, шорьясөн, көні ваыс синва кодь сөдз. Чери кыйысьяс тайё шорьясас вөчалісны езьяс, ез вомъясас ладитлісны гымгаяс, медым кульмом бөрас кывтысь чериыс пыраліс гымгаясас (кульмыны катысь черисө эз кыйлыны: сэки ез вомъясыс вөліны прөстөсь, гымгатөмөсь). Да и быд чери кыйысь кольывліс прөст вомсө гымгатөг, медым не удзөдны мукөд кыйсысьясөс.

* Чудьясөс христиана Волсясысь, дерт, эз вермыны зырнысө, автор, тыдалө, чудь улас гөгөрвоё коми-язычникьясөс, важ еньяслы эскысьясөс (*Тані и водзө пасйөд-стөчмөдбөмыс редакциясьн*).

** Тайё, дерт, сідз шусяна йөзкост этимология. Збыль нимыс артмөма «көрт пөдөсаянь».

*** Йөзкост вежөртас вөстөм жө. Вежа тыясыс абу торъя йитчөмаөсь православиекөд. Уна войтырлөн паныдасьлөны нэмөвөйяс вежаиньяс, на лыдын и тыяс. Остяк-яранлөн өнөдз на эмөсь сәтишөмъясыс.

Тайо чери кыяніныс чудьяслөн вöлі медшөр инасөн, сы вöсна и сэтчöс тыясаиныс öнöдз на шусьö Пытшкöсөн.

Чери кыйöмысь кындзи чудинъяс ёна сюртчылісны вöралöмö: звер-пöткаөн озыр вöрыс тай и ачыс на отсалö сяммöдчыны тайö могъясас. Но, дерт, вöралöмас медясö ышöдö овмöс кутöм, көм-паськөм лöсьöдöм да сёян вöсна тöждыс. А тайö могъяс пондаыс ковмыліс вöчны унатор, мый коліс сöмын важ йöз казь-тылöмъясын.

Лыддысьысь вермас и не эскыны да кутас шензыны, но Ыджыд Война воясö (1941—1945 вв.) и том детинкаяс, и пöрысь старикъяс ёна пöльзуйтчисны важся чудьяслөн сямлун вылö ыштöмөн. Тайö нин петкөдлö, кызди гöля да сьöкыда олысь войвыв-са коми йöз ас пырыс нуисны зэв важся чудьлысь вөр-вакөд йитöдсö да олöмö кутчысян морттуйсö. Вайöда некымын пример.

Дзуг (силок). Тайö — пласта путор вылö дзуга тэчöм-крепитöм гөнъяс. Кор лэбач (уркай, сьöла) пуксьö кокыштны сэтчö тэчöм вотöс (пелысь, лежнög), сылөн кок гыжъясыс ноксьöны гөнъясас. Вöралысь локтö да мездö прöмыссö.

Лэч. Вöралысь пöльзуйтö пу увлысь пружина свойствосö. Кор пöтка пуксьö кокыштны заптöм вотöссö, кокыс веськалö петляö. «Лепушка» тув усяс, а пружина-увыйс кыскас петлясö да злöдас пöткалысь коксö*.

Вель аслысикас кыйсян тэчас вöлі чудьяслөн (öнія кадö, гашкö, вунöдисны нин) — **чöс**. Тайö — кер, коді усигас лямöдö гырысь лэбачöс, шуам, дозмөрöс. Дозмөр радейтö пуртिकासны вöрса лыа пиын. Вöралысь водзвыв лöсьöдö лыа пуртiк-трöпа, гөгөрбоксö öськалö, мед пöтка бокö эз мун. «Лепушка» öшалысь кер кутчысьö сторожокөн**. Дозмөр мунигас инмөдчас сторожок ньөръяс. Сійö мынö, а керыйс дозмөр вылас жмуткысьö.

Чудинъяс зэв сямаöсь вöліны и **ньöвйöн** вöдитчыны — кыйны звер-пöткаöс. Татчö бура шогмыліс тусяпулөн ён «мегырыс» да турун сёйысь пемöсьяслөн сывыйс.

Но зэв интереснöйтор казялім ми асланым челядьдырся кадö: ньöв юрас ёсь изтор лöсяліс. Сійö шусьö, научнöя кө, ланцетникөн.

Ланцетник — ваува моллюскъяслөн юкөн. Налөн «колонияыс» гежöда паныдасьлö (тайöс висьталö наука), ми челядьдырся кадö ланцетниктö вöлі шуам «гульчуньён» («палец водяного» рочөн кө).

Тöдöмысь, гульчуныс бура лöсяліс крепитны чудьяслөн ньöв юръясö. Ыдждаыс ланцетникъяслөн эз вöv öткодь: куим сантиметрянь квайтöдз.

Вöвлі Коми мулөн уна юяс дорын, но некытысь ланцетникъясö эг казявлы. А öні тöдмалі öти «учёнöйлысь» топонимическöй курьёз: Ляпин грезд весьтас пö берегыс шусьö ланцетникөн.

* * *

Овмöс кутöм-сöвмөдöмыс, öнія арталöм да донъялöм серти, вöлі, дерт, патриархальнöй, а кодкö и рочалас — примитивнöй

* *Комияс вöдитчöны куим сикас лэчкөн: му лэч, сёргя лэч да лайкана (либö качан) лэч. Куимнанас пöтка шедö юрнас.*

** *Сторожок — пезин.*

пö. Но тайö оз тырвуйö петкöдлы чудьяслысь унапертаса зильöмсö, ассыныс сьöкыдлунъяссö венöмö öтырышъя уджын. Ог кутöй ворсöдчыны öнiя сэтшöм вежöртасъясөн, кызд экономика, рентабельность, конкуренция — тайö кывъяссö тöдтöг быд чудин ловнас кылис, зильöмнас вöли лабутнöй, вежöра.

XX нэм панасын на Сыктыв ю берег йылас вöлины зэв ваяся пыж кумъяслөн колясясыс, кöни, дерт, видзлисны пыжъяс, кулöмъяс, гымгаяс. Пöрысь йöз öтпырийö шулисны, тайö пö нэмöвöй-ся пасьяс, енмөн ёрöмъяс, и оз позь найöс вөрöшитны. Сидзкö, чудьяслөн? И некод сэнi эз нуöдлы «раскопка» ни «экспедиция».

Но öнiя пöрысь йöз, да и ми нин колхозъяс кадö, кöдзлим ид, шобдi, рудзöг, садитлим картупель да гижмавлим рад костъяссö, кызди вöчлывлöмаось чудьяс. И кутшöм гöрийөн, гежмасынөн — налөн колясясыс нэмъясөн олiсны-вылiсны гортъясаным, кузнечаяс дорын. Сэж вед «металлоломтö» некод эз чукöртлы. Öнiя кадö на (1941—1946 вв.) ас вынөн кыскавлим гежмасын гөр, пиня.

Сидз шусяна патриархальнöй овмöс (босьтам кö чудьяслысь) эз тырвуйö могмöд чудьясöс. Пикö воöмысь пыр ёна отсалiс озыр вөр-ва.

Чудьясöс оланiнсьыс зырöм эз жö ёнасö бурмöд сэтчöс олöмсö: важнога кöзьяйствоөн пöльзуйтчöмыс нюжалiс уна нэм на. Вежсыны кутiс олöмыс: лоины машинаяс, сöвмисны йöзкост йитöдъяс.

* * *

XX нэмся сьöкыд воясö (революция, войнаяс, гöльлун да тшыгъялöм) йöз казтыштлiсны уна важ кипом удж: карнана изкиөн изöм, кысян станөн, тойинөн, гырийөн вöдитчöм.

Чудинъяс, легендаяс серти, вöлöмаось ён, винёв, эбöса да зумыд йöзөн. Найö вöралан кадö (шуам, тöвнас) сяммылöмаось кыса лызьяснас ветлыны зэв ылö кодзувъяс серти.

Мудзсö да лёк ньылöмсö быд чудин мыськалiс-личöдiс пöсь сьöд пывсянын. А гожöмнас кöдзыд шор ва вöли вир-яй садьмöдысьөн, мудз веськöдысьөн.

Ваяся чудьлөн ворсöмъяс

Чудьяслөн оланкотырыс вöлöма вель сöвмöм овмöс дай культура юкöнас. Öнi, дерт, ми ог вермöй тырвуйö эрдöдны да висьтавны быд петкöдчöм найö олöмысь. Но медся измöм лöмторъяс пыр кольöны йöзлөн уна кöленаясын паметьö да и öбичаясын вунлытöм йöлöгаөн.

Поп колльöдöм* — тайö лöсялана пример мян сёрниö. Тыдалö, сийö кадсяыс на, кор чудинъяс паныд сулалiсны виль православнöй эскöмлы да нырччисны вöтлыны асланыс оланiнсьыс вөр-ваысь локтöм миссионер-христианаöс: аслыспöлöса янöдiсны, накажитлiсны гусясысьясöс, дыш йöзöс...

«Поп колльöдöмын» ворсö пырджык ас оланiнса (сиктса)

* «Поп колльöдöм» абу йитчöма поп-дяжкöд. Ворсöмыс нимнас и ставнас пырöма рочысь, пом вылас тишалак сувтöдлiсны («ставит на попа»), сөсся шыблалiсны паличсö каръясигөн моз.

став челядыс. Овлө, кодкө окотитө водзджык дугдыны (дыр ворсны кө оз эшты либө мудзис), мед и мунас, ворсөмыс оз дугды. Ворсны көть кор вермасны и мукөд. Ворсиганыс быдөнлөн эм өти палич (рочөн кө — бита). А «попыс» — кык весьт кузьта тшалак.

Ворсөмыс пансьө өгөдасьөмөн. Ставөн сувталөны кытшө, а өтик лыддьөдлө:

«Өгөд — мөгөд,
сьөд сар — пөд сар!
Ниртан — вартан,
гумла — потан.
Петис — ботис,
луйис — ош!»

Коді лоис «ошнас», сувтөдавліс «попсө», кор мукөдьяс өчеребөн «кыясьоны» «попас». Быдөнлөн паличыс кольө ас месаас. Кыясьөмыс мунө бөрья паличсыныс водзө и водзө. «Попсө» сувтөдлысыс («чаньялысыс») оз вермы аснаукөн дугдыны ворсөмсыс. Дугдас кө, ырьянитө кө, накажитөны аслыснога: вольсалөны ставныс ассыныс кудзөсь паличьяссө, а сөсся кикөкөдыс кутөмөн «ошсө» быгльөдлөны паличьяс вылөдыс. Тайө гежөд «наказанньө» улас вермис веськавны сөмын дыш да нан ворсыс.

«Кыка чиркьяс». Тайө ворсөмыс зэв өдья, ышмөны ворсны рыгья прөст кадө. Том йөз юксьоны кыка-кыкаөн (тушанас өтыждаөсь). Öгөдасьөм бөрын му вылө пуксьөдөны бөрья кыксө. Мукөдьяс чеччышталөны пукалысыс костөдыс ассыныс кикутөдсө торйөдтөг. Торйөдчинныд — асьныд пуксянныд. Чеччыштигад муртса инмөдчыштны позьө, но «жугөдны» кикутөдсө оз позь: пуксян!

Кикутөдьясыс (көнсюрө найөс шулісны тшупьясөн) вочасөн вельмөны. Медым этшаджык гижны, пөльзуйтам, кызд өні вөчөны, «спортивной символьяс»:

кыяс — бокьясын; чолөмасям; люкасям; вотчам; бурасям; ог лөгасьөй; пом.

Чирк (рочьяс ног — кузнечик). Чудьяслөн уна ворсөм вөлі тыр серамөн да гажөн, өдөба котралөмөн, чеччалөмөн (кызди чирк). Чирк ворсигас колө ён плака (дөска) да чурка джынъя мыджөд. Тайө мыджөд вылас пуктөны плакасө сідз, медым дженьыд помыс вөлі вылын, а мөдар помас быд ворсыс пуктө ассыс чунь ыджа кымын чирксө. Лыдыс чиркьясылөн өтикөн этшаджык ворсысыс лыд сертыс.

Öгөдасьөм бөрын өти ворсысылы ковмө тальччыны плакалөн дженьыд помө. Чиркьяс лэбыштөны разі-пели. Ставөн кватитөны морт өти чиркөн. Кодлы эз тырмы, сійө «чаньялө» — тэчө чиркьяссө да тальыштө плакаас.

Сярьясьөм. Тайө ворсөмас колө пу сяр (шар), кодөс пырджык вөчөны капыс (йөгыс либө кызд пулөн кыз увьяиныс). Кулак ыджа кымын.

Ворсөны унаөн. Быдөнлөн эм аслас палич (аршын кузьта кымын). Сярсө пуктөны чорыдинө (муас тувьялөны бөдьпом, но медым тырвийө бердіс муас). Сярсяныс өтар-мөдарө нуөдөны визь, код сайө вермас сувтны сөмын кутасысыс (водящий).

Сярсяныыс мышланыс (ворсысыяслөн виччысянінас) визь куим воськов ылнаын нуодсьö «öшкуп». Мукöд виччысысыслы — нöшта öти визь, ещö куим визь сайын. Öшкуп вермас кыясыны аслас куим воськов ылнаса визь сайсянь, мукöдыс — ылыс визь сайсянь.

Тані колö торйөн тöдчöдны «кыясыны» кыв. Тайö вежöртö стöча, метитчöмөн шыбитöм, кор вöралысь кыйсьö. Шуны кö «шыбитöм», сійö вежöртсьö «кызд веськалас», а лыйöм кö — ружьеысь либö пушкаысь.

Кыясьöны ворсысыяс öгöдасьöм бöрын «ас визьсянь». Кöть муртса инман кокнад водзöджык, чаньялысь горöдас «чур», и ачыд лоан чаньялысьöн.

Кор сярыс лэбыштас кодлөнкö кыйöмысь ылö, став ворсысыыс кватитöны ассыныс паличсö да котöртöны асланыс визь сайö.

Некод кö сярас бура эз инмы, öшкупыс кыясьö куим воськов сайсяныыс. Сійö, дерт, инмас. Сэссия медся «дыш» ворсысыыс кутас чаньявны.

Ку-ку пару. Ворсöны тöлын, войнас, кор нин чудиньяс да русичьяс öтув колльöдлісны ворсан кадсö. А мый тайö ворсöмыслөн эм чудьяслөн ру, висьталö важ пöрысь йöзлөн шуасьöмыс:

— Мый нö быд вой ватагаөн чудьяс моз инад он öшійöй, мыйкö пыр корсысянныд?

Ворсны петöны рытнас став ныв-зонмыс гортьяссыныс, кодьясöс оз кутны бать-мамыс. Панöны ворсöмсö кык «юрнуöдысь». Юалöны: «Чипан али сьöла?»

— Меным — чипансö,— шуö öтикыс.

— А меным — сьöласö,— шуö мöдыс.

Быд матыстчысь вöзйö мыйкö торьяланаös («кельчи али ёкыш», «Митрей али Пöтей»...), а юрнуöдысыяслөн артмöны асланыс «ватагаяс». Та бöрын öгöдасьöны, кутшöм ватага водзаён дзебяс, а кодьяс пока куньясны места вылас, шум, ветымынöдз лыддигкості. Дзебсян ватагаыс корсяс сэтшöмин, кытысь корсыны он и чайт: кутшöмкö лöскын, пывсян коджын, гумла бокын, потшöс костын... Дыр мысти кодкö öти вермас сюрны (тыдовтчис пемыдас мыгöрыс, кыліс кызöктöм ли), сэки ватагаясыс вежсьöны ворсöмнас.

Медым тырвыйö гөгөрвоны ваяся йöзлысь овмөссö да налысь сямсö, колö аслыд видзöдлыны кöлуй-дозмуксö. Найö отсалöны вежöртны, кутшöм енбиаös вöлөмаös мян пöль-пöчьяс, мыйта ковмöма венны сьökыдлунсö, мыйта налы лои уджавны. Тайös позьö адзывны музейясысь, Интернетысь, а кодлы мойвиис — асланыс бать-мам да пöль-пöч ордысь.





Олег УЛЯШЕВ

Коми чудьяс-ö-коми комияс?

Кыдз мифьяс вежоны збыль вöвлöмсö,
миянлысь важ олöм-вылöмнымöс

Эз нин медводзаысь син пыр мунны миян йöзкостса коми гижысьяслөн чужанін да чужан му йылысь гижöдьяс, көні комиясöс öткодялöны ли сорлалöны чудь войтыркöд.

Со, шуам, неважөн лыдди А.П.Обрезковалысь «Чудско-зырянские истоки феномена Григория Распутина»*. Распутин темаыс ачыс зэв бур. Тöд вылö усис, мый 2002 воын «Войвыв кодзув» журналын историк В.В.Соловьёв йöзöдліс Григорий Распутинлөн коми вужьяс йылысь статья**. Сэні авторыс вöлі ыстысьöма Паль вöлöсьтса история документьяс вылö: вичко, овмöсьяс да вот вештысь крестянаöс арталысь гижöдьяс вылö. На серти бура тыдовтчö, мый Григорий Распутинлөн пöрысь пöльясыс збыль овлöмаöсь Паль вöлöсьтын, а сэсся мунлöмаöсь Из сайö, көні Педöр-Зосим-Насон-Яков-Епимлөн и чужöма Григорей пиыс. Дерт, и А.П.Обрезкова та йылысь казътывлö, сöмын «фамилия» «дедичинакöд» неуна сорлалыштöма. Обрезкова серти артмö, мый Распутинъяслөн первой вöлöма Фёдоров ов, сэсся Изосимов, көть збыльысьö Фёдорыс да Изосимыс вöлісны пöльясөн, кодъяслысь важ гижöдьясын дзик коми ногөн вайöдлісны нимъяснысö бать ним бöрас: «Насон Зосимов сын Фёдоров» кö гижöма, сэн Фёдоровыс абу ов, а пöль ним (дедичина), сідз жö артмö, кор гижöны «Яков Носимов сын Изосимов», а Распутиныс нин сöмын «Насон-Роспута» прöзвищесянь артмём овнас лöма.

Уна сюрöс гартöма, уна морт йылысь гижöма А.П.Обрезкова,

* Обрезкова А.П. Чудско-зырянские истоки феномена Григория Распутина. Казань. 2017 г.

** Соловьёв В.В. Григорий Распутинлөн ордпу // Войвыв кодзув, № 5. Сыктывкар, 2002. 72–73 л.б.

тан и В.М.Бехтеревос, и З.Фрейдос, и А.С.Сидоровос, и А.П.Размысловос, и уна мукод ыджыд да нималысь мортос казтыштёма, и ассыс олан туйсö гарыштёма. Сöмын сідз и он гөгөрво, мыйла Распутинлөн вужйыс **чудско-зырянскöй**? Кытөн сэн чудьясыс? Мыйла абу коми вужъяс, кызди збыльысьсö и вöліс?

«Войвыв кодзув» журналын неважөн петавліс М.Д.Игнатовлөн «Эжвайывса Игнат орд» очерк. Сэні авторыс видлалёма ассыс ордпусö, сэсся, кор помасьöмаось историческöй документъясыс, кодъяс серти позьö стöчмöдны да муртавны кывйысь кывйö вуджысь орд визьсö, ыстысьöма чудьяс йылысь легенда вылö: *«Кодсюрö йылысь, важөн мунлöмъяс йывсьыс, Паладь пöч висьтавліс уна. Шуам, миян Игнат орд панысь йылысь (öні тай роч ног рöдвужөн шуйны-а). Игнатыс пö вöлöма кутшöмкö Важ чуд рöдысь, кутшöмкö шаман ли, тöдысь ли, Новгород дорса сиктын овлөм чуд войтырлөн юрөн ли...»*

Татшöмторйыс зэв тшöкыда паныдасьлö, кор морта-мортсян вуджö ордпу лыддьöдлöмыс. Воддза нимъяссö (бать-пöль-пöрысь пöль да с.в.), векджык, лыддьöдлöны стöча. Сэсся воöны бöръя тöдса нимöдзыс (унджыкысьсö тайö сиктас медводдза овмöдчысьыс) да помалöны либö кутшöмкö кывпесанөн, либö ыстысьöны важ йöз вылö. Зэв бура тайö тыдовтчö, шуам, В.А.Савинлөн «Менам томкадся олөм» гижöдас:

«Бöрлань кö пыр мунны, менам рöдвужöй со кутшöм артмö:

Ме ачым — Виттор.
Код Виттор? — Öльöш Виттор.
Код Öльöш? — Öньö Öльöш.
Код Öньö? — Öнись Öньö.
Код Öнись? — Лева Öнись.
Код Лева? — Трöш Лева.
Код Трöш? — Педь Трöш.
Код Педь? — Авраам Педь.
Код Авраам? — Сава Авраам.
Код Сава? — Кузь бива вотлук...*

Мый лöб «вотлукус» — ме ачым оз тöд. Чайта, сійö — пом. Водзö сэсся некод оз помнит рöдвужсö миянлысь. Эм эськö кутшöмкö мойджыв кодь:

Мöдлапöлын код тшынасьö?
Тіль Толь тшынасьö.
Код Тіль? — Пан Тіль.
Код Пан? — Макля Ёді.
Код Макля? — Жи Макля.
Код Жи? — Керöс Жи.
Код Керöс? — Емва Керöс.
Код Емва? — Виль ва.

Сöмын оз тöд, кызд тайö «ладитчö», гашкö, тиöтши миян рöдвуж, гашкö, и оз. «Кузь бива» Савасяньныс, тыдалö, артмыв-

* Бива вотлук — коскын новлан сепыстор, кытөн видзисны бива (тывкöрт), биаиз, бива тшак да куритчан завод.

лёма миян овным (Савин), а Педь Трөшыс медвойдөр овмөд-чывлёма миян сиктө, сійөн и шусьө Трөш сиктөн»*.

Тадзи ордвуж лыддьөдлөмыс комияслөн тшөкыдакодь вуджлө «Дуда», «Руй», «Пан тшын» сяма челядлы сылана мойд сюрөсьяслань. Помкаыс гөгөрвоана: өтар боксянь кө, челядлы тадзсө кокниджык ордвуж нимъястө пель саяс сюркнявны, а мөдар боксянь кө, көть мый кузя лыддьөдлы, став орд нимтө, дерт, казгыштны он вермы, и төдтөм нимъясыс пыдди артмө нэмөвөйся кадъяслань ыстысьөм кодь. Миян рөдным пө со кутшөм кузя важас мунө! А мый сэтшөмыс нэмөвөйся кадъясыс, абу кө му пуксян кадыс? Му пуксян кад вылө ыстысьөмөн йөзыс быттьө подулалөны асланыс сиктлысь да ордвужлысь ыджыд историясө: со пө ми, абу сэтшөм-татшөмъяс, а тайө му вылас нэмөвөйся олысьяс, му пуксьөмсянныс нин тан олам. Му пуксян кад кодыс лоө и сикт пуксян кадыд. Унаыс ордпүтө лыддьөдлөны сиктас медводдза волөм морсянныс. Стөч сысянь пансьө быд сиктлөн историяыс да историческөй кадыс.

Му пуксян кадъяслань синөны и историяса гырысь нимкөд, кутшөмкө бокысь локтөм ыджыд культураа йөзкөд либө чудькөд ас вужъяссө йитлөмъясыд. Сэтшөм легендаяс сертиыд и Көрт айкаыд висьтавьсө «вөвлөм казакөн» (сэтысянь пө сэсса Казаковъясыд лоөмаөсь), и Латышевъяс рөдсыс «латышъястө» корсьөны, и Чудиновъяслы «чуд вужйыд» сюрө. Татшөмторйыс наукаын шусьө псевдоэтимологияөн либө войтыркост этимологияөн**, да тшөкыдджыка збыльскөд и матын оз бергав, либө йитчөма зэв ылөсалөмөн. Аслым сюрлис Княжпогост районса Онежьеын кодсюрөлысь ордвужсө гижлыны. Дас ним кымын лыддьөдлөм бөрын мортыс кывкөрталіс: «А сійө пөрысь дедным вөлөма чуд рөдысь. Тани войдөр чудьяс овлөмаөсь. Сэсса Степан Пермскөйыд локтас да асьнысө гуалөмны. На гу вылө Степаныд вичко лэптөма. Вичкоыс киссис да, вичко подуевсьыс уна чуд лы сюрлі, коддьыны пондан да, сявк лыыс киссяс. Вот сійө чудьяссянныс и миян рөдным лоөма». Кыдз йөзкост легенда — мича, и ас местаас зэв шогмана, но история боксянь сылы подулусь, дерт, абу: ёна «сысьявны» колө татшөм фольклортө.

«Войвыв кодзулын» тайө номерын йөзөдөм Н.В.Мальцевлөн «Чудь — миян зэв важся рөдвуж» гижөдын чудьясыс веськыда жө өткодявсьөны комияскөд. Артмө, мый комиясыс петөмаөсь чудьсыс, а өнія Коми муыс археологъяслы сюралысь изъя кипельсө да сөй дозмукъяссө вөчлөмаөсь чудьяс (найө жө комияс). А сэсса и авторыс дас-кызь сюрс во сайся олысьясөс да оласногсө веськыда йитө колхозъяс кадкөд да Ыджыд Отечественнөй война кадся Волсяын олысьяскөд. Дерт, мича мойдыд курыд збыльсьыд бурджык, но век жө оз ков вунөдны, мый чудь войтыр да чудьяс йылысь преданиеяс кузя вель нин уна гижөма, вель уна нин чукөртөма.

Талунья кадө оз нин позь сорлавны збыль коркө овлөм чудь

* Савин В.А. Менам томкадся олөм / Кывбургяс, поэмаяс, пьесаяс, висьтъяс, очеркъяс. Сыктывкар: Коми книжное издательство, 1962. С. 548.

** Этимология (грек кывсянь этимон 'збыльтор' + логос 'кыв, туялөм') — мыйлыськө либө кодлыськө вежөртас туялөм-корсьысьөм.

войтырöс да чюдьяслысь фольклорö кольöм образсö. Чудь йылысь вель уна коми предание чукöртлис да туявліс миян фольклорист Ю.Г.Рочев*. Коми-пермякъяс и веськыда лыддывлісны чуд-багатыръясöс асланыс важ пöльясön, мый йылысь гижліс М.Н.Ожегова**, но Коммуса комилöн жö эмöсь мифъяс и порсь кока посни чудь войтыр йылысь, коді быттö овлöма му вылас öнiя йöзöдз, абу кужлöма гөрны ни кодзны, а öнiя йöз чужöм бöрын мунöма му улас. Эм татшöм йöзкост мифъясыс и миян районъясын, но фольклор образыд — фольклор образ и эм. Ми öдвакö бур вежөрөн эскам, мый миян пöльяс во сизимдасъяс сайын на гундыръяслысь юръяс сötлісны, а пöчьясным гырйөн лэбалісны, кöть эськö лёк морттö «гундыралам», а кутшöмскюрö нывбабаöс, скөрмам дай, «ёманад» шулам.

Тыдалö, мифса чюдьяслөн му улö либö мöд муö мунöм йылысь сюжетъясыс коркö вуджлöмаöсь чюдьяс йылысь легендаясö, кöні висьтавсьö выль йöзлөн-христианалөн чюдьяс оланіно воём йылысь. Вильнога легендаяс сертиыс артмö, мый чюдьясыс — кутшöмкö язычникъяс, кодъяс выль эскöмлы оз сетчыны да асьныс асьнысö виöны либö пышйöны выльлаö.

Сэсся тайö подув вылас нин чужöмаöсь висьтъяс, кодъяс серти артмö, мый чюдьясыс — сэтшöм жö комияс, сöмын пыртчитöмöсь, коми-язычникъяс. Сёрнитісны пö комиён, вöлісны комиясön, но Степан Храпён вайöм верасö эз примитны да, воштысисны кытчöкö. Кызвыннас тайö мотивсö и лэптöны кодскюрö, кор босьтöны восьтыны ордвужныслысь либö чужан сиктыслысь историясö. Но ёна-ö лöсялö тайö комияслөн историялы? Позьö-ö пыртны исторической гижöдö татшöмсяма мифъяссö? Эм-ö кöть неуна збыльыс выльöн пöжалöм мифъясас да «сиктса историяясас»?

«Чудь» кывсö выль гижöдын гарышттöдз, а торйөн нин комияслы тайö войтыр нимсö ляскытöдз, гижысьяслы эз эськö лёк вöв водзвыв лыддыны, мый тайö войтыр йывсьыс гижлöмаöсь нин. Чудь йылысь öд зэв нин уна и дöза бура гижліс 1990—2000 воясын П.Ф.Лимеров***: чудь темаыслысь да чудь пертасыслысь**** гугсö и бансö бергöдліс, восьтіс и мифын, и эпосын, и обрядъясын, и йöзкост историяын.

А босьтны кö история боксянь, став сертиыс артмö, мый комиыс да чудьыс — кöть и рöдвуж кывъя, но дзик торъя войтыръяс. Войдөр «чудьнас» рочъяс да скандинавъяс шулö-

* Рочев Ю.Г. Национальная специфика коми преданий о чуди. (Сер. препринтов «Науч. докл.» / РАН УрО КНЦ. Вып. 124). Сыктывкар, 1985; Рочев Ю.Г. Коми легенды и предания. Сыктывкар, 1984.

** Ожегова М.Н. Коми-пермяцкие предания о Кудым-Оше и Пере-богатыре / Изд. Пермского гос. пед. ин-та. Т. 92. Пермь.

*** Лимеров П.Ф. Войдөр. Мифы, легенды, предания и былички коми. СПб.: Глаголь. 1996; Коми несказочная проза. Сыктывкар. Изд-во СГУ. 1998; Мифология загробного мира. Сыктывкар. Издат. КНЦ. 1998; Мотив погребения чуди в контексте мифологических представлений коми // Кунсткамера. Этнографические тетради. СПб, 1995; Предания о чуди в контексте космогонических представлений // ТИЯЛИ КНЦ УрО РАН.— Вып. 60: Традиционное мировоззрение и духовная культура народов Европейского Севера.— Сыктывкар, 1996.

**** Пертас — образ.

маось балтикабердса финн кывъя став войтырсь (весь, чудь, лопь, сумь, емь, лив), но Волга да Кама пöлönса войтырöс (на лыдын и пермянаöс, миянлысь важ пöльяснымöс) пасйив-лöмаось асланыс нимъясөн. Дас кыкöд нэмся летописьын чудьяс да пермь (важ комияс) паныдасьöны рочьяслы вот мынтысь войтыръяс пöвстын ыджыд костөн: «*инии языци, иже дань даютъ Руси: Чюдъ, Меря, Весь, Мурома, Черемись, Мордъва, Пермь, Печера, Емь, Литва, Земигола, Корсь, Норома, Либь*»*. Чудь войтырыс оланін, кыв да культура сертигыс вöлöма матынджык балтика дорса финн кывъя войтыръяслы да вочасөн сöльнитчöма (ассимилируетчöма) мукöд войтыркöд, меря да мурома моз. Меря овлöма öнiя Ростов гөгöрын, мурома — Муром гөгöрын. 12–13-öд нэмъясын найö кызвыннас рочмöмаось, кор тотараөн пузувтöм Волга ковтыссянь рочьяс вешйöмаось Войвыв Двина ковтысö. «Чудь» нимнас тайö каднас пасйöны эстьясöс, ливьясöс да Вöлök сайса (Войвыв Двина весь-кыдладор пöлас овлöм) чудьясöс.

Сэки весь (важ вепсьяс), «чудь заволочская», «сура поганая» да «тоймичи поганые»** олісны войвывса пермяналөн (Эжва перымлөн) кутшöмскюрö артельяскöд орччөн, öд Устюг кар 1212 воын Ростов-Суздальса рочьяс кыпöдисны пермяналөн муяс вылын на. Тыдалö, абу став тайö войтырыс рочас вошöма. Сураысь, тоймичьясысь да Двина ковтысса чудьясысь унаөн сöльнитчöмаось и пермянакöд. Та вылö индöны и балтикабердса финн кывъясысь рытиввыв коми диалектъясö (удораса, емваса, эжва горувса сёрниö) пырöм кывъяс, и рытиввойвывса комилөн, сідз шусяна, «балтикабердса» туша-мыгöрыс. Степан Храплөн пермяна дорö локтігкежлö Эжва Перымлөн рытиввыв границаыс вешйöма нин вöлі öнiя Котласлань (неылын эм на Пырöс станция да сикт), а юрсиктыс Устюгдорса Гледеньсянь — Емдінöдз.

Перым войтыр (комияслөн подулыс) дас нельöд нэм кежлас — зэв нин ашшөрөн лöма, а вöлökсайса чудь сэк кежлö «пырöма» нин мойдö: кыз торъя войтыр йылысь, сы йылысь оз нин гижны. Эжва перым да Комму перым войтыръяслөн Кростос вераö пыртчöм бöрын да Роч сарстволысь асыввыв границаясö 16-öд нэмын Из сайö вештöм бöрын поэбö нин сёрнитны сы йылысь, мый му вылас перым войтыр пыдди чужис выль войтыр — комияс.

Со и артмö, мый талун кö ми гижам коми олöм йылысь, коми сиктъяс йылысь да коми йöз йылысь, миянлы оз ков кыскавны (колö и оз ков) важөн нин бырöм войтырöс, кöть налөн вирыс и вермис неуна кольыштны удораса ли емдінса комияслөн сөнъясын. Ми, вермас лоны, сөвмим уна важ войтыр подув вылын, но талун ми комияс, а абу чудь-комияс ли савромат-комияс. Болгара öд оз шуны асьнысö чувашъясөн, кöть коркö и мунлісны Волга дорысь выль олöм корсьны волгаса болгаръяс (важ чувашъяс) да карабулгаръяс (важ балкарецъяс) дорысь. Сідзжö и öнiя немечьяс оз шуны асьнысö барбаръясөн,

* *Повесть временных лет. Т. 1–2. СПб, 1996. I: 13.*

** *Сура да тоймичьяс, вермас лоны, сёрнитлісны балтикабердса да волгабердса финн кывъяскöд матысса кывъяс ли диалектъяс вылын.*

кыз мукöд войтыръяскöд öтгудырын германскöй котыръясöс шулисны коркö римляна.

Художествоа гижöдын позьö и вежöрнад, и кывнад ворсыштны, но босьтчан кö нин гижны история йылысь очерк либö казътывлыны важъясö, колö лоны стöчöн, мыджсыны подула документъяс вылö, кыз шуам, миян нэмöвöйся автор А.А.Панюков вöчлис. Сэк и гижöдыслöн доныс вылынджык лоас, и лыддысьысьтö гижысьыд оз ылöг ордымöд ысты. Эз кодйивлыны комиясьыд мореяс. Эз чудъяс моз и гуö пырны. Оз ков таöдз лэдзчысьны. Комилöн олан туйыс и сідз озыр да кузь. Эм мый йылысь гижны да мыйöн ошйысьны.

Некодар боксянь ог кöсйы кулитны тані казътыштлöм гижысьысöс да öтдортны найöс гижан уджсьыс. Дивъя нин, гижöны да. Бур гижöдыд некор оз ло ковтöмöн. А бурыс налöн гижöдъясын тырмö. Сійö жö Николай Васильевич Мальцевлöн очеркын збыль сьöкыдлунъяс пыр вуджöмыс, найöс серпалöмыс сьöлöмтö нормöдö и ловтö вöрзöдö. Чайта, лыддысьысь донъялас.



Татьяна Ивановна Ануфриенко (Габова) чужлөма Княжпогост районса Мещура посёлокын. Ичөт на вёлөма, кор батымамыс вуджлөмаёсь овны Таджикистанö. Сэтчөс Курган-Тюбе карын велөдчөма нельөд классөдз. Но батымамсө бөр кыскөма Коми муö да бергөдчөмаёсь Мещураö. Көкъямыс класс помалөм бөрын Татьяна Ивановна пырөма велөдчыны И.А. Куратов нима Сыктывкарса педучилищө. Пöпуттьö ветлөдлөма математикъяслөн курсъяс вылө. Уджалан кадъяс артавсьö 19 арөссиянь, кор босьтчөма велөдны Княжпогост сиктын математика. Кык во мысти вуджөма овны Сыктывкарö. Уджъсь орөдчывтöг помалөма пединститут. Зильöма юркарса школаясын да 35 номера торгово-кулинарнöй училищөын. Пенсия вылө петөм бөрас вуджлөма овны Краснодарö. Сэни и заводитөма гижны посни да шөркодъ арлыда челядьлы висътъяс да мойдъяс. Сылысь сямсө пыр жö и казялөмаёсь да гижөдъяссö босьтчөмаёсь йөзөдны журналъясын да небөгъясын. Öни бөр локтөма Сыктывкарö. Төдмөдам сылөн висътъясөн.

Татьяна АНУФРИЕНКО

Дзоля ёртъяс йылысь висътъяс

Шыбитөм каньпи

Сималөн вöли вит ичөтик каньпи. Куимыс съода-еджыда мужик рөд, а кык ныв каньпиыс уна рөмаёсь. Сима вöли налы зэв бур мамөн. Пыр нюлис быдтасъяссö, видзис понъяслөн да бокөвöй каньяслөн усъласьöмысь. И кыйöдис, медым сы дорысь влө эз мунны.

Каньпийан вочасөн быдмисны.

Öтчыд налөн Көзяйкаыс петис ывлаö да бадъ пытшкөссянь сы пельөдз локтис каньлөн нявзөм шы.

— Коді нö сэни?— юалис Көзяйка.

Бадъ сайысь чепөсйис ичөтик каньпи да усъкөдчис сы дорö. Сэсся топөдчис кок бердас да босьтчис бара нявзыны. Жаль лои сийö Көзяйкалы да вайис Сималы. Сөмын сибөдас-ö?

Сима исалыштис вайөдөмторсö, нюлыштис каньписö.

Мöдыс казялис, мый тайö абу сылөн мамыс да чеччыштис боквыв. Весиг öд мышсö кыпөдис, гөнгъяссö лэптис. Быттьö көсйис повзьөдны Симаос. Но сийö веськөдыпырысь босьтчис нювны ассыс быдтасъяссö.

Эновтөм каньпи бара на ньөжйөнник матыстчис сы дорö, исыштис Симаос да нöшта на ылөджык чеччыштис.

Көзяйка петис аслас могъясөн, а кор бөр пырис, казялис, кыдзи эновтөм каньпиыс зэв лөсьыда куйлө мукöд пөвстас да чөскыда кургö-узьö. Сималысь мам йөвсö нөнялыштны оз жö вунöд и.

Каньпийан пыр жö кутісны ёртасыны вель воқыскöд. А шыбитöм каньпи мукöдсыыс тшöкыдджыка топöдчывліс Сима мам бердас, тыдалö, поліс сійöс воштöмысь.

Шöйтись пон чом

Граф, кокныдджыка кө нимтыны — График — вöлі ыджыд да ён понйөн. Куйліс сійö чеп йылын, кодысь мöдар помсö вöлі тувъялöмаöсь чом пöвъяс. А чомйыс вöлі вель сьöкыд. Но График кө лёкыс босытчыліс увтны да чепсасыны, то сяммыліс весиг кыскыны ас бöрсянныс оланінсö. Коркө весиг пöрдöліс сійöс.

Отчыд Кöзьякаыс муніс гортсыыс кутшöмкö могъясөн. Потшöс костö лöсьöдöм пыран öдзöссö эз каличав. Сöмын пöддаліс. Гортас бöр воис да ёна и шензис. Йöрö пыран öдзöсыс гурйив восьса. Графикыс абу, чомйыс понйыслөн сылöма жö. Велькөдчис туйлань, гөгöрбок дзоръялö. Казяліс пон чукöр. Туй пöлөн ризöдöны, а на бöрся пон чом вöтчö.

Машинаяс понъяссö да чомсö кытшлалöмөн водзö мунöны. Шоперъясыс шензян чужöмаöсь. Öд олöманыс медводдзаясь адзöны, медым понйыс чомйыскöд тшöтш котраліс. Кöзьяка вель уна вын-эбöс воштіс, мед Графиксö чомйыскöд тшöтш ас инас вайöдны.

Сорас

Метиска оліс карса патераын. А нимтісны сійöс тадз сы вöсна, мый мамыс вöліс сибирса каньён, а айыс сиамскöй дай. Но ачыс сійö некоднан вылас эз мун. Аслыспöлөсөн чужлöма. Сорас, сорас и эм. Сійö вöлі вель ыджыд, еджыд морöса да еджыд кынöма. Кок чöрйöдзыс еджыд жö, бöж йылыс тшöтш и. А мукöд иныс ставнас смоль сьöд. Кроликлөн моз югъяліс мышкыс.

Метиска вöлі асьсö вылö пуктысь, ён ай каньён. Понъясысь сійö мукöд моз эз пов. Вермис весиг юрсö вылö кыпöдöмөн да бöжсö лэптöмөн тшапа мунны ыджыд овчарка кынём увті. Ыджыд понлы коли сöмын шензьöмөн видзöдны яндысьтöм кань вылö. Но усьласыны понъяс эз жö лысьтыны. Весиг неуна польштісны на.

Отчыд керкадорса йöрын кык пон топöдісны каньпиöс. Усьласьöны, гораа увтöны. Метиска буретш лабич вылын сэк вуграліс. Пон увтöмтö кыліс да, тэрмасытөг востіс синсö, дышпырысь бергöдіс налань юрсö. Казялём серпасыс каньыдлы зэв эз кажитчы. Сійö чеччыштіс лабичысь. Матыстчис каньпи дорö да пуксис орчöн.

Понъяс чöv ланьтісны. Сэсся пуксьöмөн öта-мöд вылас дзоргыны босытчисны, быттö юасисны: «Мый нö водзöсö вöчны кутам?»

Сэсся налы тадзитö пукавны дышöдіс да асланыс могъясөн котöртісны водзлань.

А каньпи меліа кургиктыр топöдчис Метиска бердö, быттö аттöалис мездöмсыыс.

Аська

Аська — сьода-еджыда кань. Ыджыд. Видзодлас сертиыс быттьо зумыш, ай кань выло мунё. Сійо збыльысь эз вөв мукод кодь меліон. Эз весиг пукавлы видзысьясыслон пидзос вылас. Эз радейт, кор сійос малыштлісны.

Видзысьясыс эськё сылы нинөм лёксё эз вөчны, олан сямыс каньыслон сэтшөм.

Дзик өти мортлы сөмын сійо лэдзис ставсё вөчны. Тайо видзысьяссё пөчөн да пөльон шуысь нывкалы. Сылы позис весиг малыштны Аськаос. Корсюрө лэдзліс каньыд кыскалыштны асьсё патера джодж кузя и.

И медым кызкё вөрзёдыштны каньос, видзысьясыс мөвпыштлісны ворсны ськод. Пөльыс быттьо сэтшөма дөзмөма, мый көсий кучкыны ичөт нывкаыслы. А сійо быттьо дойсьыс ойзё да бөрдө. Аська лёкысь уськөдчө пөль дорө да тшапкө кисө пиньяснас. Либө диван мышсяньыс сьыліас кутчысяс. И оз лэдзчысь сэтчөдз, кытчөдз пөль оз эновтчы нывкасё дзерөдөмысь.

Видзысьяслы, дерт, сьөлөм сертиыс вөлі, мый каньыс со тазди төждысьсё быдмысь морт вөснаыс. Та понда сылы позис быдтор вөчны. Весиг эз дөзмывны, кор войнас торкліс налысь унсө. Аддзас кыскө шпорөдчантор да кутас котравны-ворсны. Кытчөдз пөчыс оз чеччы да вердышт каньсө чөскыдторйөн. Көть эськө сөяныс сьлөн пыр вөлі.

Өтчыд гортсаяс вунөдісны пөдлавы пианино вевтсө. Аськалы тайо и колө. Босьтчис котравны клавишаяс кузяыс да «ворсны». Дерт, войнас тайо вөлі. Видлісны сійос йөртны мыссян жыръяс, но кань сэні сэтшөма лыбзьывліс, мый узысьяс повзёмпырысь сувтлісны кок йыланьыс.

Ставыс ладмис, кор Аськаос нуисны дачаө. Сэні сійо өдйө чуйдаліс став шырсө да крысасө. И успаньвыв пуксис.

Сылы эз кажитчы овны карса патераын. Сылы колө вөлі вөля.

Петруша

Саридзса кельыдлөз гы рөма Петруша нима попугайос радейтісны ставөн. Сійо ланьтыгтөг вермис большыны: «Петруша бур-р лэбач! Петруша сөйны көсий. Сөмын эн курччась, сөмын эн курччась...»

Сійо вермис лэбавны жырсянь жырийө, пуксьыны сэтчө, кытчө ачыс көсий. И зэв ёна радейтіс видзөдны видзысьясыслы вомас. Сэтысь өд петавлісны быдсяма шыясыс, найос сэсся сійо сяммыліс ачыс шуавны. Радейтіс көвтор выло кокнас шашаритчөмөн увлань юрөн өшавны. Юрсө бергөдлөмөн шуавны: «Петру-ушечка».

Но өтчыд лёктор лоис. Мыйлакө вунөдісны пөдлавы балкон выло петысь өдзөссө. Петруша лэбзис да пуксьыліс перилө вылас. Сэсся шуис «Петруша» да и лэбзис.

Патера пытшкыс быттьо овтөм лоис. Ставөн шогө усисны. Попугай вошөм йывсьыс уна юөр быдлаө өшлісны. Но весиг асьныс некутшөм лача эз кутны, мый попугайыс бөр локтас.

Но оломад тай быдторйыс овлө.

Коймод луннас пырисны мужичой да нывбаба да юасёны:
«Тиян попугайыс?»

Дерт жö, тайö Петруша вöли. Пырысътöм-пыр аслас позйö лэбзис. Быдса лун да вой сийö узис. Сёйыштас, юыштас да и бара нин узьö.

«Онi сэсса сёрнитнытö оз нин кут. Та бöрын»,— тадзи варовитисны видзисьясыс.

Мод луннас Петруша лэбзис позсьяс. Пуксис öшинь дорö, сэсса кöзьяйкаыслы пельпом вылас да ассъыс босътчис шуавны: «Петру-уша, Петруша бур-р лэбач. Пöч локтис. Сöмын эн курчась...»

Ставöн кокниа ышловзисны.

Кузьма

Тöv. Ывла вылын пашляк шковгö-луйсьö.

Пу бердö топöдчöмөн йöжгылясьö да нявзö каньпи. Жаль лои сийö бур мортлы. Вайис гортас.

Дружок нима пон котöртис на дорö, исыштис вайöдöмторсö. Кытшовтис мортöс да мöдарсянныс бара исыштис, сэсса босътчис нювны юрсö, ныр-вомсö, мышсö.

Каньпиöс вердисны, шонтисны, мыссьöдисны. Нимтисны Кузьмаөн. Кык лун мысти Кузьмалөн водзлань водисны кыкнан пель йылыс, та бöрын быттьö бöжыс чегис. Нöшта лун колис да, пель йылыс да бöж помыс усинь. Но каньпи весиг дойсö эз кыв. Найö öд кодзыд ывла вылын кынмисны, кор на некутшöм ас горт сылөн эз вöv.

Регыд мысти Кузьма ёнмыштис. Лоис ворсны радейтысь, шуда каньпиөн. Мый коть пель да бöж джынйыс абу?! Зэв тешкодь вöли видзöдны, кор сийö ворсис Дружоккөд, кор öта-мод бöрсяыс котралисны жыр кузялаыс и пасьталаыс. Чеччалисны, пышгьялисны, весиг дзебсясисны öта-модсьяс.

Öтчыд Дружок кытчökö мунис Кöзьяиньскöд. Кузьмалы зэв гажтöм лои. Кутис лёкджыка сёйны. Тшöкыда петавлис ывлаö. Пуксяс лым чарöм вылö да öтарö-мöдарö кыйкъялö. И зэв жугыля пырас керкаас.

Но со Дружок воис бөр. Кутшöм нимкодь лои каньлы! Кузьма чеччалігыр котöртис ёрт дiнас, мургö да ниртчö.

А модыс пукалö юрсö кыпöдöмөн да кадысь кадö чöвтлö видзöдлассö каньпи вылö. Сылы тшöтш жö нимкодь бара аддзыны бур ёртсö.

Кык мам

Кöзьяйка дорын олісны Ласка нима кань да Найда пон. Олісны — ёнасö эз ёртасыны, но и эз жö лöгавны. Мыйысь налы öта-мод вылас лёкавынсьö? Сёяныс кыкнанныслы тырмис. Быдöнлөн аслас пельöс вöли. Быдөн жö ассъыс мыйкö нокö. Ласка шыръяс куталö, Найда керка видзö.

Но öтчыд кань чужтис куим каньпиöс. Кык вежон мысти и пон вайсис. Тшöтш куим понпи мыччысис.

Ласка ассыыс быдтасъяссö нюлö да вердö. Найда ассыыс челядьсö дай.

Коли кад, и Ласка воши. Мунис да бöрсö эз лок. Тайö сусе-дыс тшапнитис сийöс да йöртис аслас керка пытшкö, медым кань шыръясöс куталис. Пöдлалис керка öдзöссö, томналис да и кытчöкö мунис.

Регыд мысти каньпиян тшыгъявны кутисны. Босьтчисны нявыны, мамсö корсьны.

Найда первойсö веськодя видзöдис на вылö. Сэсса тöждысьны босьтчис. Кор каньпиян кутисны лёкысь горзыны, öта-мöд вылас кавшасьны, понлөн быттö кыткö вöрзис. Матыстчис каньпиян дорö да водис. А найö босьтчисны нёнясьны. Недыр мысти Найда мунис аслас вольöс вылын куйлысь быдтасъяс дорас. Каньпиян сы бöрся вöтчисны.

Асывнас суседыд воис гортас да лэдзис Ласкаöс. Сийö тэрыба котöртис пьян дорас. Аддзö, мый найö зэв лöсьыда узьöны Найдакöд орччөн. Ласка нявöстис.

Каньпиян уськöдчисны мам дорас.

— Атгö тэныд!— шуис Ласка Найдалы.

— Нинöмысь. Олöмад тай быдтор овлö,— вочавидзис Найда.

Пуктис юрсö лапаяс вылас да кокни сьölöмөн мöдис вугравны.

Тшыг Тришка

Вовуклөн вöли ёрт — Тришка нима кань. Найö тшöкыда ворсисны. Вовук дзевсяс да горöдас: «Тришка!» А мöдыс котöртö гөлöс вылас да öдийö и аддзö детинкаöс.

Сэсса кань бергöдчас да мöдарö тövзьö. Вовук сы бöрся. Но Тришкаöс кутны оз сяммы. Каньыс век кытчöкö слöймö саймовтчыны. Либö джаджйö чеччыштас, либö шкап, либö холодильник вылөдз зьвиркнитас. Вермас и диван сайö дзевсьыны.

Вовук сулыштас да бара котöртас дзевсьыны. Дзик нин мöдлаö. Сэсса горöдас: «Три-ишка!» И каньыд бара на зэв öдийö аддзас детинкатö.

Ворсасны сэтчöдз, кытчöдз кодныслы кö оз дышöд.

Öтчыд Тришка эз лок зонкалөн горöдём вылад.

— Тришка, Тришка!— чуксалис Вовук, но мöдыс сідз эз и матыстчы.

Сэки ачыс босьтчис корсьны каньпиöс. Аддзис сийöс кухняысь. Тришка юрсö лэдзёмөн шога пукалис аслас сёян доз дорас. Дозйыс вöли тыртём.

— Тэ тшыг али мый?— юрас вартис Вовуклы. Тришка чöv олис.— Мамö, мам, Тришка сёйны кöсийö.

— Меным дзик некор. Вай ачыд сийöс верд.

Вовук осьтис холодильник öдзöссö. Медся матын куйлисны öгуречьяс. Босьтис медся ичötсö да пуктис Тришка водзö. Мöдыс исыштис, но сёйнысö эз уськöдчы.

— Он кöсийы. А помидорсö видлан?— зонка пуктис помидорсö орччөн.

Но каньыд и сийöс эз вöрзьöд. Сэки детинка судзöдис яблög.

— Сёй. Мамö шуö, мый сийöс быдöнлы колö сёйны.

Тришка весиг эз исышт.

— Ме тöда, мый тэныд колö,— Вовук босьтис дозйысь шоко-

лад кампет. Мездіс кабала кышсыс да пуктіс каньлы ныр улас. Но и юмовтортö Тришкаыд эз видлы.

— Мам, каньным висъмöма. Нинöм оз сёй,— детинка бара уськöдчис мам дорас.

— Ветлам, видзöдлам, мый нин миян Тришкакöд лоöма.

Каньыс век на пукаліс аслас сёян доз дорын. Орччöн куйлісны öгуреч, помидор, яблög да кампет. Мамыс нюммуніс:

— Миян Тришканым öд тайöс оз радейт.

Кыскис холодильникикысь каньлысь дась сёянсö. Мöдыс зэв азыма кутчысис сёйны. Кор пöт лои, дыр на нювсис, сэсса шойччыштис. Та бöрын сöмын уськöдчис Вовукöс корсьны.

Аддзöм ёрт

Колюк гуляйтис йöрти. Мамыс тані жö вöлі. Нем виччысьтöг мыччысис Тобик пон. Вомас босьтöма каньпиöс. Дзик на ичöтик, васьыс-ва. Войталö весиг ваыс.

Тобик видзöдліс мам вылö да пуктіс каньписö сы водзö.

— Кытысь нö тэ сійöс босьтін?— шлапнитис кинас мамыс.— Сэтшöм ва. Тыдалö, гöптысь кыскöмыд.

Тобик нораа никöстис да пуксис бөр кок вылас. Колюк котöртис каньпи дорö. Сійö вöлі дзик эбöстöм, весиг нявзынысö эз вермы.

— Сійö кулöма али мый?— мам вылас видзöдлöмön юалис детинка.

— Ог тöд. Чайта, мый ловъя на.— Мамыс вайис кос дöра да гартыштис каньписö.— На, босьт. Сöмын эн топöд. А ме муна да йöв шонтышта.

Колюк видзчысьöмön босьтис каньписö. Регыд мысти мамыс вайис йöв тыра бутылка, кытчö резина нёнь пысалöма.

— Вай кагасö. Видла вердыштны.

Мамыс суйис каньпилы вомас нёнь помсö. Мöдыс ньöжйöник босьтчис нёнясьны.

— Сідкö, ловзяс,— нимкодъ лои мамыслы.

Понйыс быттö мыйкö гögөрвоис, нимкодя жö чеччыштис да увтыштис.

— Вай эн шыав,— öлöдіс сійöс мамыс.

Каньпи дугдіс сёйнысö.

— Öні вылö тырмылас. Öтпырйö уна сёйны оз позь. Öні сэсса колö узыштны. Сöмын кытчö тэнö водгöднысö?— мамыс видзöдліс гögөрбок.

Тобик котöртис аслас чом дорö да увтыштис.

— Аслад чомйö вöзъян водгöдны?

Тобик бара увтыштис.

— Бур. Сöмын тэ эн няр сійöс.

И водгöдіс дöраö тöбöм каньпиöс пон чом пытшкö, дзик пельöсас. Тобик тшöтш пырис да водіс.

Недыр мысти видзöдлісны да аддзисны, мый пон чöскыда узьö. Каньпиыс косъмöма нин да пон кок костö водöмön вугралö. Кыкöныдлы налы шоныдджык.

Тайö кадсянныс Тобик да каньпи эз и янсавлыны. Лоины зэв бур ёртъясөн. Каньпиысь сэсса быдмис пашкыр гöна кань.

Дипломат нима пон

Саша да Коля — вокъяс. Ас костаныс найö тшöкыда зыксый-
лöны. Чачöйс эськö вокъяслөн и уна. Но Колялы кö ковмас
машина, то Сашалы, мыйлакö, буретш сийön жö телепит ворсны.
Сашалы кö велосипед вылын кытчöкö тöвзыывны колö, Колялы
буретш тайö жö здукас юрас вартас, мый сылы велосипедыс
жö оз тырмы. Сöмын и кылö:

— Вай, ме кöсья тайön ворсны.

— От сет. Ме водзджык босьтi.

Мамыс да батыс эськö унаыс жö öлöдлöны. И янöдiсны,
и кевмысисны — нинöм оз отсав.

Отчыд батыс вайис понпиöс. Зэв мусаник. Челядь уськöд-
чисны сы дорö.

— Тайö менам!

— Абу. Менам сийö!

И босьтчисны йöткасьны, зiлисны вайöмторсö медводдзаөн
босьтны киас. И нем вичысьтöг понпиыд скöрпырысь, зэв
гораа, но вöсньыдика на, кутiс увтны. Вокъяс шензьöмön öвсис-
ны вензынытö.

— Со видзöдлöй! Весиг понпиыслы оз кажитчы тiян зыксöм-
ныд, — шуис батыс.

Коля да Саша венласьтöг нин кутiсны малавны понпиöс.
Налөн синъясыс шудысла быттö югзисны.

Понпиöс нимтiсны Дипломатön. Сы вöсна, мый вокъяс кö
босьтчылисны вензыны, сийö гораа увтöмön уськöдчылис налань.
Быттö öлöдiс зыкö воöмысь.

Медым понпиыс эз сэтшöма майшась на вöсна, челядь пыр
гежöдджыка кутiсны вензыны. И регыд мысти ас костаныс
босьтчисны овны лючки-бура. Дипломаткöд гажаа ворсiгтыр.

Доймöм кок

Мурзик нима каньпи дойдiс коксö. Эз артмы бурногön чеч-
чыштöмыс джуджыд пу вывсянь да. Со и ветлöдлö чотiгтыр.
Аддзис сийöс понпи.

— Мый нö тэ сiдз чотан?

— Кокöй доймö.

— Тэ нюлышт сийöс — öдйö кокньодас.

Нюлыштiс Мурзик доймысь коксö, дойыс эз пышйы.

Котöртiс дiнтiс Семö нима кань.

— Мый нö тэ чотан?

— Кокöй доймö.

— А тэ котралышт, ворсышт. Он и казявлы, кыдзи кокыд
дугдас доймынысö.

Кывзисис Мурзик Семöыддысь. Босьтчис сийö котравны.
Сöмын куим кокыс тэрыбöсь. Нельöдыс пыр на доймö.

Пукалö каньпи жугыльпырысь, юрсö лэдзöма. Мунö дiнтiс
ёжик.

— Мыйла нö тэныд сэтшöм гажтöм?

— Кокöй висьö.

— Тэ вод да куйлышт. Сэки кокыд öдйö бурдас.

Водіс Мурзик. Куйліс-куйліс. Сэсся дышөдіс да сувтіс. Чотіг-тыр веськөдчис керкалань. Нинөм сылы эз отсав.

Аддзис сійөс көзъяйкаыс.

— Мыйкө Мурзикой менам талун чотны кутөма.

Босьтіс ки вылас, видліс доймысь коксө. Кужөмөн веськөдіс. Топыда төбис бинтөн да пөттөдзыс вердіс быдсяма чөскыдторнас.

Мөд асывнас нин каньпи тэрыба ризъяліс йөрын. Вунөма нин, мый сөмын төрыт на кокыс сылөн доймис.

Нывка да чирк

Ичөтик чирклы зэв окота лои ворсыштны. Сэтшөм окота, мый инас эз өшйы.

— Мамук, вай ворсышт мекөд,— матыстчис сійө мамыс дорө.

— Эн дөзмы, пиук, но меным со некор. Пажын колө дасы-тыны.

— Папук, вай ворсыштам,— айыс дорө матыстчис ичөтик чирк.

— Тэ жө, пиук, аддзан, мый менам юр выв тыр уджыс.

Ковмис ичөтик чирклы өтнаслы чеччавны турун пөвстөд. Ачыс аскөдыс ворсө да чеччалө. Аддзө, мый из вылын нывка пукалө да бөрдө. Босьтчис чирк сы гөгөр бергавны. Но нывкаыд весиг эз видзөдды. Сэки чиркыд эз повзы да чеччыштіс нывкалы пидзөс вылас. Нывка пырысьтөм-пыр жө дугдіс бөрднысө. Көсйис нин ичөтик чирктө босьтны, но сійө слөймис чеччыштны мөд пидзөс вылас. Нывка полис повзөдны сійөс. Сөмын вашкөдыштіс: «Вай эн мун ме дорысь. Меным өні сэтшөм гажтөм. Некод мекөд оз ворс ни».

Ичөтик чирк гөгөрвоис нывкатө да чеччыштіс сылы веськыда ки пыдөсас. Сэтысянь веськөдчис турунъяслань. И зэв гораа мыйкө висътавны кутіс. Нывка уськөдчис корсьны чиркөс. Но кытысь аддзан турунвиж чирктө турунвиж турун пиысь? Нывка мудзис да бара пуксис из вылө. Сэки ичөтик чирк чеччыштіс первой пельпом вылас, а сы бөрын и ки пыдөсас пуксис. Нывка видзөдіс сы вылө да гораа сёрнитіс чирккөд. Мөдыд ньөти эз пов нывкасыд.

Денис да лягей

Өти шондіа лунө Денис петіс ывлаө. Лыа чукөр дорын некод эз вөв, сійө босьтчис вөчавны мича замокъяс. Со өти башня тэчис, сэсся мөдө кутчысис. И нем виччысьтөг мыйкө шлапнитчис-усис башня вылад. Вөлөмкө, лягей чеччыштөма. Денис весиг лолыштнысө эз лысьт. Первойсө, дерт, повзыштіс, но сэсся казяліс, мый лягейыд зэв мича, сюся сы вылө видзөдө, да эз кут повны. Весиг юалис:

— Кыдз нө тэнө шуоны?

— Ква.

— А менө Денисөн. Кутан мекөд ворсны?

— Ква-ква.

Денис вөчаліс башняяс. Лягей чеччаліс өтисянь мөдө да сөмын квакайтіс. Сувтлөмөн видзөдывліс детинка вылө.

Но воис пажын кад, и Денис муніс. Кор бөр бергөдчис, лягейыд лыа чукөр дорад эз нин вөв. Пуксис зонка да шогө усис. Сылы эз нин вөв окота замокъястө кыпөдавны. И нем виччысьтөг бара кодкө шлапнитчис-уси. Скамейка вылө чеччыштис лягей.

— Ура-а-а!— горөдіс Денис.— Кутан мекөд ворсны?

— Ква,— вочавидзис лягей да чеччыштис лыа пиө.

Денислы да лягейлы лои, ок, нимкодъ.

Чипан да Рыжик

Чипан тшапа ветлөдліс керкадорса йөрөд. Сы бөрся чип-сигтыр да ыджыд шыөн котралісны чипанпияныс. Найө вөліны кольквижось, небыдик гөнаось. Сэтшөм мичаникось, мый Рыжик нима каньпи век бергаліс на дінын. Сылы сэтшөм телепит тшөтш ворсыштны чипанпиянкөд, но чипан мамыс вөлі зэв аслыспөлөс — эз лэдз накөд дурнысө: «Оз позь каньпиянлы ворсны чипанпиянкөд. Вешйы татысь».

Но Рыжик эз вешйы. Сійө сөмын бокөджык пуксис да сюся видзөдіс мам борд улын лөня дзебсясьыс чипанпиян вылө. Но кор пельясөдзыс воліс чипанпиянлөн гажа чипсөмыс, өдйө котртліс на дінө.

Өтчыд чипан мам сэтшөм сьөлөмсянныс босьтчис мыйкө корсьны турун пиысь, мый эз казяв налөн йөрө төдтөм каньлысь пырөмсө. А сійө чипанпиянтө казялөм бөрын пыр жө и лажыньтчис, пельяссө топөдіс да босьтчис гусьөн кыссьыны.

Рыжик некымынысь чеччыштөмөн и воөдчис төдтөм кань дорөдзыд. Кыпөдіс мышсө да кутіс чушкыны. Төдтөм каньыд весиг шензьыштис сы вылө, чошкөдіс пельяссө: «Вешйы татысь. Аслыд жө лөк лөө. Ме сөмын өти чипанпиөс и сөя. Сэсся муна».

— Ог лэдз на дінө матыстчыны! Найө менам ёртгяс,— скөрысь вочавидзис Рыжик.

Чипаныд казяліс төдтөм каньтө да кыз тай кокыштис сылы плешкас!.. Мөдыд и пышйис.

— Аттьө тэныд, Рыжик! Тэ менсьым чипанпиянөс дорйин,— шуис каньпиы чипаныд.— Верман өнісянь накөд ворсны.

Сэксянь Рыжикыд и дурө накөд. Водас бок вылас, а чипанпиян чеччалөны сы вомөн. Либө жө кыскөны бөжөдыс. Нидзулөн, гашкө, бөжсө чайтөны да. Рыжиклы таысь веськодъ, оз доймы. Мөдарө на, гажаджык сылы, кызди и чипанпияныслы. Либө жө сійө уськөдчас пышйыны, а мукөдыс ыджыд шыөн сы бөрся вөтлысьөны.

Чипан мамыс сюся видзөдө дурысьяс бөрся. Кадысь кадө чипанпиянөс ас дорас чукөстлас. Сэки найө өтув уськөдчыласны мам дорас. А Рыжик на бөрся...

Дымоклөн чужан лун

Верук да Ванюк ворсісны каньпикөд. А шуөны сійөс Дымокөн. Мамыс да пөчыс вашгялігтыр дзоргөны на вылө.

— Вай вөчам Дымоклы чужан лун,— вөзйис пөчыс.

Челядь шензёмён видзөдлісны сы вылө. Сэсся өта-мөд вылас сингъяссө чөвтлісны да өтувйөн горөдісны:

— Ура-а! Дымоклөн чужан лун!

— Кор нө кутам вөчнысө?— юалис мамыс.— Ми жө ог төдөй, кор сійө чужис. Ми өд сійөс ывла вылысь аддзим да вайөдім.

— Менам эз на вун, менам эз на вун,— горөдіс Верук.— Сійө вөлі зэв няйт да жеб.

— Менам өд эз на жө вун,— сёрниас кутчысис и Ванюк.— Мамө сійөс мыськис да ки чышкөдө гартис. Сійө өд сэтшөм на дзоляник вөлі.

— Сідз, сідз. И нөшта на и руд. Тшын рөма дзик. Сы вөсна и Дымок,— торкис воксө Верук.

— Сідзи и вөлі,— вашмунис пөчыс.— Регыд апрель өтиөд лун. Мед сійө и лоас Дымоклөн чужан луннас.

— Ура-а!— бара горөдісны челядь.

И со воис апрель өтиөд лун.

Асывсянныс каньлы сьыліас көрталісны бант. Мөдыслы тайө эз кажитчы да пыр зілис тулясьөмөн мынтөдчыны көртөдсьыс. Но челядь ылөдлісны сійөс ворсөмгъясөн да, каньыд бант йывсьыд и вунөдіс.

Бабыс пөжаліс чөскыд пирөг. Сійө челядьлы да гырысьяслы. А чужан лун пасйысьлы козьналісны ичөтик мач. Сійө зэв кажитчис Дымоклы.

Челядь да гырысьяс юисны тшай, номсасисны пирөгөн. Дымок чөсмасис чериа сөянөн. Сэсся Верук да Ванюк босьтчисны сыкөд ворсны. Быгльөдлісны джодж кузя мачсө, а Дымок зілис сійөс тшаннитны. Кутас, сэсся водас мыш вылас да ас бердас топөдас. Сөмын тай мачыс өдйө мынө да водзө босьтчө тюрны джоджөд. Кань сы бөрся вөтлысьө. Но Ванюк слөймө водзджык тшаннитны. И тюрөдө мачсө чойыслань. Тадзи и сеталөны өта-мөдыслы, кытчөдз Дымоклы оз сюр.

Зэв гажа вөлі Дымоклөн чужан лунө! А каньписө тані ставөн өна радейтөны.

Өлөдны позьтөм Кеша

Серёжа дорын олісны Кеша нима попугай да ичөтик пон, коді зэв тешкодя бергаліс. Та вөсна и Волчокөн шуисны. Кеша вөлі зэв зыксьысь. Кодкө кө босьтчас сёрнитны, сійө пыр жө и заводитас горасьыс-гора горзыны. Ковмыліс вөтлыны сійөс ас позъяс да вевттыны дөраторйөн, медым лөньыштлас. Сэки сійө долис: «Кеша оз көсйы узыны. Кеша оз көсйы узыны». Но шуалөмыс пыр нөжмис и нөжмис. Сэсся попугай ланьтліс. Сөмын та бөрын позис панны ас костса сёрниас.

Кешалөн вөлі радейтана небөг, көні висътавьсө пон йылысь. Кеша лэбзьыліс джадж дорө, көні сулалісны небөггъясыс, да зэв өдйө аддзыліс коланасө. Босьтліс да нуліс Серёжалы.

— Сер-рёжа, лыдды, Серёжа, лыдды!

Детинка востліс небөгсө да босьтчыліс висътавьны, мый сэнні гижөма. Быд кыв нин унаысьтө лыддыввлігөн юрас пукаліс.

Кор Кеша мудзліс кывзыны, лэбліс пон дорö. Сійö кө куйліс, то босьтчыліс дөзмöдны. Кор мöдыс чеччыліс да кутліс бергавны, Кеша пуксьывліс мыш вылас да горзіс: «Ой, уся! Ой, уся!» Кор понлы тайö дышöдліс, сійö пуксьыліс либö водліс. Сэки Кеша бара босьтчыліс дөзмöдчыны. Сöмын на Волчок сувтас да кутас бара бергавны — попугай пуксьö мыш вылас да бара керкатырöн горзö: «Ой, уся! Ой, уся!»

Öтчыд Кеша воши. Дыр сійöс корсисны ставöн: и Серёжа, и бабыс, и весиг Волчок. Абу некöн попугайыд, Некод оз горзы да дөзмöдчы. Гажтöм сытöг лои. Шогö усисны.

Рытнас локтіс мамыс да восьтіс ассьыс шкапсö. Сэтысянь шыöн лэбзис попугай: «Кеша оз көйы узыны! Кеша оз көйы узыны!»

Ставöн кокниа ышловзисны. Сюрис да.

Комиöгис Алексей Попов.



ПЫДДИ ПУКТАНА АВТОРЬЯС!

Редакцияö гижöдьяснытö ыстігöн быть колö юöртны:

1. Ассьынд ним, вич, ов; кор да көні чужлöмныд (лун, тöлысь, во).
2. Паспорт юöрьяс: номер, серия, кор да көні сетісны, гортса адрес (прописка серти).
3. Индивидуальной налогöвой номер — ИНН.
4. Страховöй свидетельство номер.
5. Банкын счёт реквизитьяс.

Тайöс юöрттöг редакция гонорар оз вешты.

*Журналын йöзöдтöм гижöдьяс
редакция оз рецензируют и авторыслы найöс оз мöдöд.
Редакция оз век во öти кывйö авторьяскöд.*

Компьютерный набор — **Н.Кузнецова.**

Учредители: Администрация Главы Республики Коми,
«Союз писателей Республики Коми» — региональное отделение общероссийской
общественной организации «Союз писателей России».

Издатель: АУ РК «Издательский дом Коми». Директор Орёл И.Н. Адрес издателя: 167982.
ГСП-2, Республика Коми, г. Сыктывкар, ул. Карла Маркса, д. 229, Дом печати.

Адрес редакции: 167982. ГСП-2, Республика Коми, г. Сыктывкар, ул. Карла Маркса, д. 229, Дом печати. Телефоны редакции: 24-47-52 (гл. редактор), 24-51-52 (общ. отд./факс), 24-46-36 (бухгалтерия).

E-mail: kodzuv@mail.ru; Сайт: www.komikerka.ru

Подписано к печати 10.09.2019. Дата выхода в свет 27.09.2019. Формат 70x108^{1/16}. Печать офсетная. Усл. печ. л. 7; усл. кр.-отт. 8,4; учётно-изд. л. 7,54. Тираж 402. Заказ № 19-7827. Регистр. ПИ № ТУ11 - 00347 от 24.03.2017 г. выдано Управлением Федеральной службы по надзору в сфере связи, информационных технологий и массовых коммуникаций по Республике Коми. Публикация материалов на социально значимые темы осуществляется за счет субсидии, предоставленной Администрацией Главы Республики Коми из республиканского бюджета Республики Коми. Отпечатано в ООО «Коми республиканская типография», 167610, Республика Коми г. Сыктывкар, ул. В.Савина, д. 81. Цена свободная.



Снимокъс Ксения Мартюшевало́н.

